



Llywodraeth Cymru
Welsh Government

Deddf Trais yn erbyn Menywod, Cam-drin Domestig a Thrais Rhywiol (Cymru) 2015

Memorandwm Esboniadol
yn ymgorffori'r
Aseiad Effaith Rheoleiddiol

Chwefror 2015

Tudalen Gynnwys

RHAN 1

1. Disgrifiad
2. Y Cefndir Deddfwriaethol
3. Diben y ddeddfwriaeth a'r effaith y bwriedir iddi ei chael
4. Ymgynghori
5. Y pŵer i wneud is-ddeddfwriaeth
6. Aseiad Effaith Rheoleiddiol

RHAN 2 – ASESIAD EFFAITH

7. Yr Opsiynau
8. Costau a manteision
9. Adolygu ar ôl gweithredu

RHAN 3 – DOLEN AT ASESIADAU EFFAITH

ATODIAD 1 – Crynodeb o Gostau'r Fframwaith Hyfforddi Cenedlaethol

ATODIAD 2 – Crynodeb o'r 'Gweithwyr Proffesiynol Perthnasol' fel y'u Hamlygir yng Nghostau'r Aseiad Effaith Rheoleiddiol ar gyfer Canllawiau Gofyn a Gweithredu

RHAN 1

1. Disgrifiad

1. Bwriedir i ddarpariaethau Deddf Trais yn erbyn Menywod, Cam-drin Domestig a Thrais Rhywiol (Cymru) sicrhau canolbwynt ar draws y sector cyhoeddus ar atal y materion hyn, diogelu dioddefwyr a rhoi cymorth i'r rhai y mae'r materion hyn yn effeithio arnynt.
2. Mae'r Ddeddf yn gosod dyletswyddau ar Weinidogion Cymru, Cynghorau Sir a Chynghorau Bwrdeistref Sirol ("Awdurdodau Lleol") a Byrddau Iechyd Lleol i baratoi a chyhoeddi strategaethau a anelir at roi terfyn ar drais yn erbyn menywod, cam-drin domestig a thrais rhywiol. Mae'r Ddeddf ymhellach yn rhoi pŵer i Weinidogion Cymru i gyhoeddi canllawiau i awdurdodau perthnasol¹ ar sut y dylent arfer eu swyddogaethau er mwyn cyfrannu at roi terfyn ar drais ar sail rhywedd, cam-drin domestig a thrais rhywiol. Mae'r Ddeddf hefyd yn cynnwys darpariaeth i ganiatáu i Weinidogion Cymru ei gwneud yn ofynnol i Awdurdodau Lleol, drwy reoliadau, gyhoeddi gwybodaeth ynghylch sut mae swyddogaethau addysg yr Awdurdod Lleol yn cael eu harfer i hyrwyddo dibenion y Ddeddf. Ar ben hyn, mae darpariaeth yn y Ddeddf ar gyfer penodi Cynghorydd Cenedlaethol.

¹ Awdurdodau Lleol, Byrddau Iechyd Lleol, Ymddiriedolaethau'r Gwasanaeth Iechyd Gwladol ac Awdurdodau Tân ac Achub.

2. Y cefndir deddfwriaethol

3. Mae gan Gynulliad Cenedlaethol Cymru ("y Cynulliad") y cymhwysedd deddfwriaethol i wneud darpariaeth yn Neddf Trais yn erbyn Menywod, Camdrin Domestig a Thrais Rhywiol (Cymru) yn rhinwedd Rhan 4 o Ddeddf Llywodraeth Cymru 2006 ("GoWA 2006"). Nodir darpariaethau perthnasol Deddf Llywodraeth Cymru 2006 yn adran 108 ac Atodlen 7.
4. Mae paragraffau 5, 9, 12, 15 o Ran 1 o Atodlen 7 yn nodi'r pynciau perthnasol sy'n rhoi cymhwysedd deddfwriaethol i'r Cynulliad i wneud y darpariaethau a nodir yn y Ddeddf hon. Atgynhychir y paragraffau perthnasol isod. Nid yw ar gael yn Gymraeg gan mai dyfyniad o ddeddfwriaeth nad yw wedi ei gwneud yn Gymraeg ydyw.

5 Education and training

Education, vocational, social and physical training and the careers service.
Promotion of advancement and application of knowledge.

Exception —

Research Councils.

9 Health and health services

Promotion of health. Prevention, treatment and alleviation of disease, illness, injury, disability and mental disorder. Control of disease. Family planning. Provision of health services, including medical, dental, ophthalmic, pharmaceutical and ancillary services and facilities. Clinical governance and standards of health care. Organisation and funding of national health service.

Exceptions—

Abortion.

Human genetics, human fertilisation, human embryology, surrogacy arrangements.

Xenotransplantation.

Regulation of health professionals (including persons dispensing hearing aids).

Poisons.

Misuse of and dealing in drugs.

Human medicines and medicinal products, including authorisations for use and regulation of prices.

Standards for, and testing of, biological substances (that is, substances the purity or potency of which cannot be adequately tested by chemical means).

Vaccine damage payments.

Welfare foods.

Health and Safety Executive and Employment Medical Advisory Service and provision made by health and safety regulations.

12 Local government

Constitution, structure and areas of local authorities. Electoral arrangements for local authorities. Powers and duties of local authorities and their members and officers. Local government finance.

“Local authorities” does not include police authorities.

Exceptions—

Local government franchise.

Electoral registration and administration.

Registration of births, marriages, civil partnerships and deaths.

Licensing of sale and supply of alcohol, provision of entertainment and late night refreshment.

Anti-social behaviour orders.

Local land charges, apart from fees.

Sunday trading.

Provision of advice and assistance overseas by local authorities in connection with carrying on there of local government activities.

15 Social welfare

Social welfare including social services. Protection and well-being of children (including adoption and fostering) and of young adults. Care of children, young adults, vulnerable persons and older persons, including care standards. Badges for display on motor vehicles used by disabled persons.

Exceptions—

Child support

Child trust funds, apart from subscriptions to such funds by—

- (a) a county council or county borough council in Wales, or
- (b) the Welsh Ministers.

Tax credits.

Child benefit and guardian's allowance.

Social security.

Independent Living Funds.

Motability.

Intercountry adoption, apart from adoption agencies and their functions, and functions of “the Central Authority” under the Hague Convention on Protection of Children and Co-operation in respect of Intercountry Adoption.

The Children's Commissioner (established under the Children Act 2004 (c. 31)).

Family law and proceedings, apart from—

- (a) welfare advice to courts, representation and provision of information, advice and other support to children ordinarily resident in Wales and their families, and
- (b) Welsh family proceedings officers.

5. Nid oes unrhyw rai o ddarpariaethau'r Ddeddf yn dod o dan unrhyw rai o'r eithriadau a bennir yn Rhan 1 o Atodlen 7 i Ddeddf Llywodraeth Cymru 2006, nac yn gymwys heblaw mewn perthynas â Chymru neu'n rhoi, yn gorfodi, yn addasu neu'n dileu (neu'n rhoi pŵer i roi, gorfodi, addasu neu ddileu) swyddogaethau sy'n arferadwy heblaw mewn perthynas â Chymru, neu'n torri unrhyw gyfyngiadau yn Rhan 2 o Atodlen 7, gan roi sylw i unrhyw eithriad yn Rhan 3 o'r Atodlen honno rhag y cyfyngiadau hynny.

3. Diben y ddeddfwriaeth a'r effaith y bwriedir iddi ei chael

6. Diben cyffredin y Ddeddf yw gwella ymateb y sector cyhoeddus yng Nghymru i drais ar sail rhywedd, cam-drin domestig a thrais rhywiol. Bwriedir iddo roi canolbwynt strategol ar y materion hyn a sicrhau bod ystyriaeth gyson yn cael ei rhoi i fecanweithiau atal, amddiffyn a chefnogi wrth ddarparu gwasanaethau.
7. Mae Llywodraeth Cymru'n cydnabod mai menywod sy'n dioddef waethaf oherwydd pob math o drais personol a bod hyn yn wir yng Nghymru, yn gyson â gweddill y byd. Er mwyn cydnabod hyn, mae darpariaeth yn y Ddeddf yn ei gwneud yn ofynnol i bersonau sy'n arfer swyddogaethau perthnasol o dan y Ddeddf ystyried, ynghyd â materion eraill, yr angen i ddileu neu leihau ffactorau sy'n cynyddu risg, neu'n gwaethygu effaith, trais yn erbyn menywod a merched. Er mai menywod sy'n dioddef waethaf ac amlaf oherwydd trais ar sail rhywedd, cam-drin domestig a thrais rhywiol, mae'r Ddeddf yn cydnabod y gall trais a cham-drin o'r fath effeithio ar unrhyw un. Gall dioddefwyr ddod o bob rhan o gymdeithas, gan gynnwys pobl hŷn, pob ethnigrwydd, crefydd a chredo, pobl anabl a phobl o'r gymuned Lesbiaidd, Hoyw, Deurywiol a Thrawsrywiol.

Gwella ymateb cyrff cyhoeddus

Y Mater

8. Er bod llawer wedi cael ei wneud yng Nghymru i fynd i'r afael â materion trais ar sail rhywedd, cam-drin domestig a thrais rhywiol, mae'r materion yn dal i fodoli.
9. Mae'r Swyddfa Ystadegau Gwladol yn cyhoeddi ffigurau blynyddol am droseddau treisgar a throeddau rhywiol yn seiliedig ar Arolwg Troseddau Cymru a Lloegr (CSEW) (nid oes ffigurau ar gael am Gymru yn benodol). Mae modiwl hunan-gwblhau 2012/13 CSEW ar drais personol a gynhaliwyd ymhlith oedolion 16 i 59 oed, yn ymdrin â cham-drin emosiynol, ariannol a chorfforol gan bartneriaid neu aelodau teuluol, yn ogystal ag ymosodiadau rhywiol a stelcio gan unrhyw berson. Canfu fel a ganlyn:
 - a. Rhoes 7.1% o fenywod a 4.4% o ddynion yng Nghymru a Lloegr wybod eu bod wedi bod yn destun rhyw fath o gam-drin domestig yn y flwyddyn ddiwethaf, sy'n cyfateb i amcangyfrif o 1.2 miliwn o fenywod a 700,000 o wrywod a fu'n destun cam-drin domestig;
 - b. At ei gilydd, roedd 30% o fenywod a 16.3% o ddynion yng Nghymru a Lloegr wedi bod yn destun rhyw fath o gam-drin domestig ers 16 oed, sy'n cyfateb i amcangyfrif o 4.9 miliwn o fenywod a 2.7 miliwn o wrywod a fu'n destun cam-drin domestig.
 - c. Cafwyd gostyngiad sylweddol ym mhob math o gam-drin domestig (gan bartner neu gan aelod o'r teulu, cam-drin nad yw'n gorfforol, bygythiadau,

grym, ymosodiadau rhywiol a stelcio) rhwng 2004/05 a 2012/13. Er hynny, mae'r ffigur yn parhau yn 5.7% i oedolion 16 i 59 oed;

- d. Mae mwy o fenywod na dynion wedi bod yn destun trais personol ar draws yr holl brif fathau o gam-drin y gofynnwyd amdanynt, a oedd yn cynnwys pob math o gam-drin domestig, ymosodiadau rhywiol a stelcio, ers 16 oed.
 - e. Yn y flwyddyn ddiwethaf, cam-drin (nad yw'n rhywiol) gan bartner a stelcio oedd y mwyaf cyffredin o'r gwahanol fathau o drais personol: rhoes 4% o fenywod a 2.8% o ddynion wybod eu bod wedi bod yn destun cam-drin (nad yw'n rhywiol) gan bartner; rhoes 4.1% o fenywod a 1.9% o ddynion wybod eu bod wedi cael eu stelcio;
 - f. Roedd 2% o fenywod a 0.5 % o ddynion wedi bod yn destun rhyw fath o ymosodiad rhywiol (gan gynnwys ymgais at hynny) yn y flwyddyn ddiwethaf; a
 - g. Roedd 2.2% o fenywod a 1.5% o ddynion yn destun cam-drin teuluol (nad yw'n rhywiol) yn y flwyddyn ddiwethaf.
10. Mewn adroddiad i Lywodraeth Cymru, a gomisiynwyd i lywio datblygu polisi'r Ddeddf, cafodd Robinson et al² afael ar ddata diweddaraf Arolwg Troseddu Prydain³ (2011/12), wedi'i ddadagregu ar gyfer Cymru. Yn ôl y data hwn, bu menywod yng Nghymru'n destun dwywaith lefelau 'unrhyw gam-drin domestig' (11.1% o'i gymharu â 5.1% yn achos dynion) tra oedd cyfraddau 'unrhyw ymosodiad rhywiol' hefyd yn uwch yn achos menywod (3.2%) nag yn achos dynion(0.7%). Yn ôl y data hwn hefyd dangosir bod mwy o fenywod na dynion wedi rhoi gwybod am gael eu stelcio (7.8% o'i gymharu â 3.5%).
11. Mae dwy fenyw yr wythnos yn cael eu lladd gan bartner neu gyn bartner, ac mae traean o'r rheini sydd wedi dioddef cam-drin domestig wedi ystyried hunanladdiad.⁴ Mae data Eryl y Goron ar gyfer 2012-2013⁵ yn nodi y bu 5,290 o achosion o drais domestig yng Nghymru. Cafwyd collfarn mewn 4,179 (79%) o'r rhain. Mae'r canran collfarn wedi cynyddu o 75% yn 2011-12. Mae Cynadleddau Amlasiantaeth Asesu Risg yn ymdrin â'r achosion risg uchaf i fyny o 5,074 i 5,585 yn 2013, gyda 6,715 o blant yn gysylltiedig â'r achosion hyn. O'r rhain, roedd 1,340 yn achosion ailadroddus⁶.
12. Daw 1% o'r achosion y mae'r Uned Priodasau dan Orfod yn ymdrin â nhw o Gymru⁷. Mae amcangyfrifon Foundation for Women's Health Research and

² Robinson et al., Bil arfaethedig Llywodraeth Cymru sef 'Bil Rhoi Terfyn ar Drais yn Erbyn Menywod a Cham-drin Domestig (Cymru): Argymhellion Grŵp Gorchwyl a Gorffen 2012.

³ Mae Arolwg Troseddu Prydain bellach yn Arolwg Troseddu Cymru a Lloegr (CSEW).

⁴ Y Swyddfa Gartref a CAADA (2012) A Place of Greater Safety

⁵ Chweched adroddiad blynyddol Trais yn erbyn Menywod a Merched Gwasanaeth Eryl y Goron.

⁶ Y Swyddfa Gartref a CAADA (2013)

⁷ Rhwng mis mis Ionawr a mis Rhagfyr 2011, ymdriniodd yr uned â 1,468 o achosion.

Development (FORWARD) yn dangos bod 66,000 o fenywod yn byw yng Nghymru a Lloegr wedi dioddef anffurfio organau cenhedlu benywod (FGM)⁸.

13. Er bod yr achosion hyn yn bryderus o uchel, mae'n hysbys nad oes digon o'r rheini sy'n dioddef trais ar sail rhywedd, cam-drin domestig a thrais rhywiol yn adrodd yr achosion, felly rhaid trin pob ffigur fel amcangyfrif rhy isel.
14. Mae amcangyfrifon a seilir ar boblogaeth sy'n cael eu cymhwysu i adroddiad Sylvia Walby 2009⁹ ar gostau cam-drin domestig yn awgrymu mai £303.5m yw cost cam-drin domestig i Gymru bob blwyddyn – £202.6m mewn costau gwasanaethau a £100.9m i allbwn economaidd sy'n cael ei golli. Nid yw'r ffigurau hyn yn cynnwys unrhyw elfen o gostau dynol ac emosiynol, sydd yn ôl yr ymchwil yn costio amcangyfrif o £522.9m ychwanegol i Gymru. Wrth gyfrifo'r costau dynol ac emosiynol, dilynodd Walby fethodoleg astudiaeth gan y Swyddfa Gartref sy'n edrych ar gostau trosedd¹⁰ a ddefnyddiodd amcangyfrifon yn seiliedig ar arolwg o 'fodlonrwydd i dalu' (WTP) yn achos y cyhoedd i leihau'r risg o brofi'r trallod a'r dioddef a gysylltir â throseddau sy'n amrywio yn ôl eu difrifoldeb. Mae'r amcangyfrifon WTP yn cael eu lluosu gyda nifer y troseddau er mwyn cynhyrchu'r ffigur agrededig. Mae cyfuno'r costau ariannol ac emosiynol yn rhoi cyfanswm o £826.4m. Nid yw'r ffigurau hyn yn cynnwys dulliau eraill o drais ar sail rhywedd a thrais rhywiol sydd hefyd yn arwain at gostau dynol, emosiynol ac ariannol sylweddol i gymdeithas. Ar sail costau sylweddol cam-drin domestig i'r economi mae Walby'n dadlau bod y buddsoddi ychwanegol mewn gwasanaethau cyhoeddus¹¹ i leihau trais domestig yn gost-effeithiol.

Y Cefndir o ran Polisi

15. Mae mynd i'r afael â thrais ar sail rhywedd, cam-drin domestig a thrais rhywiol yn fater cymhleth. Mae gwahanol sefydliadau yn y sector cyhoeddus yn ymwneud â'r mater ond nid oes gan unrhyw gorff penodol yng Nghymru gyfrifoldeb dros arwain ar y mater. Mae'r mater yn cael ei gymhlethu ymhellach gan y setliad datganoli presennol. O dan y setliad hwn mae gan Lywodraeth Cymru gyfrifoldeb dros rai, ond ddim dros bob un, o feysydd y Llywodraeth sy'n ymwneud â thrais a cham-drin mewn cymunedau yng Nghymru.
16. Dangosodd tystiolaeth yn Adroddiad Llywodraeth Cymru sef 10,000 o Fywydau Diogelach¹² mor bwysig yw cyfeiriad strategol ac arweinyddiaeth wrth fynd i'r afael â'r materion hyn. Yn ôl yr Adroddiad, lle'r oedd cam-drin domestig yn fater

⁸ Foundation for Women's Health Research and Development – FORWARD (Mai 2013) drwy Fwletin Ystadegol Cymorth i Ferched

⁹ Walby, S., *The Cost of Domestic Violence: Update 2009*.

¹⁰ Brand, S. and Price, R., *The Economic and Social Costs of Crime*, Home Office Research Study 217, 2000.

¹¹ Gwasanaethau a ddarperir er budd y cyhoedd yw gwasanaethau cyhoeddus. Gall hyn gynnwys gwasanaethau a ddarperir trwy'r trydydd sector, trwy fenter gymdeithasol neu drwy wasanaethau sy'n cael eu contractio allan. Nid oes diffiniad clir a chytûn o beth yn union yw'r sector cyhoeddus yng Nghymru, neu ba gyrff a gynhwysir ynddo.

¹² *Prosiect 10,000 o Fywydau Diogelach – Gwella'r ffordd y mae gwasanaethau cyhoeddus yn atal cam-drin domestig, Llywodraeth Cymru, Ebrill 2012.*

strategol i'r Bwrdd Gwasanaethau Lleol roedd wedi arwain at newidiadau effeithiol ar draws gwasanaethau'r sector cyhoeddus.

17. Adolygodd prosiect 10,000 o Fywydau Diogelwch yr hyn sy'n rhwystro gwasanaeth da rhag cael ei ddarparu i ddioddefwyr cam-drin (risg canolig a safonol¹³) yng Nghymru. Canfu'r adolygiad fod y dull o rannu gwybodaeth am ddioddefwyr cam-drin domestig risg canolig a safonol yn anghyson ledled Cymru. Nodwyd bod hyfforddiant amlasiantaeth yn arf allweddol o ran gwella gwasanaethau i ddioddefwyr cam-drin domestig risg canolig a safonol, ac unwaith eto canfu fod y ddarpariaeth yn amrywio ledled Cymru.
18. Mae dulliau llwyddiannus o fynd i'r afael â thrais ar sail rhywedd, cam-drin domestig a thrais rhywiol yn gysylltiedig ag ymatebion amlasiantaeth, gan sicrhau bod gwasanaethau ac arbenigedd asiantaethau partner yn rhan annatod o ddatblygu strategaethau lleol effeithiol. Mae astudiaethau gwerthuso o Gynadleddau Amlasiantaeth Asesu Risg (MARACs), a gafodd eu treialu gyntaf yng Nghaerdydd yn 2003, yn nodi bod MARAC (lle mae asiantaethau statudol a rhai'r trydydd sector yn rhannu gwybodaeth am ddioddefwyr cam-drin risg uchel er mwyn cynhyrchu cynllun gweithredu cydgysylltiedig i gynyddu diogelwch dioddefwyr) wedi arwain at welliannau sylweddol yn niogelwch dioddefwyr a'u plant ac yn hybu safonau gwell o ran arfer proffesiynol¹⁴.
19. Er mwyn tynnu'r gwahanol ddulliau hyn ynghyd mae angen arweinyddiaeth a chyfeiriad strategol. Ym Mhrosiect 10,000 o Fywydau Diogelach ac adroddiad Robinson cydnabuwyd bod bwlch arweinyddiaeth mewn perthynas â cham-drin domestig a materion ehangach o ran trais yn erbyn menywod a thrais rhywiol yng Nghymru. Fel y casglodd Robinson et al:

“Mae dirfawr angen arweinyddiaeth oherwydd mae tystiolaeth o arfer da ond nid oes unrhyw un ar lefel uwch i gymryd cyfrifoldeb am sefydlu hyn ledled Cymru. Mae arweinyddiaeth yn hanfodol i droi polisiâu a strategaethau yn fathau o wasanaethau a fydd yn gwneud gwahaniaeth ar lawr gwlad, drwy gynllunio effeithiol, cefnogi gweithwyr proffesiynol rheng flaen a sicrhau bod digon o adnoddau ganddynt. Mae angen arweinyddiaeth oherwydd mae llawer o'r materion yn rhai sensitif, annymunol na chânt eu dwyn i sylw gweithwyr proffesiynol rheng flaen na'r rhan fwyaf o ddinasyddion. I gloi, mae angen arweinyddiaeth oherwydd rhaid i ymrwymiad Llywodraeth Cymru yn y maes hwn, fel y nododd y fenter ddeddfwriaethol hon, arwain at raglen newid effeithiol a chynaliadwy.”

Y newidiadau y mae eu hangen i'r trefniadau presennol

20. Er mwyn sicrhau canolbwynt strategol a gwell ymateb i fynd i'r afael â materion cam-drin yn erbyn menywod (sef y math mwyaf cyffredin o drais ar sail rhywedd), cam-drin domestig, a thrais rhywiol, cyhoeddodd Llywodraeth Cymru Bapur Gwyn ym mis Tachwedd 2012¹⁵ a amlinellodd nifer o gynigion deddfwriaethol a

¹³ Mae gwasanaethau i rai a ystyrir yn risg uchel wedi'u sefydlu yng Nghymru trwy broses MARAC.

¹⁴ Robinson A. L. (2004). *Domestic Violence MARACs (Multi-Agency Risk Assessment Conferences) for Very High-Risk Victims in Cardiff: A Process and Outcome Evaluation*. Yr Ysgol Gwyddorau Cymdeithasol: Prifysgol Caerdydd.

¹⁵ Ymgynghoriad ar roi terfyn ar drais yn erbyn menywod, cam-drin domestig a thrais rhywiol (Cymru):

pholisi. Roedd y cynigion yn sail i Strategaeth Llywodraeth Cymru sef 'Strategaeth Yr Hawl i Fod yn Ddiogel'¹⁶, ac yn canolbwyntio ar yr agweddau atal, amddiffyn a chefnogi.

Nodir y newidiadau i'w gwneud gan y Ddeddf i fwrw ymlaen â rhai o'r cynigion isod.

Trais yn erbyn menywod a merched

21. I gydnabod mai menywod a merched sy'n dioddef waethaf oherwydd trais ar sail rhywedd, cam-drin domestig a thrais rhywiol, mae darpariaeth benodol yn y Ddeddf ynghylch trais yn erbyn menywod a merched.
22. Mae'n ei gwneud yn ofynnol i bersonau sy'n arfer swyddogaethau penodedig o dan y Ddeddf ystyried, ynghyd â materion perthnasol eraill, yr angen i ddileu neu leihau unrhyw ffactorau sy'n cynyddu risg trais yn erbyn menywod a merched, neu'n gwaethygu effaith trais o'r fath ar ddioddefwyr.
23. Mae hyn yn adlewyrchu cydnabyddiaeth hirdymor Llywodraeth Cymru o'r ffaith bod mwy o achosion o drais ar sail rhywedd, cam-drin domestig a thrais rhywiol yn erbyn menywod a merched, a'u bod yn dioddef waethaf o'u herwydd. Mae hefyd yn amlinellu'r ffaith bod y rhan fwyaf o drais ar sail rhywedd, cam-drin domestig a thrais rhywiol yn digwydd gan ddynion yn erbyn menywod a merched, a bod hyn yn cael ei achosi ac yn digwydd o ganlyniad i anghydraddoldeb rhwng y ddau ryw. Mae'r adran hon felly'n canolbwyntio ar drais yn erbyn menywod, gan sicrhau ar yr un pryd bod y Ddeddf yn ymestyn i ddynion a menywod sy'n dioddef trais ar sail rhywedd, cam-drin domestig a thrais rhywiol.
24. Mae'n rhaid i strategaethau lleol fod yn seiliedig ar asesiad trylwyr o anghenion, a fydd yn nodi lle mae angen gwasanaethau a chymorth gwahanol ar fenywod a dynion. Wrth baratoi a rhoi'r strategaethau hyn ar waith, bydd disgwyl i awdurdodau ganolbwyntio ar wahanol anghenion dioddefwyr, gan gydnabod bod rhywedd yn ystyriaeth bwysig y mae angen ei hadlewyrchu yn y gwasanaethau a ddarperir. Os oes tystiolaeth yn dangos bod angen gwasanaethau penodol i ddynion neu fenywod, dylid adlewyrchu hyn mewn strategaethau lleol sy'n cydnabod y gwahaniaethau yn y gwasanaethau y mae eu hangen ar y grwpiau hyn ac sy'n gymesur ag angen.

Strategaeth Genedlaethol

25. Er mwyn cydnabod pwysigrwydd arweinyddiaeth ac ymrwymiad parhaus Llywodraeth Cymru i fynd i'r afael â'r materion hyn, mae'r Ddeddf yn cynnwys darpariaeth i'w gwneud yn ofynnol i Weinidogion Cymru baratoi a chyhoeddi strategaeth i gyfrannu at gyflawni diben y Ddeddf. Diben y Ddeddf yw gwella:
 - a. trefniadau ar gyfer atal trais ar sail rhywedd, cam-drin domestig a thrais rhywiol;

<http://wales.gov.uk/consultations/people-and-communities/vawwhitepaper/?status=closed&lang=cy>

¹⁶ 'Strategaeth Yr Hawl i Fod yn Ddiogel' (2010)

<http://wales.gov.uk/topics/housingandcommunity/safety/domesticabuse/publications/besafe/?lang=cy>

- b. trefniadau ar gyfer amddiffyn dioddefwyr trais ar sail rhywedd, cam-drin domestig a thrais rhywiol;
- c. cymorth i bobl y mae trais ar sail rhywedd, cam-drin domestig a thrais rhywiol wedi effeithio arnynt.

26. Mae'r ddyletswydd hon yn ymgorffori ymrwymiad Gweinidogion Cymru i gyfrannu at gyflawni y diben hwn ar ffurf statud.

27. Mae dyletswydd ar Weinidogion Cymru i sicrhau bod yr holl bersonau y maent yn credu sy'n briodol yn cael y cyfle i wneud sylw cyn iddynt gyhoeddi'r Strategaeth Genedlaethol gyntaf, neu cyn iddynt ddiwygio'r Strategaeth Genedlaethol.

Cynghorydd Cenedlaethol

28. Cydnabyddir pwysigrwydd arweinyddiaeth yn y Ddeddf, sy'n gosod dyletswydd ar Weinidogion Cymru i benodi Cynghorydd Cenedlaethol i roi cyngor a chymorth arbenigol i Weinidogion Cymru er mwyn cyflawni dibenion y Ddeddf.

29. Mae gwneud y penodiad yn ddyletswydd statudol ar Weinidogion Cymru yn cydnabod y flaenoriaeth uchel y mae Llywodraeth Cymru yn ei rhoi ar fynd i'r afael â'r materion hyn, yn ogystal â'r angen am ymrwymiad polisi a chynllunio yn y maes hwn. Penodir y Cynghorydd Cenedlaethol yn unol â'r Cod Ymarfer ar gyfer Penodiadau gan Weinidogion i Gyrrff Cyhoeddus, a gyhoeddir gan y Comisiynydd Penodiadau Cyhoeddus.

30. Nid rôl gwas sifil yw hon, ond rôl gynghori statudol. Bydd y Cynghorydd Cenedlaethol yn gweithio ochr yn ochr â Llywodraeth Cymru i gynghori a chynorthwyo Gweinidogion Cymru wrth fynd i'r afael â'r materion hyn. Yn unol â'r Cod Ymarfer, bydd disgwyl i'r Cynghorydd Cenedlaethol gadw at egwyddorion bywyd cyhoeddus Nolan, sy'n berthnasol i bob gwas cyhoeddus.

31. Roedd cydgysylltu gwasanaethau yn lleol, monitro perfformiad, rhannu gwybodaeth a chasglu data yn rhai yn unig o blith nifer o faterion a nodwyd yn y Papur Gwyn fel materion anghyson. Er y disgwylir i rai gwasanaethau gael eu trefnu'n lleol ledled Cymru i adlewyrchu anghenion a galwadau lleol, mae'n glir bod angen hybu arferion da a safonau o ansawdd uchel. Un o elfennau gwaith y Cynghorydd Cenedlaethol fydd gweithio gyda gwasanaethu cyhoeddus ledled Cymru, ar ran Gweinidogion Cymru, i hybu arferion gorau a chefnogi'r ansawdd a'r safonau uchel y mae Llywodraeth Cymru yn gofyn amdanynt.

32. Bydd gan y Cynghorydd Cenedlaethol rôl allweddol hefyd wrth adolygu'r camau sy'n cael eu cymryd gan gyrrff y sector cyhoeddus yng Nghymru o dan y dyletswyddau a orfodir gan y Ddeddf, a hysbysu Gweinidogion Cymru am y canfyddiadau.

33. Mae'r Ddeddf hefyd yn cyfeirio at y "Cynghorydd Gweinidogol". Yn ystod craffu cyfnod 3 ar y Bil, cyflwynwyd gwelliannau i'r Bil i newid teitl y Cynghorydd o'r "Cynghorydd Gweinidogol" i'r "Cynghorydd Cenedlaethol". Diben y gwelliannau hyn oedd troi pob cyfeiriad at y "Cynghorydd Gweinidogol" i'r "Cynghorydd Cenedlaethol". Ni chytunwyd ar rai o'r gwelliannau hyn, felly mae rhai cyfeiriadau

at y “Cynghorydd Gweinidogol” o hyd. Fodd bynnag, nid yw swyddogaethau'r Cynghorydd wedi newid.

Strategaethau Lleol

34. Yn unol â'r ymrwymiad yn y Rhaglen Lywodraethu, mae'r Ddeddf yn gosod dyletswydd ar yr Awdurdodau Lleol a'r Byrddau Iechyd Lleol i baratoi a chyhoeddi Strategaethau Lleol i fynd i'r afael â thrais ar sail rhywedd, cam-drin domestig a thrais rhywiol.
35. Nid yw'r holl Gynlluniau Integredig Sengl (SIPs) a'r dadansoddiadau anghenion ategol sydd wedi'u cyhoeddi ar hyn o bryd yn mynd i'r afael â thrais ar sail rhywedd, cam-drin domestig a thrais rhywiol, gan nad oes gofyniad statudol penodol i wneud hynny. Mae hyn yn gallu golygu bod ystyriaeth lai na boddhaol yn cael ei rhoi i'r materion hyn yn y cyfnod cynllunio strategol. Mae'r mwyafrif o'r dadansoddiadau anghenion cyhoeddedig yn rhoi rhywfaint o ystyriaeth i ddigwyddiadau o gam-drin a hysbysir, er na ddefnyddir dull cyson i wneud hyn gan y defnyddir setiau data gwahanol. Mae'r ystyriaeth yn cael ei chyfyngu fel rheol hefyd i gam-drin domestig, heb fawr o ystyriaeth neu ddim ystyriaeth o gwbl i faterion ehangach trais ar sail rhywedd a thrais rhywiol. Mae'r cynlluniau presennol hefyd yn dangos nad yw ystyried y mater yn y dadansoddiad o anghenion bob amser yn arwain at eu cynnwys yn y cynllun, hyd yn oed pan nodir cynnydd mewn digwyddiadau.
36. Mae'r Ddeddf yn ceisio mynd i'r afael â'r bwlch hwn trwy ganolbwyntio'n benodol ar y materion hyn er mwyn sicrhau eu bod yn cael eu hystyried gan yr Awdurdodau Lleol a'r Byrddau Iechyd Lleol fel rhan o'r broses gynllunio strategol, er mwyn codi proffil y materion a chodi'r flaenoriaeth a roddir iddynt ar draws y sector cyhoeddus. Mae'r Ddeddf yn ei gwneud yn ofynnol i'r strategaethau ganolbwyntio ar elfennau atal, amddiffyn a chefnogi.
37. Mae'r Ddeddf yn ei gwneud yn ofynnol i'r Awdurdodau Lleol a'r Byrddau Iechyd Lleol gymryd i ystyriaeth yr asesiad diweddaraf ar gyfer ardal yr Awdurdod Lleol o dan adran 14 o Ddeddf Gwasanaethau Cymdeithasol a Llesiant (Cymru) 2014. Mae hefyd yn ei gwneud yn ofynnol i'r Awdurdodau Lleol a'r Byrddau Iechyd Lleol gymryd i ystyriaeth asesiadau strategol sy'n cael eu paratoi yn unol â rheoliadau a wneir o dan adran 6 o Ddeddf Troseddau ac Anrhefn 1998 yn ymwneud â lleihau troseddau ac anrhefn, mynd i'r afael â chamddefnyddio sylweddau a lleihau aildroseddau. Diben hyn yw sicrhau bod y dull a fabwysiedir gan yr Awdurdodau Lleol a'r Byrddau Iechyd Lleol i ddelio â'r materion hyn yn seiliedig ar dystiolaeth ac yn gymesur â'r anghenion a nodwyd.
38. Fel sy'n wir ar hyn o bryd gyda gofynion tebyg, y bwriad yw y gallai Awdurdodau Lleol a Byrddau Iechyd Lleol ddewis cyflawni'r strategaeth yn y Ddeddf hon trwy gyfrwng y broses gynllunio integredig sengl. Bwriedir iddo annog yr Awdurdodau Lleol a'r Byrddau Iechyd Lleol, trwy ganllawiau, i ymgorffori'r gofynion cynllunio a nodir yn y Ddeddf hon yn y broses gynllunio ehangach.

39. Mae dyletswydd ar Awdurdodau Lleol a Byrddau Iechyd Lleol i sicrhau bod cyfle i bersonau y maent yn credu sy'n briodol i wneud sylw cyn iddynt gyhoeddi eu Strategaeth Leol gyntaf a diwygio eu Strategaeth Leol.

Canllawiau

40. Mae'r Ddeddf yn rhoi pŵer i Weinidogion Cymru gyhoeddi canllawiau i awdurdodau perthnasol (Awdurdodau Lleol, Byrddau Iechyd Lleol, Awdurdodau Tân ac Achub ac ymddiriedolaethau'r GIG) ar sut y dylent arfer eu swyddogaethau er mwyn cyflawni diben y Ddeddf.
41. Er enghraifft, gallai'r canllawiau ei gwneud yn ofynnol i awdurdodau lleol enwebu aelod o staff i hyrwyddo materion trais ar sail rhywedd, cam-drin domestig a thrais rhywiol mewn ysgolion a lleoliadau eraill. Hefyd gallai'r canllawiau fynd i'r afael â chodi ymwybyddiaeth, trwy, er enghraifft, addysgu'r cyhoedd, y broses Gofyn a Gweithredu, comisiynu gwasanaethau, polisiâu gweithlu, hyfforddiant i staff a rhannu gwybodaeth. Nod Gofyn a Gweithredu yw darparu'r cymorth i weithwyr proffesiynol rheng flaen sy'n dod i gysylltiad rheolaidd â dioddefwyr trais ar sail rhywedd, cam-drin domestig a thrais rhywiol i ofyn i ddiodesfwyr posibl am gam-drin neu drais, o dan rai amgylchiadau. Y nod hefyd, lle bo'n briodol, yw darparu'r cymorth iddynt allu gweithredu er mwyn lleihau dioddef a niwed. Byddai angen i unrhyw ganllawiau a gyhoeddir gan Weinidogion Cymru o dan y pŵer hwn gael eu dilyn gan yr awdurdodau perthnasol. Yr unig ffordd y gallai awdurdod wyro oddi ar y canllawiau fyddai pe baent yn dod o hyd i ffordd amgen o wneud hynny. O dan amgylchiadau o'r fath byddai angen i'r awdurdod gyhoeddi manylion y dull gweithredu amgen. Pe bai Gweinidogion Cymru o'r farn ei bod yn annhebygol y byddai dull fel hwn yn cyfrannu ar gyflawni diben y Ddeddf, mae'r Ddeddf yn darparu pŵer cyfarwyddo wrth gefn i Weinidogion Cymru ei gwneud yn ofynnol i'r awdurdodau ddilyn y canllawiau.
42. Bydd y canllawiau hynny'n darparu ar gyfer rhannu arferion gorau ac yn cynorthwyo o ran hybu cysondeb a safonau o ansawdd uchel ledled Cymru. Ceir darpariaeth yn y Ddeddf sy'n ei gwneud yn ofynnol i Weinidogion Cymru ymgynghori â phersonau priodol ar ddrafft o unrhyw ganllawiau arfaethedig, neu ddiwygio ar y canllawiau. Rhaid i Weinidogion Cymru hefyd osod copi o'r canllawiau drafft gerbron y Cynulliad Cenedlaethol. Gallai'r Cynulliad benderfynu peidio â chymeradwyo'r canllawiau drafft, a byddai hynny'n atal Gweinidogion Cymru rhag cyhoeddi'r canllawiau yn y ffurf y'i gosodir gerbron y Cynulliad. Byddai Llywodraeth Cymru felly'n mynd ati i ymgynghori â'r cyhoedd, gan gynnwys cynnal asesiad effaith rheoleiddiol cyn cyhoeddi neu adolygu unrhyw ganllawiau o dan adran 15 o'r Ddeddf.

Addysg

43. Roedd ymgynghoriad y Papur Gwyn ar y cynigion polisi a deddfwriaethol yn amlinellu mesurau i wella addysg ac ymwybyddiaeth am drais yn erbyn menywod, cam-drin domestig a thrais rhywiol mewn lleoliadau addysgol. Er bod arferion cryf mewn rhai ysgolion ledled Cymru, nid oes cysondeb. Mae'r Ddeddf felly'n rhoi'r pŵer i Weinidogion Cymru wneud rheoliadau i'w gwneud yn ofynnol i

Awdurdodau Lleol adrodd ar sut maent yn mynd i'r afael â thrais ar sail rhywedd, cam-drin domestig a thrais rhywiol yn eu swyddogaethau addysg, gan gynnwys unrhyw gamau sy'n cael eu cymryd mewn ysgolion.

44. Bydd Awdurdodau Lleol, sy'n adrodd yn flynyddol ar y camau y maent yn eu cymryd, yn rhoi darlun cynhwysfawr i Lywodraeth Cymru ar y mesurau sy'n cael eu gosod ledled Cymru a'r dystiolaeth a fydd yn sylfaen i ofynion pellach yn y dyfodol.
45. Bydd yr wybodaeth hon hefyd yn cynnig tystiolaeth gadarn i'r Cynghorydd Cenedlaethol i sicrhau bod Awdurdodau Lleol yn atebol am y camau sy'n cael eu cymryd yn eu hardaloedd, a fydd yn helpu i ddatblygu a gwella arferion a Strategaethau Lleol.
46. Mae'r Ddeddf hefyd yn rhoi'r pŵer i Weinidogion Cymru a Chyngor Cyllido Addysg Uwch Cymru (CCAUC) gyhoeddi canllawiau i gyrff llywodraethu sefydliadau yng Nghymru yn y sectorau addysg bellach ac uwch. Gellir rhoi canllawiau i'r fath i'r sefydliadau ar y ffyrdd y gallant gyfrannu at gyflawni dibenion y Ddeddf, a gall y Cynghorydd Cenedlaethol hefyd roi unrhyw gymorth i Weinidogion Cymru a CCAUC wrth ddatblygu'r canllawiau.
47. Mae dyletswydd ar Weinidogion Cymru i ymgynghori â phwy bynnag sy'n berthnasol yn eu barn hwy cyn cyhoeddi ac anfon y canllawiau i gyrff llywodraethu, gan gynnwys ymgynghori â'r sefydliadau eu hunain. Gall y canllawiau amlinellu mesurau y gallai sefydliadau eu cymryd i godi ymwybyddiaeth mewn perthynas â thrais ar sail rhywedd, cam-drin domestig a thrais rhywiol, ac mae'n rhaid i sefydliadau ystyried y canllawiau a roddir iddynt.

Diben y Ddeddf a'r effaith y bwriedir iddi ei chael

48. Prif nod polisi Llywodraeth Cymru yn y maes hwn yw lleihau cyfraddau trais ar sail rhywedd, cam-drin domestig a thrais rhywiol yng Nghymru. Mae'r Ddeddf yn cefnogi'r nod hwn trwy geisio sicrhau bod y sector cyhoeddus yng Nghymru yn ymateb yn well i fynd i'r afael â'r materion hyn. Prif nodau'r Ddeddf yw gwella'r trefniadau ar gyfer:
 - a. hybu ymwybyddiaeth o drais ar sail rhywedd, cam-drin domestig a thrais rhywiol, atal hynny ac amddiffyn a chefnogi'r dioddefwyr;
 - b. cryfhau arweinyddiaeth strategol ac atebolrwydd ar gyfer trais ar sail rhywedd, cam-drin domestig a thrais rhywiol; a
 - c. gwella cysondeb, ansawdd a dilyniant o ran darparu gwasanaethau yng Nghymru.
49. Bydd y Ddeddf yn hybu ymwybyddiaeth o faterion trais ar sail rhywedd, cam-drin domestig a thrais rhywiol trwy greu swydd Cynghorydd Cenedlaethol. Nid oes rôl statudol o'r fath i gynghori ar y materion hyn yn bodoli ar hyn o bryd yn y DU; hon fyddai'r gyntaf o'i math felly.

50. Bydd y ddyletswydd ar yr Awdurdodau Lleol a'r Byrddau Iechyd Lleol i baratoi a chyhoeddi strategaeth ar y cyd yn sicrhau tryloywder ynghylch graddau'r mater hwn mewn ardal leol a'r camau a gynigir i fynd i'r afael ag ef. Mae angen hyn i godi ymwybyddiaeth ymhlith gweithwyr proffesiynol sy'n gweithio yn y sector cyhoeddus a'r cyhoedd yn gyffredinol. Mae materion megis cam-drin domestig, sy'n effeithio ar 1 ym mhob 4 o fenywod yn ystod eu hoes ac 1 ym mhob 6 o ddynion, yn aml yn faterion cudd. Er mwyn gwella'r ymateb, mae angen ymyrryd yn gynt, ac mae hyn yn ei dro'n gofyn am ganolbwynt penodol ar y materion hyn i weithio tuag at ddileu'r stigma sydd ynghlwm wrthynt trwy ddangos pwysigrwydd mynd i'r afael â'r materion hyn ar lefel genedlaethol a lleol.
51. Bydd y Cynghorydd Cenedlaethol a'r gofynion o ran y strategaeth yn cryfhau arweiniad strategol ac atebolrwydd. Bydd y gofynion o ran y strategaeth yn sicrhau bod ystyriaeth yn cael ei rhoi i'r materion fel rhan o'r broses gynllunio strategol.
52. Bydd y Ddeddf yn gwella cysondeb ac ansawdd darparu gwasanaethau yng Nghymru trwy alluogi Gweinidogion Cymru i gyhoeddi canllawiau i awdurdodau perthnasol ar y materion canlynol, ymhlith pethau eraill:
- a. y camau y gall awdurdod eu cymryd i godi ymwybyddiaeth neu newid agweddau at drais ar sail rhywedd, cam-drin domestig a thrais rhywiol, fel enwebu aelod o staff i gynorthwyo gyda rhaglen addysg y cyhoedd;
 - b. comisiynu cyngor arbenigol ar drais ar sail rhywedd, cam-drin domestig a thrais rhywiol;
 - c. o dan ba amgylchiadau y mae'n ddiogel ac yn briodol 'Gofyn a Gweithredu';
 - d. y camau priodol y dylid eu cymryd pan fydd gan rywun reswm i gredu bod trais ar sail rhywedd, cam-drin domestig a thrais rhywiol yn digwydd;
 - e. polisïau gweithle i hyrwyddo polisïau llesiant yn ymwneud â thrais ar sail rhywedd, cam-drin domestig a thrais rhywiol;
 - f. hyfforddiant ar gyfer aelodau o staff awdurdod perthnasol;
 - g. rhannu gwybodaeth rhwng awdurdodau perthnasol ac eraill; a
 - h. trefniadau cydweithredu rhwng awdurdodau perthnasol a rhwng awdurdodau perthnasol ac eraill.

Cwmpas y Ddeddf

53. Mae Llywodraeth Cymru'n cydnabod dylanwad rhywedd ar gam-drin domestig a thrais rhywiol fel y'u cyflawnir yn bennaf yn erbyn menywod a merched ac yn cydnabod bod hyn yn un o achosion anghydraddoldeb rhwng y rhywiau ac yn un o'i ganlyniadau. Er bod Llywodraeth Cymru'n cydnabod mai menywod sy'n dioddef waethaf oherwydd cam-drin a thrais o'r fath, mae wedi ymrwmo i

gefnogi pawb sy'n dioddef trais ar sail rhywedd, cam-drin domestig a thrais rhywiol.

54. Mae'r Ddeddf yn mynd i'r afael â cham-drin domestig a thrais rhywiol yn erbyn pobl yng Nghymru, ni waeth beth am ryw neu gyfeiriadedd rhywiol. Mae'r Ddeddf hefyd yn mynd i'r afael â thrais a gyflawnir yn erbyn menyw neu ddyn sy'n codi'n uniongyrchol neu'n anuniongyrchol o werthoedd, credoau neu arferion sy'n ymwneud â rhywedd neu gyfeiriadedd rhywiol.
55. Mae'r Ddeddf wedi cael ei drafftio fel nad yw'n cyfyngu ar Awdurdodau Lleol a Byrddau Iechyd wrth iddynt lunio eu strategaethau, ar Weinidogion Cymru wrth iddynt lunio eu Strategaeth Genedlaethol, nac ar y Cynghorydd Cenedlaethol wrth iddo ddatblygu ei raglen waith. Mae'n bwysig bod y diffiniadau yn y Ddeddf yn ddigon bras fel nad ydynt yn cyfyngu'n anfwriadol ar allu gwasanaethau cyhoeddus i ymateb i drais yn erbyn menywod, trais ar sail rhywedd, trais domestig a thrais rhywiol.
56. Nid oes amheuaeth y bydd y meysydd gweithredu â blaenoriaeth yn newid gydag amser, ac mae angen i ni greu Strategaethau Cenedlaethol a Lleol sy'n ddigon hyblyg i ganolbwyntio ar y materion allweddol sy'n effeithio ar Gymru ar wahanol adegau. Oherwydd y bydd y strategaethau lleol yn seiliedig ar asesiadau trylwyr o anghenion, bydd hyn yn sicrhau ffocws ar anghenion lleol ardal leol, sy'n debygol o gael mwy o effaith.
57. Mae'r diffiniad eang o gam-drin domestig yn cwmpasu camdriniaeth gan bartneriaid, cynbartneriaid ac aelodau teuluol. Mae'r diffiniad hwn yn cynnwys mathau llai cyffredin o gam-drin megis trais er anrhydedd. Mae ystod eang o ymddygiadau wedi'u cofnodi yn y diffiniadau, a fyddai'n cynnwys unrhyw fath o drais neu gam-drin sy'n ceisio dwyn gorfodaeth neu reolaeth dros ddioddefwr. Mae enghreifftiau pellach o ymddygiadau sydd wedi'u cofnodi yn y diffiniadau i'w gweld yn y Nodiadau Esboniadol isod.
58. Bydd y Ddeddf ac unrhyw ganllawiau'n ceisio cefnogi a chydategu'r gweithdrefnau diogelu sy'n bodoli eisoes ynghylch plant o dan 18 oed; ni fydd yn eu disodli.
59. Nid yw'r Ddeddf yn darparu i'r Cynghorydd Cenedlaethol ymdrin ag achosion unigol o drais ar sail rhywedd, cam-drin domestig neu drais rhywiol yng Nghymru. Mae'r rhain yn dal yn gyfrifoldeb i'r awdurdodau priodol megis yr heddlu, y gwasanaethau prawf, Gwasanaethau Eryl y Goron, a gwasanaethau diogelu oedolion a phlant a phartneriaethau statudol megis cynadleddau amlasiantaeth asesu risg a threfniadau amddiffyn y cyhoedd a Phartneriaethau Diogelwch Cymunedol.

Rychwant Tiriogaethol

60. Mae'r Ddeddf hon yn gymwys mewn perthynas â Chymru yn unig.

Risgiau

61. Y risg sydd ynghlwm wrth beidio â chyflwyno'r Ddeddf yw na lwyddir i gyflawni'r nodau a nodwyd, sef cynyddu ymwybyddiaeth, cryfhau arweinyddiaeth ac atebolrwydd, a gwella cysondeb ac ansawdd y gwasanaethau a ddarperir. Heb gyflawni'r nodau hyn, ni fydd modd cyflawni'r nod cynhwysfawr o wella ymateb y Sector Cyhoeddus yng Nghymru i drais ar sail rhywedd, cam-drin domestig a thrais rhywiol.
62. Heb y fframwaith statudol i sicrhau bod y materion hyn yn cael eu hystyried ar lefel Genedlaethol a Lleol, mae risg na fydd mynd i'r afael â'r materion hyn yn cael ei ystyried yn flaenoriaeth strategol. Yn ychwanegol, heb ddefnyddio canllawiau statudol i bennu'r fframwaith y dylid ei ddefnyddio'n sail i fynd i'r afael ag agweddau ar atal, amddiffyn a chefnogi, mae risg y bydd yr anghysondebau presennol o ran ansawdd ac ymateb i'r gwasanaeth yn parhau.

Cynllun gweithredu a chyflawni

63. Cynhwysir prif elfennau'r ddeddfwriaeth hon ar wyneb y Ddeddf. Mae darpariaeth yn y Ddeddf i Weinidogion Cymru gyhoeddi canllawiau statudol i gefnogi rhoi'r cynigion hyn ar waith.
64. Mae Gweinidogion Cymru yn bwriadu cyhoeddi canllawiau i helpu'r awdurdodau perthnasol i fodloni gofynion y Ddeddf. Bydd y canllawiau, er enghraifft, yn helpu i gyflawni'r strategaethau lleol y mae eu hangen trwy ddarparu cyngor ac arferion gorau ar gydweithredu amlasiantaeth effeithiol a rhannu gwybodaeth, polisiau gweithle, comisiynu gwasanaethau a darparu hyfforddiant trwy'r Fframwaith Hyfforddi Cenedlaethol.
65. Ar yr amod y bydd y Ddeddf yn cael ei chymeradwyo gan y Cynulliad Cenedlaethol ac yn cael y Cydsyniad Brenhinol wedi hynny, fe gaiff ei roi ar waith yn raddol. Cynigir y daw'r darpariaethau canlynol i rym y diwrnod y rhoddir y Cydsyniad Brenhinol:
- adran 1; a
 - adrannau 24 i 26.
66. Bwriedir wedyn i adrannau 14 i 21 ddod i rym ddau fis ar ôl i'r Ddeddf gael y Cydsyniad Brenhinol.
67. Daw'r darpariaethau sy'n weddill i rym wedi hynny trwy gyfrwng gorchymyn a wneir gan offeryn statudol.
68. Mae'r cerrig milltir a ragwelir fel a ganlyn:

Hysbyseb am Gynghorydd Cenedlaethol – Gwanwyn 2015
Penodi Cynghorydd Cenedlaethol – Haf 2015
Cyhoeddi Strategaeth Genedlaethol – Gwanwyn 2016

4. Ymgynghori

69. Ymgynghorodd Llywodraeth Cymru ar y Papur Gwyn i roi terfyn ar drais yn erbyn menywod (sef y math mwyaf cyffredin o drais ar sail rhywedd), cam-drin domestig a thrais rhywiol rhwng 26 Tachwedd 2012 a 22 Chwefror 2013. Yn ogystal cynhaliwyd wyth o ddigwyddiadau ymgynghori ledled Cymru y bu aelodau o'r cyhoedd a rhanddeiliaid yn rhan ohonynt. Cafodd digwyddiad penodol i bobl ifanc (14-15 oed) ei drefnu hefyd mewn partneriaeth â'r Gymdeithas Genedlaethol er Atal Creulondeb i Blant. Mae copi o'r Papur Gwyn ynghyd â chrynodeb o'r ymatebion ar gael yn:

<http://wales.gov.uk/consultations/people-and-communities/vawwhitepaper/?skip=1&lang=cy>

70. Gwahoddodd y Papur Gwyn sylwadau am nifer o gynigion polisi a deddfwriaethol. Daeth cyfanswm o 147 o ymatebion i law, a hynny o'r mathau o sefydliadau isod:

Cyrff y trydydd sector	52
Unigolion	23
Gweithwyr proffesiynol unigol o'r sector	23
Cyrff y sector cyhoeddus	20
Buddiannau gwleidyddol	10
Cyrff proffesiynol	8
Fforymau amlasiantaeth	5
Grwpiau crefyddol	3
Swyddfeydd Comisiynwyr	3
Cyfanswm	147

71. Cafwyd ymateb cadarnhaol i'r ymatebion yn y Papur Gwyn. Er hynny, ni fwriedir bwrw ymlaen â'r holl gynigion a drafodir yn y Papur Gwyn o fewn y Ddeddf hon.

72. Mae'r adran isod yn amlinellu'r cynigion yn y Papur Gwyn sydd heb gael eu cynnwys yn y Ddeddf:

- **Cynnig yn ymwneud ag addysg perthnasoedd iach gan ddefnyddio dull ysgol gyfan**

73. Yn yr ymatebion i'r ymgynghoriad roedd cefnogaeth eang iawn i'r cynigion yn y Papur Gwyn. Cafwyd cefnogaeth sylweddol hefyd o blaid gwneud gwersi am berthnasoedd iach yn orfodol trwy gyfrwng y cwricwlwm. Ar 25 Chwefror 2015, cyhoeddwyd adroddiad yr Athro Graham Donaldson, *Dyfodol Llwyddiannus*, sy'n adolygu trefniadau'r cwricwlwm ac asesu yng Nghymru. Mae'r Athro Donaldson yn awgrymu y dylid strwythuro'r cwricwlwm newydd o amgylch chwe Maes Dysgu a Phrofiad – un o'r rhain fyddai lechyd a Lles. Dyma lle byddai perthnasoedd iach yn gorwedd. Mae Sgwrs Fawr yn cael ei chynnal ar argymhellion yr adroddiad ar hyn o bryd, a bydd sylwadau penodol gan y sector Trais yn erbyn Menywod, Cam-drin Domestig a Thrais Rhywiol yn cyfrannu at ddatblygu'r cynigion.

74. Yn ogystal â'r ddarpariaeth benodol yn y Ddeddf ynghylch pwerau Gweinidogion Cymru i wneud rheoliadau sy'n ei gwneud yn ofynnol i Awdurdodau Lleol gyhoeddi gwybodaeth am y camau a gymerir o dan eu swyddogaethau addysg sy'n cyfrannu at ddiben y Ddeddf (gweler paragraff 42 uchod) a'r canllawiau statudol mewn perthynas â dull gweithredu addysg gyfan, gan gynnwys mewn perthynas â hyrwyddwyr, i'w cyhoeddi o dan adran 15, ceir mesurau ategol hefyd i sicrhau bod ysgolion yn ymgorffori trais yn erbyn menywod, trais ar sail rhywedd cam-drin domestig a thrais rhywiol yn fwy cyffredinol:

- a. Mae Hafan Cymru wedi cael cyllid ychwanegol i ymestyn y Rhaglen Ysgolion Sbectrwm Cenedlaethol. Dechreuwyd cyflwyno'r Rhaglen Genedlaethol ddiwedd haf 2014. Recriwtiwyd Swyddogion Cyswllt Ysgolion, Rheolwr Cyswllt Ysgolion a Chynorthwy-ydd Gweinyddol ar gyfer y Prosiect. Rhwng mis Mawrth 2014 a mis Ebrill 2015, cyflwynwyd sesiynau Sbectrwm i fwy nag 16,000 o blant a mwy na 1,300 o oedolion mewn 121 o ysgolion cynradd ac uwchradd ledled Cymru. Mae cyllid hefyd wedi parhau i gefnogi plant yn y gymuned drwy'r prosiect Mae Plant yn Bwysig gan Cymorth i Ferched Cymru.
- b. Mae'r Adran Addysg a Sgiliau wedi adolygu ei chanllawiau statudol *Cadw Dysgwyr yn Ddiogel*. Cyhoeddwyd y canllawiau hyn ar 14 Ionawr ac maent yn cynnwys adran llawer mwy trylwyr ar drais ar sail rhywedd, cam-drin domestig a thrais rhywiol, yn ogystal â FGM a phriodasau dan orfod. Mae'n cryfhau rôl Uwch Swyddogion Dynodedig ar gyfer Diogelu Plant ar y materion hyn.
- c. Cynigir adolygiad thematig o addysg perthnasoedd iach yn ystod blwyddyn academaidd 2016-17; erbyn hynny bydd cyfle i'r diwygiadau presennol fwrw'u gwreiddiau.
- d. Bydd hyfforddiant yn cael ei gynnig i bob ysgol drwy'r Fframwaith Hyfforddi Cenedlaethol i sicrhau:
 - i. bod llywodraethwyr ysgol a phob aelod o staff yn ymwybodol o drais ar sail rhywedd, cam-drin domestig a thrais rhywiol, a'u bod yn gwybod sut i gael cymorth ar gyfer plant a phobl ifanc, eu hunain neu eu cydweithwyr a allai fod yn ddioddefwyr (lefel 1);
 - ii. bod cyfran o staff mewn ysgolion yn gallu gweithredu ar ôl cydnabod y dangosyddion a'u bod yn ymateb i bobl ifanc yn effeithiol, gan gynnwys rhoi mynediad effeithlon i asesu risg, cynllunio diogelwch a chymorth (lefel 2);
 - iii. bod o leiaf un aelod o staff ym mhob ysgol a all helpu staff i ymdrin ag achosion anodd, cynnid gwybodaeth a chymorth uwch i blant a phobl ifanc a hybu ymwybyddiaeth well o drais ar sail rhywedd, cam-drin domestig a thrais rhywiol mewn lleoliadau addysg (lefel 3).

- e. Mae Llywodraeth Cymru hefyd yn ystyried cyhoeddi *Canllaw Arferion Gorau Addysg Gyfan* cyn blwyddyn academiaidd 2015-16. Bydd hyn yn arddangos yr arferion rhagorol sydd i'w gweld ledled Cymru. Bydd hefyd yn cefnogi ac yn annog yr ysgolion hynny lle rydym yn gwybod bod angen iddynt wneud mwy drwy ddysgu gan eraill. Mae Cymorth i Ferched Cymru yn datblygu'r gwaith ar y Canllaw hwn a bydd yn ymgynghori'n helaeth ar ei gynnwys.

- **Cynigion sy'n ymwneud â llety diogel**

- 75. Yn ôl y dystiolaeth, dros y 5 mlynedd diwethaf, derbynnir bod rhyw 880 o aelwydydd yn ddigartref bob blwyddyn lle'r prif reswm dros golli cartref yw methiant perthynas, a hynny o dan amgylchiadau treisgar. Mae hyn yn cyfrif am ryw 15 y cant o'r holl aelwydydd a gydnabyddir yn aelwydydd digartref¹⁷.
- 76. Cydnabu'r Papur Gwyn bwysigrwydd darparu rhychwant o ddewisiadau llety diogel, yn sgil asesiad o risg a'r dewis o ddefnyddiwr y gwasanaeth. Mae'r gwaith hwn yn cael ei ystyried ymhellach yng ngoleuni'r newidiadau sy'n cael eu gwneud o ganlyniad i Ddeddf Tai (Cymru) 2014. Lle mae person yn ddigartref neu o dan fygythiad o fod yn ddigartref mae'r Ddeddf yn cynnig y bydd yn ddyletswydd ar yr Awdurdod Lleol i gymryd camau rhesymol i atal neu liniaru digartrefedd. Yn ychwanegol at y dyletswyddau hyn, bydd yn ddyletswydd hefyd ar yr awdurdodau lleol i ddarparu gwybodaeth a chyngor am atal digartrefedd, sicrhau llety pan fydd unigolyn yn ddigartref a chael mynediad i unrhyw gymorth arall sydd ar gael.
- 77. Os byddai person y mae plentyn dibynnol yn preswyllo gydag ef neu y gellid disgwyl yn rhesymol iddo breswyllo gydag ef, byddai'n ddyletswydd ar yr Awdurdod Lleol i ddod o hyd i lety dros dro wrth gyflawni unrhyw ddyletswyddau o dan Ddeddf Tai (Cymru) 2014 newydd mewn perthynas â digartrefedd.
- 78. Mae Deddf Rhentu Cartrefi (Cymru), a gyflwynwyd gerbron y Cynulliad ar 9 Chwefror 2015, yn darparu ar gyfer 'cyfnod ymddygiad gwaharddedig' i'w gynnwys ym mhob contract rhentu ar gyfer tai. Ar y cyd â dull mwy hyblyg o ymdrin â chyd-denantiaethau, bydd yn hyn yn galluogi cyflawnwyr cam-drin domestig i gael eu troi allan tra'n gadael y dioddefwr ac unrhyw blant i aros yn eu cartref.

¹⁷ <http://wales.gov.uk/statistics-and-research/homelessness/?lang=cy>

5. Y pŵer i wneud is-ddeddfwriaeth

79. Mae Deddf Trais yn erbyn Menywod, Cam-drin Domestig a Thrais Rhywiol (Cymru) 2015 yn cynnwys darpariaethau i wneud is-ddeddfwriaeth. Mae'r tabl isod yn dangos, mewn perthynas â phob darpariaeth:

- a. yr unigolyn neu'r corff y rhoddir y pŵer iddo;
- b. ar ba ffurf y caiff y pŵer ei arfer;
- c. priodoldeb y pŵer dirprwyedig;
- d. y weithdrefn a gymhwysir (cadarnhaol, negyddol, dim gweithdrefn), os oes un.

Crynodeb o'r pwerau i wneud is-ddeddfwriaeth

Adran	I bwy y rhoddir y pŵer	Ffurf	Priodoldeb y pŵer dirprwyedig	Gweithdrefn	Rheswm dros y weithdrefn
Adran 6(3)(b)	Gweinidogion Cymru	Cyfarwyddyd	Yn rhoi hyblygrwydd i Weinidogion Cymru gyfarwyddo awdurdodau lleol a Byrddau Iechyd Lleol i adolygu eu strategaeth os bydd amgylchiadau'n awgrymu y dylid cynnal adolygiad, er enghraifft, os bydd Gweinidogion Cymru'n penderfynu adolygu'r Strategaeth Genedlaethol.	Ddim gweithdrefn statudol.	Yn ymwneud ag adolygu strategaethau lleol ac felly fe allai'r amgylchiadau lle câi'r cyfarwyddyd ei ddefnyddio newid o bryd i'w gilydd. Felly, nid eos unrhyw weithdrefn statudol yn rhoi'r hyblygrwydd i Weinidogion Cymru ymateb yn gyflym i newidiadau mewn amgylchiadau gan sicrhau bod strategaethau'n cael eu hadolygu'n amserol ar lefel leol.
Adran 7(2)	Gweinidogion Cymru	Rheoliadau	Yn rhoi hyblygrwydd i Weinidogion Cymru i bennu gwybodaeth ychwanegol neu asesiadau pellach sy'n gorfod cael eu cymryd i ystyriaeth wrth baratoi strategaethau lleol.	Negyddol	Yn pennu manylion technegol a allai newid o bryd i'w gilydd.
Adran 9(2) Yn mewnosod adran 29 (6A) newydd yn Neddf Addysg 1996	Gweinidogion Cymru	Rheoliadau	Yn rhoi'r hyblygrwydd i Weinidogion Cymru gyfarwyddo awdurdodau lleol ynghylch y math o wybodaeth y dylid ei chyhoeddi am y ddarpariaeth addysg sy'n hyrwyddo dibenion	Negyddol	Drwy rinwedd adran 569 o Ddeddf Addysg 1996, mae'r rheoliadau o dan adran 29 yn destun y weithdrefn negyddol. Mae cymhwyso'r weithdrefn

			y Ddeddf, a pha mor aml.		negyddol i'r rheoliadau hyn yn sicrhau cysondeb wrth wneud rheoliadau o dan adran 29 o Ddeddf Addysg 1996.
Adran 15(1)	Gweinidogion Cymru	Canllawiau	Addas ar gyfer canllawiau gan ei fod yn galluogi Gweinidogion Cymru i roi gwybodaeth gyfoes i'r awdurdodau perthnasol am arferion gorau a sut y dylai awdurdod arfer ei swyddogaethau i gyfrannu at yr amcanion cynhwysfawr a nodir yn y Ddeddf. Mae canllawiau'n cynnig hyblygrwydd gan y gallai fod angen eu diweddarau yn rheolaidd.	Y weithdrefn fel y'i nodir yn adran 16 y Ddeddf (Ymgynghori a Gweithdrefnau Cynulliad Cenedlaethol Cymru). Mae'n ofynnol i Weinidogion Cymru ymgynghori ar y canllawiau drafft, a gosod canllawiau drafft gerbron y Cynulliad. Mae'n bosibl na chyhoeddir y canllawiau os bydd y Cynulliad yn penderfynu peidio â chymeradwyo'r drafft.	Y gofyniad ar gyfer ymgynghori yw sicrhau bod safbwyntiau'r rhai y mae'r canllawiau'n effeithio arnynt yn cael eu cymryd i ystyriaeth yn llawn. Mae'r gofyniad i osod y canllawiau drafft gerbron y Cynulliad Cenedlaethol ac i gael cymeradwyaeth yn cynnig cyfle i graffu.
Adran 19(2)	Gweinidogion Cymru	Cyfarwyddiadau	Bydd y pŵer cyfarwyddyd hwn yn gymwys i rai awdurdodau a chaiff ei wneud mewn amgylchiadau penodol a fydd yn ei gwneud yn ofynnol i Weinidogion Cymru ymateb yn gyflym pan fo angen iddynt wneud hynny.	Dim gweithdrefn statudol	Yn rhoi hyblygrwydd i Weinidogion Cymru ymateb yn gyflym i sicrhau cydymffurfiaid â chanllawiau a roddir o dan adran 15.
Adran 25(3)	Gweinidogion Cymru	Gorchymyn	Addas am Orchymyn gan fod y ddarpariaeth yn ymwneud â dyddiad dod i rym i'w benderfynu gan Weinidogion Cymru	Dim gweithdrefn statudol	Caiff y gorchymynion hyn eu cyfyngu i gychwyn ac maent yn dechnegol eu natur.

6. Aseiad Effaith Rheoleiddiol

80. Mae Aseiad Effaith Rheoleiddiol wedi cael ei baratoi yn unol â Rheol Sefydlog 26.6 (vi) fel y'i hamgaeir yn Rhan 2.

RHAN 2 – ASESIAID EFFAITH RHEOLEIDDIOL

7. Opsiynau

81. Caiff yr asesiad effaith rheoleiddiol hwn ei lunio o amgylch pob elfen o'r Ddeddf, fel a ganlyn:

- A. Y Ddyletswydd i Baratoi Strategaethau Cenedlaethol ac Adrodd arnynt;
- B. Y Ddyletswydd i Baratoi Strategaethau Lleol ac Adrodd arnynt;
- C. Y Pŵer i wneud Rheoliadau o dan Ddeddf Addysg 1996;
- D. Y Pŵer i Gyhoeddi Canllawiau Statudol a'r Ddyletswydd i Ddilyn Canllawiau o'r Fath;
- E. Penodi Cynghorydd Cenedlaethol.

82. Ystyriwyd nifer o opsiynau ar gyfer cyflawni'r nodau polisi sy'n sail i bob un o brif elfennau'r Ddeddf. Nodir yr opsiynau isod. Mae pob un o'r opsiynau wedi cael eu hystyried o ran y graddau y byddent yn cyflawni amcanion polisi Llywodraeth Cymru. Eglurir costau a manteision pob un o'r opsiynau ym Mhennod 8 o'r Memorandwm Esboniadol hwn.

A. Y Ddyletswydd i Baratoi ac Adrodd ar Strategaethau Cenedlaethol

Opsiw 1 – Gwneud Dim / Parhau i Ddefnyddio Strategaethau Presennol

83. Nid yw gwneud dim yn opsiwn y gellir ei ddefnyddio oherwydd cyhoeddwyd yr adroddiad terfynol ar gyfer y Strategaeth Genedlaethol bresennol 'Yr Hawl i fod yn Ddiogel' ym mis Mehefin 2014. O'r herwydd, ni fyddai Strategaeth Genedlaethol gyffredinol ar waith wedyn pe byddai'r opsiwn hwn yn cael ei ddilyn.

Opsiw 2 – Cynhyrchu Strategaeth Genedlaethol nad yw'n Ddeddfwriaethol

84. Byddai'r opsiwn hwn yn golygu llunio Strategaeth Genedlaethol newydd, y tu allan i gwmpas deddfwriaeth, i gymryd lle'r strategaethau presennol.

Opsiw 3 - Cyflwyno Bil Cynulliad i Ymdrin â'r Amcanion Polisi

85. Mae'r opsiwn hwn yn golygu cynnwys darpariaeth yn y Ddeddf ar gyfer gosod dyletswydd benodol ar Weinidogion Cymru i baratoi a datblygu Strategaethau Cenedlaethol i fynd i'r afael â thrais ar sail rhywedd, cam-drin domestig a thrais rhywiol drwy eu hatal, a thrwy amddiffyn a chefnogi dioddefwyr.

86. Byddai'r opsiwn hwn yn ei gwneud yn ofynnol bod Gweinidogion Cymru yn adolygu'r Strategaeth Genedlaethol o fewn chwe mis ar ôl etholiad cyffredinol yn achos y Cynulliad Cenedlaethol ac ar unrhyw adeg arall.

B. Y Ddyletswydd i Baratoi ac Adrodd ar Strategaethau Lleol

Opsiwn 1 – Gwneud Dim

87. Ystyr gwneud dim yn yr achos hwn yw peidio â gosod dyletswydd benodol ar Awdurdodau Lleol a Byrddau Iechyd Lleol i baratoi, cyhoeddi ac adrodd ar Strategaethau Lleol i fynd i'r afael â thrais ar sail rhywedd, cam-drin domestig a thrais rhywiol.
88. Mae rhai Awdurdodau Lleol wedi cynnwys camau gweithredu i fynd i'r afael â cham-drin domestig yn eu Cynlluniau Integredig Sengl (CISau) presennol. Fodd bynnag, o'r CISau a'r dadansoddiadau o anghenion sy'n eu hategu a gyhoeddwyd hyd yn hyn, nid yw pob un ohonynt yn ymdrin â materion trais ar sail rhywedd, cam-drin domestig a thrais rhywiol, gan nad oes gofyniad statudol penodol i wneud hynny.

Opsiwn 2 - Defnyddio Deddfwriaeth Bresennol i Gyflwyno Newid

89. Opsiwn arall yw peidio â chynnwys darpariaeth benodol ar gyfer Strategaethau Lleol yn y Ddeddf hon ond, yn hytrach, defnyddio deddfwriaeth bresennol i'w gwneud yn ofynnol bod Awdurdodau Lleol a Byrddau Iechyd Lleol yn pennu amcanion sy'n ymwneud â thrais ar sail rhywedd, cam-drin domestig a thrais rhywiol. Byddai hyn yn golygu defnyddio nifer o'r mecanweithiau presennol mewn deddfwriaeth i geisio cyflawni'r bwriad polisi hwn.
90. Mae'r rhain yn cynnwys ymchwilio i'r posibilrwydd o wneud rheoliadau ar y cyd â Llywodraeth y DU o dan adran 6 o Ddeddf Trosedd ac Anhrefn 1998 mewn perthynas â lleihau troseddau ac aildroseddau. Mae adran 6 yn ei gwneud yn ofynnol bod cyrff cyhoeddus penodedig yn paratoi strategaeth er mwyn gostwng troseddau ac anhrefn, mynd i'r afael â chamddefnydd o gyffuriau, alcohol ac unrhyw sylweddau eraill a gostwng aildroseddau. Mae'r materion penodol sydd i gael sylw mewn strategaethau troseddau ac anhrefn yn cael eu rhagnodi mewn rheoliadau. Gellir pennu mewn rheoliadau'r amcanion sydd i gael sylw mewn strategaeth a thargedau perfformiad ar gyfer yr amcanion hynny gan gynnwys lleihau trosedd neu anhrefn penodol. Felly, gellid darparu mewn rheoliadau fod rhaid i strategaethau troseddau ac anhrefn roi sylw yn benodol i droseddau sy'n gysylltiedig â thrais ar sail rhywedd, cam-drin domestig a thrais rhywiol fel materion y mae rhaid i strategaethau fynd i'r afael â hwy.
91. Gallai'r opsiwn hwn hefyd olygu gwneud rheoliadau o dan adran 40 o Ddeddf y Gwasanaeth Iechyd Gwladol (Cymru) 2006. Mae adran 40 yn ei gwneud yn ofynnol bod Awdurdodau Lleol a Byrddau Iechyd Lleol yn cydweithio i lunio a chyflawni strategaeth ar gyfer iechyd a lles y bobl yn eu hardal. Gall y rheoliadau hyn ddarparu ar gyfer materion penodol y mae rhaid i strategaethau fynd i'r afael â hwy ac felly yn yr un modd â strategaethau troseddau ac anhrefn, gellid ail-wneud y rheoliadau fel eu bod yn cyfeirio'n benodol at drais ar sail rhywedd, cam-drin domestig a thrais rhywiol.
92. Yn ogystal â'r rheoliadau newydd, gallai'r opsiwn hwn ddibynnu hefyd ar adran 14 o Ddeddf Gwasanaethau Cymdeithasol a Llesiant (Cymru) 2014, sy'n gosod

dyletswydd ar Awdurdodau Lleol i ddarparu ar gyfer ystod a lefel o wasanaethau at nifer o ddibenion gan gynnwys i gyfrannu at atal neu oedi datblygiad anghenion pobl am ofal a chymorth, lleihau'r anghenion am ofal a chymorth ac atal pobl rhag dioddef gan gamdriniaeth neu esgeulustod. Mae hefyd yn ei gwneud yn ofynnol bod Byrddau Iechyd Lleol yn rhoi sylw i bwysigrwydd gwasanaethau ataliol o'r fath wrth arfer eu swyddogaethau. Felly byddai'r ddarpariaeth yn gallu arwain at Awdurdodau Lleol a Byrddau Iechyd Lleol yn darparu gwell gwasanaethau gan geisio atal trais ar sail rhywedd, cam-drin domestig a thrais rhywiol.

Opsiwn 3 - Cyflwyno Bil Cynulliad i Ymdrin â'r Amcanion Polisi

93. Mae'r Ddeddf yn ffordd o ganolbwyntio ar y materion hyn. Mae'n rhoi'r gallu i osod dyletswydd benodol ar Awdurdodau Lleol a Byrddau Iechyd Lleol i baratoi a chyhoeddi Strategaethau Lleol sy'n disgrifio sut y maent yn bwriadu gwella'r trefniadau ar gyfer ymdrin â materion sy'n ymwneud â thrais ar sail rhywedd, cam-drin domestig a thrais rhywiol drwy gamau i'w atal ac i amddiffyn a chefnogi dioddefwyr. Mae hefyd yn rhoi'r ddarpariaeth i fynnu eu bod yn adrodd yn flynyddol ar y cynnydd ar y strategaethau.

C. Pŵer i wneud Rheoliadau o dan Ddeddf Addysg 1996

Opsiwn 1 – Gwneud Dim

94. Byddai'r opsiwn hwn yn golygu na fyddai gan Lywodraeth Cymru y pŵer i'w gwneud yn ofynnol i Awdurdodau Lleol, drwy reoliadau, gyhoeddi gwybodaeth ar sut maent yn mynd i'r afael â'r materion hyn yn eu swyddogaethau addysgol, gan gynnwys ysgolion. Er bod arferion cryf mewn rhai ysgolion ledled Cymru, nid oes cysondeb. Felly, byddai'r opsiwn hwn yn rhoi darlun cynhwysfawr i Lywodraeth Cymru o'r ymyriadau sy'n digwydd ledled Cymru a thystiolaeth a fyddai'n sylfaen i ofynion pellach yn y dyfodol.

Opsiwn 2 – Rhoi'r pŵer i Weinidogion Cymru wneud rheoliadau yn ei gwneud yn ofynnol i Awdurdodau Lleol lunio adroddiad blynyddol ar weithgarwch addysgol yn eu hardaloedd

95. Mae'r opsiwn hwn yn golygu diwygio Deddf Addysg 1996 i ganiatáu i Weinidogion Cymru wneud rheoliadau yn ei gwneud yn ofynnol i Awdurdodau Lleol gyhoeddi gwybodaeth ar sut maent yn mynd i'r afael â'r materion hyn yn eu swyddogaethau addysgol, gan gynnwys ysgolion. Bydd yr opsiwn hwn yn rhoi darlun cynhwysfawr i Weinidogion Cymru a'r Cynghorydd Cenedlaethol o'r ymyriadau sy'n digwydd ledled Cymru a thystiolaeth a fyddai'n sylfaen i ofynion pellach yn y dyfodol.

D. Y Pŵer i Gyhoeddi Canllawiau Statudol a'r Ddyletswydd i Ddilyn Canllawiau o'r Fath

Opsiwn 1 – Gwneud Dim

96. Byddai'r opsiwn hwn yn golygu na fyddai Llywodraeth Cymru yn rhoi unrhyw ganllawiau i Awdurdodau Lleol a Byrddau Iechyd Lleol ynghylch atal trais ar sail rhywedd, cam-drin domestig a thrais rhywiol, nac ynghylch amddiffyn a chefnogi dioddefwyr. Ni fyddai'r opsiwn hwn yn rhoi cyfle i Lywodraeth Cymru rannu'r arferion gorau na hyrwyddo darpariaeth o wasanaethau o ansawdd uchel cyson ledled Cymru. O dan yr opsiwn hwn, mater i bob Awdurdod Lleol a Bwrdd Iechyd Lleol fyddai penderfynu drosto'i hun ar y ffordd orau o gyflawni'r amcanion o atal, amddiffyn a chefnogi.

Opsiwn 2 – Defnyddio Canllawiau Anstatudol i Gyflwyno Newid

97. Dan yr opsiwn hwn, byddai Llywodraeth Cymru yn cyhoeddi canllawiau anstatudol i Awdurdodau Lleol a Byrddau Iechyd Lleol ynghylch atal trais ar sail rhywedd, cam-drin domestig a thrais rhywiol, ac amddiffyn a chefnogi dioddefwyr. Mae'r opsiwn hwn yn rhoi cyfle i Lywodraeth Cymru rannu'r arferion gorau a hyrwyddo darpariaeth o wasanaethau o ansawdd uchel cyson. O dan yr opsiwn hwn, byddai Awdurdodau Lleol a Byrddau Iechyd Lleol yn cael eu cymell i ddilyn y canllawiau a gyhoeddwyd gan Lywodraeth Cymru, ond ni ellid eu gorfodi i'w dilyn. Felly byddai Awdurdod Lleol neu Fwrdd Iechyd Lleol yn gallu dewis anwybyddu'r canllawiau'n llwyr.

98. Dan yr opsiwn hwn, gallai'r canllawiau, ymysg pethau eraill, roi sylw i godi ymwybyddiaeth er enghraifft drwy addysg gyhoeddus, y broses Gofyn a Gweithredu, hyfforddiant ar gyfer staff, fforymau amlasiantaeth, a rhannu gwybodaeth. Nod y broses Gofyn a Gweithredu yw darparu'r cymorth i annog gweithwyr proffesiynol rheng flaen sy'n dod i gysylltiad yn rheolaidd â dioddefwyr trais ar sail rhywedd, cam-drin domestig a thrais rhywiol i holi dioddefwyr posibl am gam-drin neu drais mewn amgylchiadau penodol, a lle bo'n briodol, gweithredu er mwyn lleihau'r dioddefaint a'r niwed. Mae rhannu gwybodaeth yn ymwneud ag annog rhannu gwybodaeth yn ddiogel ac yn gyfreithlon am y sawl sy'n cael eu cam-drin ac sy'n dioddef trais er mwyn sicrhau bod camau priodol yn cael eu cymryd er mwyn lleihau dioddefaint a niwed.

Opsiwn 3 – Darparu pŵer i Weinidogion Cymru i gyhoeddi canllawiau a gofyniad bod cyrff penodedig yn eu dilyn

99. Mae'r opsiwn hwn yn golygu rhoi pŵer i Weinidogion Cymru i gyhoeddi canllawiau i awdurdodau perthnasol¹⁸ i hyrwyddo'r diben o atal, amddiffyn a chefnogi. O dan yr opsiwn hwn, byddai'r canllawiau'n gallu rhoi sylw, ymysg pethau eraill, i hybu ymwybyddiaeth, er enghraifft drwy addysg gyhoeddus, y broses Gofyn a Gweithredu, hyfforddiant i staff, fforymau amlasiantaeth a rhannu gwybodaeth.

100. Mae'r opsiwn hwn yn golygu y byddai'r awdurdodau penodedig yn gorfod dilyn unrhyw ganllawiau y mae Gweinidogion Cymru yn eu cyhoeddi o dan y pŵer hwn. Gallai'r awdurdodau hyn wyro oddi wrth y canllawiau os oeddent wedi

¹⁸ Awdurdodau Lleol, Byrddau Iechyd Lleol, Awdurdodau Tân ac Achub ac Ymddiriedolaethau'r GIG.

pennu ffordd arall o gyflawni'r amcanion. Mewn amgylchiadau o'r fath, byddai'n rhaid i'r awdurdod gyhoeddi manylion y dull amgen o weithredu. Pe na byddai Gweinidogion Cymru yn cael eu hargyhoeddi bod y dull o weithredu a gyhoeddwyd yn un mor effeithiol â'r dull sydd wedi'i bennu yn y canllawiau a gyhoeddwyd gan Weinidogion Cymru, mae pŵer cyfarwyddo wrth gefn ar gael i Weinidogion Cymru o dan yr opsiwn hwn i fynnu bod awdurdodau'n dilyn y canllawiau. Gallai canllawiau o'r fath ei gwneud yn ofynnol i'r awdurdodau perthnasol rannu'r arferion gorau a helpu i hyrwyddo cysondeb a safonau ansawdd uchel ledled Cymru.

E. Penodi Cynghorydd Cenedlaethol – gan gynnwys y Swyddogaethau, Cynlluniau a Threfniadau Adrodd.

Opsiwn 1 – Gwneud Dim

101. O dan yr opsiwn hwn, ni fyddai rôl arwain benodol yn cael ei chreu i helpu i gyflawni'r amcanion o atal trais ar sail rhywedd, cam-drin domestig a thrais rhywiol ac amddiffyn a chefnogi dioddefwyr.

Opsiwn 2 – Cyflwyno Bil Cynulliad i Benodi Comisiynydd

102. Byddai'r opsiwn hwn yn darparu ar gyfer creu a phenodi Comisiynydd i ystyried materion sy'n ymwneud â thrais ar sail rhywedd, cam-drin domestig a thrais rhywiol. O dan yr opsiwn hwn, byddai angen creu swyddfa i gynorthwyo Comisiynydd annibynnol, gan nad yw strwythur o'r fath yn bodoli ar hyn o bryd. Yn yr un modd ag opsiwn 3, byddai angen deddfwriaeth i greu endid o'r fath.

Opsiwn 3 – Cyflwyno Bil Cynulliad i osod dyletswydd ar Weinidogion Cymru i benodi Cynghorydd Cenedlaethol

103. Mae'r opsiwn hwn yn golygu creu rôl gynghorol statudol 'Cynghorydd Cenedlaethol' i ystyried materion sy'n ymwneud â thrais ar sail rhywedd, cam-drin domestig a thrais rhywiol. O dan yr opsiwn hwn, nid oes angen swyddfa i gynorthwyo'r Cynghorydd Cenedlaethol, gan y byddai'n gweithio ochr yn ochr â'r strwythurau swyddogol presennol yn Llywodraeth Cymru. Mae'r opsiwn hwn yn gosod dyletswydd ar Weinidogion Cymru i benodi Cynghorydd Cenedlaethol o'r fath, gan ymgorffori'r rôl mewn statud. Mae'r opsiwn hwn hefyd yn ymgorffori swyddogaethau Cynghorydd Cenedlaethol o'r fath mewn statud.

8. Costau a Manteision

104. Yn y bennod hon mae dadansoddiad o gostau a manteision yr opsiynau sydd wedi'u disgrifio ym Mhennod 7.

Costau

105. Ar hyn o bryd mae cyllideb refeniw o £4 miliwn yn 2014/15 gan y Tîm Trais yn erbyn Menywod a Cham-drin Domestig yn Llywodraeth Cymru. Bydd costau rhaglen Llywodraeth Cymru sy'n gysylltiedig â'r Ddeddf hon yn cael eu diwallu o'r gyllideb hon.

A. Y Ddyletswydd i Baratoi ac Adrodd ar Strategaethau Cenedlaethol

Opsiwn 1 – Gwneud Dim / Parhau i Ddefnyddio Strategaethau Presennol

106. O dan yr opsiwn hwn, ni fyddai'r strategaethau presennol yn cael eu diweddarau na'u disodli, felly nid oes costau ychwanegol yn gysylltiedig â'r opsiwn hwn.

107. Roedd y Strategaeth Hawl i fod yn Ddiogel bresennol wedi costio tua £10,700. Mae hyn wedi'i seilio ar un gwas sifil ar Fand Gweithredol 2 (EB2) yn gweithio'n llawn amser ar y strategaeth am gyfnod o 8 wythnos¹⁹. Bellach, mae'r strategaeth wedi'i chwblhau a chafodd yr adroddiad terfynol ei gyhoeddi ar wefan Llywodraeth Cymru ym mis Mehefin 2014. Diwallwyd y costau am fwrw ymlaen â'r camau gweithredu yn y Strategaeth Hawl i Fod yn Ddiogel o gyllideb refeniw flynyddol y Tîm Trais yn erbyn Menywod a Cham-drin Domestig.

Opsiwn 2 – Cynhyrchu Strategaeth Genedlaethol nad yw'n Ddeddfwriaethol

108. Byddai cost i Lywodraeth Cymru am gynhyrchu, cyhoeddi a gweithredu Strategaethau Cenedlaethol newydd ar drais ar sail rhywedd, cam-drin domestig a thrais rhywiol.

109. Amcangyfrifwyd mai'r gost staff am gynhyrchu strategaeth yw £10,700. Mae'r ffigur hwn wedi'i seilio ar gost cynhyrchu'r strategaeth bresennol gan dybio bod un gwas sifil EB2 yn gweithio'n llawn amser ar Strategaeth Genedlaethol am gyfnod o 8 wythnos²⁰.

110. Mae Llywodraeth Cymru eisoes wedi sefydlu Grŵp Cynghori Trais yn erbyn Menywod, Cam-drin Domestig a Thrais Rhywiol ac mae rhanddeiliaid allweddol yn aelodau ohono. Nid oes costau uniongyrchol yn gysylltiedig â rhedeg y Grŵp. Amcangyfrifir mai'r gost i Lywodraeth Cymru am ddarparu cymorth ysgrifenyddol

¹⁹Mae costau staff Llywodraeth Cymru yn yr Asesiad Effaith Rheoleiddio hwn wedi'u seilio ar Gostau Band Cyflog y Tîm Gweithredu Gwasanaethau Canolog. Mae'r gost tâl grynswth yn cynnwys cyflog a chyfraniadau pensiwn ac yswiriant gwladol y cyflogwr.

²⁰*Ibid*

i'r Grŵp fydd £1,250. Mae hyn wedi'i seilio ar un gweithiwr Band Rheoli 2 (MB2) yn treulio 8 diwrnod y flwyddyn yn cefnogi'r Grŵp. Cylch gwaith y Grŵp yw cynnal trosolwg o strategaeth Llywodraeth Cymru i fynd i'r afael â phob math o drais yn erbyn menywod (sef y math mwyaf cyffredin o drais ar sail rhywedd), cam-drin domestig a thrais rhywiol. Byddai'r Strategaeth ddrafft newydd yn cael ei chyflwyno i'r Grŵp ei hystyried ac ymgynghori arni, a byddai ymgynghoriad ar-lein ar ôl hynny am 12 wythnos. Gan y byddai'r ymgynghoriad yn cael ei gynnal ar-lein, ni fyddai costau am ddsbarthu neu argraffu. Mae'r gost i Lywodraeth Cymru am ddadansoddi'r ymatebion i'r ymgynghoriad ac unrhyw ail-ddrafftio dilynol wedi'i chynnwys yng nghostau staff EB2 ar gyfer cynhyrchu'r strategaeth a amlinellwyd uchod.

111. Mae'r amcangyfrif o'r gost i Lywodraeth Cymru am fwrw ymlaen â strategaeth newydd wedi'i seilio ar waith amser llawn gan un gwas sifil EB2 (ar gost grynsyth o £69,408 y flwyddyn) ar weithredu ac adrodd yn flynyddol ar y strategaeth ac elfennau eraill y Ddeddf, ynghyd â gwaith amser llawn gan un gwas sifil MB1 (ar gost grynsyth o £51,912) ar weithredu'r strategaeth ac elfennau eraill y Ddeddf.
112. Felly amcangyfrif o gyfanswm y costau gweinyddol yw £121,320 y flwyddyn. Byddai'r gost hon yn cael ei chynnwys yng nghyllidebau rhaglenni Adrannol presennol Llywodraeth Cymru.
113. Fodd bynnag, mae'n bwysig cofio y byddai'r swyddogaethau a nodir uchod yn gwneud mwy na dim ond gweithredu'r Strategaeth. Byddai'r swyddi hyn hefyd yn gyfrifol am gyflwyno elfennau eraill o'r Ddeddf hon, megis llunio a chyhoeddi adroddiadau; darparu canllawiau a chraffu ar Strategaethau Lleol (elfen B y Ddeddf); llunio, ymgynghori ar, a gweithredu'r canllawiau (elfen C); ymgysylltu â'r Cynghorydd Cenedlaethol (elfen D); ac ymgynghori â'r sectorau perthnasol ar y gwaith hwn. Fodd bynnag, gan y bydd y rhan fwyaf o'r gwaith hwn yn rhan o'r Strategaeth Genedlaethol hefyd, mae'n anodd gwahanu'r costau hyn. Bydd gwas sifil MB1 ychwanegol yn gweithio 35 wythnos y flwyddyn yn helpu i roi'r strategaeth ar waith a chyflawni holl elfennau eraill y Ddeddf (am gost o £34,941). Mae hyn ar ben y gost a nodir uchod (£121,320) i wneud cost o £156,261 y flwyddyn. Mae'r ffigurau hyn yn cynnwys yr holl gyfrifoldebau gweithredu ac felly ni roddir cyfrif i gostau gweinyddol Llywodraeth Cymru ar wahân ar gyfer elfennau eraill y Ddeddf.
114. Byddai angen i gost gweithredu Strategaeth Genedlaethol gael ei hystyried adeg datblygu. Fel yr amlinellir uchod, byddai Llywodraeth Cymru'n cynnal ymgynghoriad cyhoeddus cyn pennu manylion terfynol Strategaeth Genedlaethol.
115. Mae'r tabl yn dangos y costau gweinyddol crynswth amcangyfrifedig ar gyfer yr opsiwn hwn.

Tabl 1. Costau Opsiynau 2 (ac Opsiwn 3)

	2014-15	2015-16	2016-17	2017-18	Cyfanswm
Llywodraeth Cymru (£)					
Paratoi Strategaeth Genedlaethol		10,700 1250			11,950
Cefnogi gweithredu ¹		156,261	156,261	156,261	468,783
Cyfanswm		168,211	156,261	156,261	480,733

¹ Mae costau blynyddol parhaus cefnogaeth Llywodraeth Cymru yn cynnwys yr amser i adrodd ar y strategaeth genedlaethol.

Opsiwn 3 - Cyflwyno Bil Cynulliad i Ymdrin â'r Amcanion Polisi

116. Rhagwelir mai'r un fydd y gost am ddatblygu a gweithredu strategaeth pa un a yw'n statudol neu'n anstatudol. Felly, y costau i Lywodraeth Cymru o dan yr opsiwn hwn yw'r rhai sydd wedi'u nodi yn Nhabl 1.

117. O dan y dewis hwn bydd yn ofynnol i Lywodraeth Cymru gyhoeddi set o Ddangosyddion Cenedlaethol i fesur y cynnydd a wneir tuag at gyflawni'r amcanion a nodir yn y Strategaeth Genedlaethol yn eu herbyn. Mae'r Rhaglen Lywodraethu bresennol yn cynnwys nifer o ddangosyddion sy'n ymwneud â thrais ar sail rhywedd, cam-drin domestig a thrais rhywiol sy'n cael eu hadolygu a'u diweddarau'n rheolaidd. Mae costau ychwanegol sy'n gysylltiedig â datblygu, cyhoeddi neu ddiweddarau'r dangosyddion hyn wedi'u hymgorffori yn y costau staff a amlinellir o dan yr opsiwn hwn.

B. Y Ddyletswydd i Baratoi ac Adrodd ar Strategaethau Lleol

Opsiwn 1 – Gwneud Dim

118. Nid oes costau ychwanegol yn gysylltiedig â'r opsiwn hwn. Fel y nodir uchod, mae nifer o Awdurdodau Lleol eisoes yn rhoi sylw i gam-drin domestig yn eu CISau. Os nad ydynt yn gwneud hyn eisoes, ni fydd rheidrwydd arnynt i wneud o dan yr opsiwn hwn.

Opsiwn 2 - Defnyddio Deddfwriaeth Bresennol i Gyflwyno Newid

119. Bydd cost i Awdurdodau Lleol a Byrddau Iechyd Lleol o dan yr opsiwn hwn gan y bydd yn ofynnol iddynt gwblhau Strategaeth Leol ar drais ar sail rhywedd, cam-drin domestig a thrais rhywiol.

120. Yr amcangyfrif o'r costau staff ar gyfer creu Strategaeth Leol yw tua £8,300 ar gyfer pob awdurdod lleol. Bydd y gost hon wedi'i rhannu rhwng yr Awdurdod Lleol a'r Bwrdd Iechyd Lleol ar amcangyfrif o 10% o amser Prif Swyddog Awdurdod Lleol ar bwynt 49 ar raddfa gyflog yr awdurdod (£42,032 y flwyddyn)²¹, a 10% o amser Band 7 gweithiwr GIG ar bwynt 34 ar y raddfa gyflog (£40,558 y

²¹ O Raddfa Gyflog y Cyd-gyngor Cenedlaethol 2013-2014

flwyddyn)²². Mae hyn yn cyfateb i tua £182,600 ar gyfer Cymru gyfan ar sail y nifer presennol o 22 o Awdurdodau Lleol yng Nghymru.

121. Gan fod y gofynion ar gyfer cyhoeddi wedi'u pennu'n barod yn y ddeddfwriaeth berthnasol bresennol, nid yw'r opsiwn hwn yn gosod unrhyw ofynion newydd ar gyfer cyhoeddi ac felly nid oes unrhyw gostau ychwanegol.
122. Rhaid i Awdurdodau Lleol wneud y gwaith hwn yn barod wrth lunio'r CIS y bydd pob un ohonynt yn ei gwblhau, a byddent yn parhau i wneud hyn o dan yr opsiwn hwn. Felly bydd y costau o baratoi a chyhoeddi yn rhan o'u cyllidebau eisoes.

Opsiwn 3 - Cyflwyno Bil Cynulliad i Ymdrin â'r Amcanion Polisi

123. Yn yr un modd ag opsiwn 2 byddai costau i Awdurdodau Lleol a Byrddau Iechyd Lleol gan y byddai'n ofynnol iddynt gwblhau Strategaeth Leol ar drais ar sail rhywedd, cam-drin domestig a thrais rhywiol.
124. Hefyd yn yr un modd ag opsiwn 2, yr amcangyfrif o'r costau ar gyfer creu strategaeth yw tua £8,300 ar gyfer pob Awdurdod Lleol, wedi'u rhannu rhwng yr Awdurdod a'r Bwrdd Iechyd Lleol (gweler opsiwn 2). Felly, yr amcangyfrif o gyfanswm y gost ledled Cymru yw tua £182,600 (bob pum mlynedd) ar sail y nifer presennol o 22 o Awdurdodau Lleol yng Nghymru
125. Ym mhob strategaeth, rhaid ystyried yr asesiad diweddaraf o anghenion ar gyfer yr ardal leol. Mae'n ofynnol o dan adran 14 o Ddeddf Gwasanaethau Cymdeithasol a Llesiant (Cymru) 2014 fod asesiad o anghenion o'r fath yn cael ei wneud felly ni fydd cost ychwanegol yn deillio o'r Ddeddf hon o ganlyniad i hyn.
126. Nid yw'r Ddeddf yn pennu'r dull o gyhoeddi'r strategaethau. Ar hyn o bryd, mae Awdurdodau Lleol yn ymgynghori ar eu CISau ac yn eu cyhoeddi ar eu gwefannau, a rhagwelir y byddant yn gwneud yr un modd ar gyfer y Strategaethau Lleol hyn.
127. Bob blwyddyn, bydd yn ofynnol bod yr Awdurdod Lleol a'r Bwrdd Iechyd Lleol yn llunio adroddiad sy'n disgrifio'r cynnydd a gafwyd tuag at gyflawni'r amcanion sydd yn y Strategaeth Leol. Yr amcangyfrif o'r gost i Awdurdod Lleol a Bwrdd Iechyd Lleol am lunio'r adroddiad hwn yw tua £1,650 y flwyddyn. Mae hyn wedi'i seilio ar 2% o amser Prif Swyddog Awdurdod Lleol ar bwynt 49 ar raddfa gyflog yr awdurdod (£42,032 y flwyddyn)²³ a 2% o amser Band 7 gweithiwr GIG ar bwynt 34 ar y raddfa gyflog (£40,558 y flwyddyn)²⁴. Mae hyn yn cyfateb i gost flynyddol o £36,300 ledled Cymru ar sail y nifer presennol o 22 o Awdurdodau Lleol yng Nghymru.

²² Graddfeydd Cyflog y GIG

²³ O Raddfa Gyflog y Cyd-gyngor Cenedlaethol 2013-2014

²⁴ Graddfeydd Cyflog y GIG

128. Unwaith eto, nid yw'r Ddeddf yn pennu'r dull o gyhoeddi'r adroddiadau a chymerir felly y bydd Awdurdodau Lleol yn cyhoeddi'r adroddiad ar eu gwefan bresennol.

129. dan yr opsiwn hwn, byddai cost i Lywodraeth Cymru am lunio canllawiau i Awdurdodau Lleol a Byrddau Iechyd Lleol ar eu strategaethau; am graffu ar yr adroddiadau a strategaethau a geir ganddynt gyda'i gilydd; ac am sicrhau eu bod yn gyson â'r Strategaeth Genedlaethol a'r canllawiau sydd wedi'u gosod gan Lywodraeth Cymru. Byddai'r swyddogaeth hon yn cael ei chyflawni drwy ddefnyddio'r adnoddau presennol yn Llywodraeth Cymru sydd wedi'u costio yn yr is-adran ar baratoi ac adrodd ar y Strategaeth Genedlaethol (mae Tabl Crynodeb 1 yn dangos cost flynyddol yr adnoddau hyn).

130. Mae'r tabl yn dangos crynodeb o'r costau amcangyfrifedig ledled Cymru, ac eithrio Llywodraeth Cymru, am yr opsiwn hwn.

Tabl 2. Costau Opsiwn 3

	2014-15	2015-16	2016-17	2017-18	Cyfanswm
Llywodraeth Cymru¹ (£)					
	0	0	0	0	0
Awdurdodau Lleol a Byrddau Iechyd Lleol (£)					
Paratoi Strategaeth Leol		182,600	182,600		182,600
Adrodd ar y Strategaeth Leol ²				36,300	36,300
Cyfanswm (£)	0	0	182,600	36,300	218,900

¹ Mae'r costau blynyddol parhaus o ran cymorth Llywodraeth Cymru wedi'u cynnwys gyda'r amser i adrodd ar y strategaeth genedlaethol (gweler Tabl 1 hefyd).

² Cost flynyddol parhaus am adrodd ar y strategaethau lleol.

Tabl Crynodeb o Gostau Amcangyfrifedig yr Opsiynau ar gyfer y Ddyletswydd i Baratoi ac Adrodd ar Strategaethau Lleol

Tabl 3. Tabl Crynodeb ar gyfer yr Holl Opsiynau

<u>Y Sefydliad sy'n Ysgwyddo Costau</u>	<u>Math o Gost</u>	<u>Maes Cost</u>	<u>Cost (£)</u>
Opsiwn 1			
Amherthnasol	Amherthnasol	Cyfanswm	0
Opsiwn 2			
Awdurdod Lleol	Paratoi Strategaeth Leol	Costau Staff	4,200
Bwrdd Iechyd Lleol		Costau Staff	4,100
		Costau Cyhoeddi	0
		<u>Cyfanswm (am bob ALI a BILI)</u>	8,300
		<u>Cyfanswm (ledled Cymru)</u>	182,600
Opsiwn 3			
Awdurdod Lleol	Paratoi Strategaeth Leol (cychwynnol)	Costau Staff	4,200
Bwrdd Iechyd Lleol		Costau Staff	4,100
		Costau Cyhoeddi	0
		<u>Cyfanswm (am bob ALI a BILI)</u>	8,300
		<u>Cyfanswm (ledled Cymru)</u>	182,600
Awdurdod Lleol	Adrodd ar Strategaeth Leol (y flwyddyn)	Costau Staff	840
Bwrdd Iechyd Lleol		Costau Staff	810
		Costau Cyhoeddi	0
		<u>Cyfanswm (am bob ALI a BILI)</u>	1,650
		<u>Cyfanswm (ledled Cymru)</u>	36,300

C. Pŵer i wneud Rheoliadau o dan Ddeddf Addysg 1996

Opsiwn 1 – Gwneud Dim

131. Gan nad yw'r opsiwn hwn yn galw am gyhoeddi gwybodaeth, nid oes costau ychwanegol yn gysylltiedig â'r opsiwn hwn.

Opsiwn 2 – Rhoi'r pŵer i Weinidogion Cymru wneud rheoliadau i'w gwneud yn ofynnol i Awdurdodau Lleol gyhoeddi gwybodaeth ar weithgarwch addysgol yn eu hardaloedd

132. Er bod union gynnwys y Rheoliadau i'w gwneud o dan y ddarpariaeth hon yn destun ymgynghori ac ystyriaeth wedi hynny, bydd cost i Awdurdodau Lleol o

wneud rheoliadau o dan yr opsiwn hwn. Mae hyn oherwydd y bydd gofyn iddynt gyhoeddi gwybodaeth ar y camau sy'n cael eu cymryd i fynd i'r afael â'r materion hyn yn eu swyddogaethau addysg, gan gynnwys ysgolion. Bydd Asesiad Effaith Rheoleiddiol pellach yn cael ei gynnal adeg gwneud y rheoliadau. Fodd bynnag, gwneir pob ymdrech i gyfyngu'r y baich ychwanegol ar Awdurdodau Lleol drwy ddefnyddio dulliau casglu data cyfredol.

133. Rhagwelir y caiff yr adroddiad blynyddol ei gyhoeddi ochr yn ochr â'r adroddiad blynyddol ar gyfer y Strategaeth Leol, felly mae'n debygol y bydd y gost ychwanegol yn fach. Er nad oes penderfyniad terfynol ynghylch union gynnwys yr adroddiadau blynyddol, mae cost llunio'r adroddiad blynyddol ar gyfer y Strategaeth Leol yn rhoi syniad da o'r costau posibl. Gan fod yr adroddiad blynyddol yn ymdrin ag ystod ehangach o wybodaeth, defnyddiwyd hanner y costau i Awdurdod Lleol o lunio adroddiad blynyddol at ddibenion dangosol. Amcangyfrifir felly mai'r costau staff ar gyfer casglu'r wybodaeth a chyhoeddi'r adroddiad fydd tua £2,100 fesul ardal leol. Mae'r gost hon yn seiliedig ar amcangyfrif o 5% o amser Prif Swyddog Awdurdod Lleol ar bwynt 49 y gyfradd gyflog (£42,032 y flwyddyn)²⁵. Mae hyn yn cyfateb ag oddeutu £46,200 ar gyfer Cymru gyfan ar sail y 22 o Awdurdodau Lleol yng Nghymru.

134. Gan fod y gofynion cyhoeddi eisoes i'w gweld yn y ddeddfwriaeth gyfredol berthnasol, nid yw'r opsiwn hwn yn gosod unrhyw ofynion cyhoeddi ychwanegol, felly nid oes costau ychwanegol.

Tabl 4. Tabl Crynodeb o'r Holl Opsiynau

Y Sefydliad sy'n Ysgwyddo'r Costau	Math o Gost	Maes y Gost	Cost (£)
Opsiwn 1			
Dd/B	Dd/B	Cyfanswm	0
Opsiwn 2			
Awdurdod Lleol	Paratoi adroddiad blynyddol	Costau Staff	2,100
		Costau Cyhoeddi	0
		Cyfanswm (fesul ALI)	2,100
		Cyfanswm (Cymru gyfan)	46,200

D. Pŵer i Gyhoeddi Canllawiau Statudol a'r Ddyletswydd i Ddilyn Canllawiau o'r fath

Opsiwn 1 – Gwneud Dim

135. Gan nad yw'r opsiwn hwn yn galw am lunio unrhyw ganllawiau, nid oes costau yn gysylltiedig â'r opsiwn hwn.

²⁵ O Raddfa Gyflog y Cyd-gyngor Cenedlaethol 2013-2014

Opsiwn 2 - Defnyddio Canllawiau Anstatudol i Gyflwyno Newid

136. Y costau sy'n gysylltiedig â'r opsiwn hwn yw'r gost o lunio unrhyw ganllawiau a'r costau am eu gweithredu ar ôl hynny. Mae nifer o agweddau y gallai Llywodraeth Cymru fod am gyhoeddi canllawiau yn eu cylch i helpu awdurdodau i gyflawni'r nodau polisi. Er bod rhai dogfennau canllaw wedi'u cynnwys yn y Bil, nid yw'r rhain yn hollgynhwysfawr ac mae'n debygol y bydd angen canllawiau pellach yn y dyfodol. Mae nifer o feysydd allweddol wedi'u crybwyll yn y Papur Gwyn ac mae Llywodraeth Cymru wedi paratoi canllawiau drafft enghreifftiol ar y rhain. Felly mae'r costau isod wedi'u seilio ar y canllawiau drafft enghreifftiol hynny. Cymerir mai'r un yw'r costau sy'n gysylltiedig â chyhoeddi canllawiau anstatudol â'r rhai ar gyfer canllawiau statudol. Mae hyn yn tybio cydymffurfiaeth lawn â chanllawiau anstatudol er mwyn darparu llun cyflawn o'r costau posibl. Byddai Llywodraeth Cymru yn cynnal ymgynghoriad cyhoeddus cyn cyhoeddi canllawiau anstatudol neu statudol.

Fframwaith Hyfforddi Cenedlaethol

137. Bydd Fframwaith Hyfforddi Cenedlaethol Cymru ar Drais yn erbyn Menywod, Cam-drin Domestig a Thrais Rhywiol yn ceisio creu safon gofal gyson ar gyfer y rheini sy'n profi effaith trais ar sail rhywedd, cam-drin domestig a thrais rhywiol a safon gwasanaeth ddibynadwy ym mhob rhan o'r Gwasanaeth Cyhoeddus ar gyfer y grŵp cleientiaid hwn.

138. Bydd chwe lefel yn y Fframwaith Hyfforddi Cenedlaethol, pob un ar gyfer cynulleidfa benodol ac yn darparu ar gyfer anghenion y rheini sy'n profi effaith trais ar sail rhywedd, cam-drin domestig a thrais rhywiol, a byddant yn cynnwys disgrifiad o'r prif gymwyseddau a gwybodaeth sydd eu hangen ar bob lefel broffesiynol.

139. Mae cost cyfle yn gysylltiedig â'i gwneud yn ofynnol i grwpiau o gyflogeion wneud hyfforddiant – sef yr amser a allai fod wedi'i dreulio fel arall ar weithgareddau eraill sy'n gysylltiedig â swyddi. Er enghraifft, cost cyfle nyrs sy'n cael hyfforddiant o dan elfen Gofyn a Gweithredu'r fframwaith yw'r amser a dreulir yn yr hyfforddiant a allai fod cael ei dreulio fel arall gyda chleifion. Tybir bod gwerth yr amser hwn yn gyfartal â'r cyflog i'r cyflogai/cyflogeion perthnasol.

140. Bydd hyfforddiant Lefel 1 ar gyfer yr holl staff yn y Gwasanaeth Cyhoeddus²⁶ ac, yn benodol, y rheini sydd â chyfrifoldebau ar gyfer y cyhoedd. Bydd hyn yn cwmpasu'r gynulleidfa ehangaf a chaiff ei gyflwyno drwy ddull effeithlon, fel e-

²⁶ Yng nghyd-destyn y Fframwaith Hyfforddi Cenedlaethol byddwch cystal â nodi bod Gwasanaeth Cyhoeddus wedi'i ddiffinio'n ar sail amcangyfrif o 'weithwyr y sector cyhoeddus datganoledig yng Nghymru – gan gynnwys y gwasanaeth sifil datganoledig, yr awdurdodau lleol, iechyd, awdurdodau addysg a Chyrrff a Noddir gan Lywodraeth Cymru. Er nad ydynt wedi'u datganoli, cynhwysir Awdurdodau Heddlu gan eu bod wedi'u hariannu'n rhannol gan Lywodraeth Cymru. Mae 'gweithwyr y sector cyhoeddus datganoledig' yn hepgor gweision sifil heb eu datganoli (megis y rhai sy'n gweithio i HMRC a DVLA), staff milwrol a phobl sydd wedi'u cyflogi gan Gorfforaethau Cyhoeddus (megis S4C a Bws Caerdydd etc.) yng Nghymru.

ddysgu, er mwyn hybu ymwybyddiaeth o drais ar sail rhywedd, cam-drin domestig a thrais rhywiol, ei adnabod a gwybod o ble i gael cymorth. Mae hyn wedi galw am wariant untro o £40,560 i Lywodraeth Cymru er mwyn caffael pecyn e-ddysgu a deunyddiau ategol. Mae wedi galw hefyd am amser swyddog ar lefel EB2 i ddatblygu cynnwys a monitro'r gwaith hwn. Mewn blynyddoedd i ddod, bydd hefyd angen amser i hyrwyddo a mireinio'r pecyn. Rhagwelir y bydd angen llai o amser i'w hyrwyddo yn y blynyddoedd ariannol ar ôl hynny. Mae cost amser swyddog ar lefel EB2 wedi'i chynnwys yn yr adnodd amser llawn sydd wedi'i nodi a'i gyfrifo yn Nhabl 1 uchod. Mae rhagamcan o £15,000 pellach ar gyfer blwyddyn ariannol 2017-2018 i dalu am ddiwygio a diweddarau'r pecyn.

141. Ni fydd angen mwy na thri chwarter awr ar gyfer cwblhau'r pecyn e-ddysgu gan bob dysgwr. Er nad yw'n wariant uniongyrchol i'r sector cyhoeddus, mae cost cyfle yn gysylltiedig ag annog gweithwyr yn y sector cyhoeddus datganoledig yng Nghymru i ymgymryd â'r e-ddysgu hwn. Ar sail ffigur o tua 284,000 am nifer y gweithwyr yn y sector cyhoeddus datganoledig yng Nghymru a chost cyfle gyfartalog o £7 yr hanner awr²⁷, amcangyfrifwyd mai'r costau cyfle fydd tua £2,982,000 am gwblhau'r pecyn e-ddysgu gan bob aelod o'r Gwasanaeth Cyhoeddus. Mae'r gost hon wedi'i rhannu ar draws tair blynedd o gyflawni (£994,000 fesul blwyddyn ariannol 2015-2016 i 2017-2018). Cymerwyd y bydd trosiant blynyddol o 10% yn staff y Gwasanaeth Cyhoeddus ac, ar sail hynny, amcangyfrifwyd mai'r costau cyfle i'r Gwasanaeth Cyhoeddus am gwblhau'r pecyn gan staff newydd fydd £298,200 y flwyddyn. Bydd y gost hon yn disgyn ar y sefydliadau Sector Cyhoeddus perthnasol.
142. Bydd hyfforddiant Lefel 2 ar gyfer gweithwyr proffesiynol sy'n dod i gysylltiad yn aml â dioddefwyr posibl (megis bydwagedd) a bydd yn ceisio rhoi iddynt y sgiliau a'r wybodaeth y bydd arnynt eu hangen i gyflawni eu dyletswydd i adnabod arwyddion a symptomau trais ar sail rhywedd, cam-drin domestig a thrais rhywiol domestig, 'gofyn' cwestiynau amdano a 'gweithredu' ar sail yr ymateb. Er bod yr hyfforddiant hwn hefyd ar gyfer cynulleidfa fawr iawn, cynigir y bydd yr hyfforddiant hwn yn cael ei gyflwyno yn yr ystafell ddosbarth am nifer o resymau:
143. I gydnabod bod newid agwedd at drais ar sail rhywedd, cam-drin domestig a thrais rhywiol yr un mor bwysig â datblygu sgiliau ac mai'r ystafell ddosbarth yw'r lle gorau i sicrhau'r newid hwn.
144. I gydnabod y bydd y gofyniad i ofyn a gweithredu yn peri pryder i nifer o'r gweithwyr proffesiynol sy'n ymwneud â'r gwaith ac i ddarparu amgylchedd dysgu lle y gellir ymchwilio i'r pryderon hyn a'u lleddfu.
145. I hwyluso eglurhad trylwyr o'r pwnc a chwalu camsyniadau a rhagfarnau sy'n gysylltiedig â thrais ar sail rhywedd, cam-drin domestig a thrais rhywiol.
146. Mae costau manwl y darpariaethau ar gyfer 'Gofyn a Gweithredu' wedi'u disgrifio ar wahân yn yr adran ddilydol a'u cynnwys mewn tabl ar wahân (gweler Tabl 6). Gan fod yr adran hon yn cynnwys y dadansoddiad llawn o sut y

²⁷ Amcangyfrifwyd gan ddefnyddio data o Arolwg Blynyddol Oriau ac Enillion (ASHE) 2013.

cyfrifwyd y canllawiau hyn, gan gynnwys dadansoddiad blynyddol o'r costau amcangyfrifedig i Lywodraeth Cymru a chostau cyfle i Wasanaethau Cyhoeddus, nid ydynt wedi'u cynnwys yn Nhabl 5 isod. Er hynny, nodir mai cost uniongyrchol amcangyfrifedig y canllawiau hyn i Lywodraeth Cymru dros flynyddoedd 2014/2015 i 2017/2018 fydd £346,000 (gweler tabl 6).

147. Bydd hyfforddiant Lefel 3 ar gyfer pob gweithiwr proffesiynol sydd â chyfrifoldeb arweiniol ar ran ei broffesiwn (e.e. nyrsys diogelu, bydwragedd arbenigol, gweithwyr cymdeithasol arbenigol, arweinwyr ar ddiogelu mewn ysgolion). Ei nod yw darparu hyfforddiant uwch i'r rheini sy'n cyflawni rôl hanfodol wrth amddiffyn dioddefwyr a phlant a sicrhau bod y gweithwyr proffesiynol hyn yn hyfedr nid yn unig mewn gwaith sy'n canolbwyntio ar y dioddefwr ond hefyd mewn lliniaru'r effaith ar blant a rheoli a chydabod y risg oddi wrth y camdriniwr – yn enwedig lle y mae'r gweithiwr proffesiynol yn gweithio gyda'r teulu. Bydd hefyd yn cynnwys y rheini sydd â rôl hyrwyddo leol.
148. Rhagwelir y bydd cost hyfforddiant Lefel 3 yn galw am wariant cychwynnol o £40,000 yn ystod 2015-2016 i gaffael pecyn hyfforddi ac i hyfforddi aelodau priodol o'r consortia rhanbarthol i gyflwyno'r hyfforddiant uwch am y prisiau marchnad cyfredol. Yr amcangyfrif o gost amser yr hyfforddwyr y bydd ei angen i gyflwyno'r hyfforddiant hwn yw £12,000 y flwyddyn, sy'n gyfanswm o £52,000. Mae £52,000 wedi'i ddyrannu ar gyfer 2016-2017 a 2017-2018 i ateb y galwadau yn yr ymgynghoriad cyhoeddus i ystyried ehangu'r grwpiau proffesiynol a allai fanteisio ar yr hyfforddiant hwn.
149. Amcangyfrifwyd mai'r gost cyfle sy'n gysylltiedig â'r amser y bydd angen ei dreulio gan broffesiynau y tybir bod yr hyfforddiant hwn yn berthnasol iddynt yw £44,500 y flwyddyn. Gan nad yw hyn yn gost ariannol uniongyrchol wirioneddol, nid yw'n fwriad y bydd Llywodraeth Cymru yn talu am hyn.
150. Mae hyfforddiant Lefel 4 yn cynnwys cymwysterau achrededig arbenigol ar gyfer y gweithwyr proffesiynol a fydd yn gyfrifol am gefnogi dioddefwyr ac asesu risgiau a rheoli diogelwch ar eu cyfer (e.e. Cynghorwyr Trais Domestig Annibynnol (IDVA), Cynghorwyr Trais Rhywiol Annibynnol (ISVA), gweithwyr Allgymorth, gweithwyr cymorth fel y bo'r angen, gweithwyr mewn llochesau). Bydd hefyd yn cyfuno'r cyrsiau hyfforddi ad hoc presennol a gynigir ar bynciau arbenigol ledled Cymru mewn cynllun cyson cenedlaethol a fydd ar gael ledled Cymru.
151. Mae pedwar deg wyth o leoedd hyfforddi wedi'u hariannu yn ystod blwyddyn academaidd 2014-2015 am gost o £104,000 (gweler atodiad 1) i dalu am alw sydd heb ei ddiwallu ar gyfer hyfforddi Cynghorwyr Trais Domestig Annibynnol sy'n gweithio yng Nghymru, er gwaethaf bwrsari presennol y Swyddfa Gartref.
152. Bydd trafodaethau yn parhau gyda Llywodraeth y DU yn dilyn yr Etholiad Cyffredinol i weld beth yw eu cynlluniau at y dyfodol mewn perthynas â'r cynllun bwrsari hwn. Fodd bynnag, yn y cyfamser dyrannwyd lwfans i dalu cost hyfforddiant arbenigol ar lefel 4 ym mhob blwyddyn ariannol o gyflawni sydd yn y ddogfen hon. Mae'r ffigur hwn oddeutu £65,000 y flwyddyn a bydd yn cael ei ddefnyddio ar gyfer gweithgarwch DPP arbenigol perthnasol bob blwyddyn. Mae

mwyafrif helaeth y rheini a fydd yn cael yr hyfforddiant wedi'u cyflogi yn y sector elusennol. Amcangyfrifir mai'r gost cyfle sy'n gysylltiedig ag amser y gweithwyr proffesiynol hynny yw oddeutu £70 y dydd, a dyma yw sail yr amcangyfrif blynyddol yn Nhabl 5.

153. Mae nifer sylweddol o gyrsiau hyfforddi ar gael ledled Cymru ar bynciau sy'n gysylltiedig â thrais ar sail rhywedd, cam-drin domestig a thrais rhywiol. Mae angen gwaith i gysoni'r cyrsiau hyn, safoni eu cynnwys a sicrhau eu bod ar gael ym mhob rhan o Gymru. Comisiynwyd prosiect ym mlwyddyn ariannol 2014-2015 i gychwyn y gwaith hwn ac ymchwilio i'r opsiynau achredu ar y lefel hon. Cost y prosiect hwn oedd £14,875.
154. Yn ystod taith y Bil drwy'r Cynulliad, cododd nifer o ofynion hyfforddiant. Ariannwyd hyfforddiant ar lefel 4 ar gyfer byrddau iechyd lleol a hyfforddiant Cynadleddau Amlasiantaeth Asesu Risg a thrais er "anrhydedd" ar gyfer yr heddlu. Cyfanswm y gwariant ar lefel 4 yn ystod blwyddyn ariannol 2014-2015 yw £176,515.
155. Ar Lefel 5 cynigir hyfforddiant rheoli arbenigol ar gyfer y rheini sy'n arwain sefydliadau arbenigol i sicrhau y byddant yn cynnal y gweithlu arbenigol yn fwy effeithiol, y byddant yn fwy medrus wrth fonitro data ac y gallant weithio'n hyblyg ac yn effeithiol mewn amgylcheddau comisiynu sy'n newid. Ymhlith y swyddi a fydd wedi'u cynnwys y mae rheolwyr gwasanaethau yn y gymuned a rheolwyr llochesau.
156. Gan ei bod yn rhaglen hyfforddi arbenigol, mae cwmpas yr hyfforddiant ar Lefel 5 yn llai na'r lefelau o'i flaen. Gwariwyd £39,445 ym mlwyddyn ariannol 2014-2015 i hyfforddi ac achredu dau reolwr gwasanaeth arbenigol ym mhob Awdurdod Lleol, a'r gost cyfle am hyn yw oddeutu £16,280. Mae llawer o alw am hyfforddiant o'r fath, felly bydd cyllid pellach yn cael ei ddyrannu i gynnig mwy o hyfforddiant ym mlwyddyn ariannol 2015-2016 (£30,000). Bwriedir cynnal hyfforddiant pellach mewn blynyddoedd i ddod, ond bydd hyn yn dibynnu ar y galw cenedlaethol ac a fydd anghenion hyfforddiant eraill yn cael eu nodi fel blaenoriaeth. Bydd angen ychwanegol am gyfran o amser swyddog ar lefel EB2 i fonitro canlyniad yr hyfforddiant o dan y rhaglen, ac mae'r gost hon wedi'i chyfrifo eisoes yn y ddau adnodd rhaglen amser llawn a nodwyd yn Nhabl 1.
157. Bydd hyfforddiant ar Lefel 6 yn cynnwys cynllun ymgysylltu strategol, ynghyd â chyfres o ffilmiau byr, sef "y Gyfres Cryfhau Arweinyddiaeth", ar gyfer arweinwyr Gwasanaethau Cyhoeddus i sicrhau eu bod yn deall eu cyfrifoldebau o ran trais ar sail rhywedd, cam-drin domestig a thrais rhywiol o fewn y gweithlu ac ymhlith defnyddwyr gwasanaethau.
158. Bydd y cynllun ymgysylltu strategol yn cynnwys ymweliadau gan Weinidogion ac uwch-swyddogion, areithiau a chyflwyniadau a rôl y Cynghorydd Cenedlaethol. Bydd y cynllun yn defnyddio digwyddiadau, byrddau a grwpiau presennol yn ogystal â chyfleoedd eraill i gynnwys uwch arweinwyr y Gwasanaethau Cyhoeddus a chynhadledd benodol ar gyfer y gynulleidfa hon, a gynhelir yn ystod 2014-2015. Bydd angen gwario swm o £6,000 ar y Gyfres Cryfhau Arweinyddiaeth yn 2014-2015. Bydd hyn yn creu chwe ffilm fer i'w

darlledu drwy sianel YouTube Llywodraeth Cymru. Caiff effaith y ffilmiau hyn ei hasesu yng ngwanwyn 2015, ac os byddant yn llwyddiannus bydd angen talu £6,000 y flwyddyn wedi hynny i gefnogi creu adnodd parhaus a chymorth i'r gynulleidfa hon. Darperir cymorth pellach ar gyfer y gwaith hwn gan y ddau adnodd rhaglen amser llawn sydd wedi'u nodi a'u cyfrifo yn Nhabl 1.

159. Amcangyfrifwyd mai cyfanswm y gost ariannol uniongyrchol am ddarparu'r Fframwaith Hyfforddi Cenedlaethol fydd £1,100,873 dros bedair blynedd.²⁸ Bydd Llywodraeth Cymru yn cwrdd â'r gost hon o gyllidebau rhaglenni a Chostau Rhedeg Adrannol. Bydd cost cyfle hefyd i'r Sector Cyhoeddus yng Nghymru a fydd yn dod i gyfanswm o £5,867,398. Gan nad yw hon yn gost ariannol uniongyrchol, nid yw'n fwriad y bydd Llywodraeth Cymru yn cwrdd â'r gost hon. Mae crynodeb o gostau blynyddol y Fframwaith Hyfforddi Cenedlaethol yn Nhabl 5 (nid yw hyn yn cynnwys Gofyn a Gweithredu). Mae dadansoddiad manylach o gyfanswm y gost yn Atodiad 1.

²⁸ Noder bod y crynodeb hwn yn cynnwys y gost o gyflwyno hyfforddiant Gofyn a Gweithredu, a amlinellir fel cost ar wahân yn ddiweddarach yn y ddogfen. Nid costau wedi'u dyblygu yw'r rhain.

Tabl 5. Crynodeb o Gostau'r Fframwaith Hyfforddi Cenedlaethol (amcangyfrif)

DIM GOFYN A GWEITHREDU	<u>2014-2015</u>	<u>2015-2016</u>	<u>2016-2017</u>	<u>2017-2018</u>	<u>Cyfanswm i bob lefel hyfforddi</u>
Costau uniongyrchol i Lywodraeth Cymru (£)	-	-	-	-	-
Lefel 1	40,560	0	0	15,000	55,560
Lefel 2	0	0	0	0	0
Lefel 3	0	52,000	52,000	52,000	156,000
Lefel 4	176,515	67,000	65,000	67,000	375,515
Lefel 5	39,445	30,000	30,000	30,000	129,445
Lefel 6	6,000	6,000	6,000	6,000	30,000
Cyfanswm y flwyddyn	262,520	155,000	153,000	170,000	740,520
Costau cyfle					
Lefel 1	-	994,000	1,292,200	1,292,200	3,578,400
Lefel 2	0	0	0	0	0
Lefel 3	0	44,500	44,500	44,500	133,500
Lefel 4	45,024	22,512	87,100	89,780	244,416
Lefel 5	16,280	16,280	16,280	16,280	65,120
Lefel 6	0	0	0	0	0
Cyfanswm y flwyddyn	61,304	1,077,292	1,440,080	1,442,760	4,021,436

¹ Ni chynhwyswyd crynodeb o'r costau ar gyfer lefel 2 y Fframwaith Hyfforddi Cenedlaethol yma gan eu bod wedi'u cynnwys yn nes ymlaen yn y ddogfen. Gweler Tabl 5

Gofyn a Gweithredu

160. Prif amcan “Gofyn a Gweithredu” yw cymell gweithwyr proffesiynol perthnasol i “ofyn” i ddiodefwyr posibl am y posibilrwydd o drais ar sail rhywedd, cam-drin domestig a thrais rhywiol lle amheuir bod cam-drin o’r fath yn digwydd, a “gweithredu” ar sail hynny er mwyn lleihau neu atal dioddefaint a niwed sy’n digwydd o ganlyniad i drais a cham-drin. Caiff hyn ei hwyluso drwy gyhoeddi canllawiau a bydd rhaglen hyfforddi yn cael ei chyflwyno i gyd-fynd ag ef drwy’r Fframwaith Hyfforddi Cenedlaethol. Felly mae dwy set o gostau’n gysylltiedig â Gofyn a Gweithredu – y gost o lunio’r canllawiau a’r costau o redeg y rhaglen hyfforddi.
161. Caiff y canllawiau eu datblygu drwy ddefnyddio adnoddau rhaglenni presennol Llywodraeth Cymru. Dylid nodi bod drafftiau cychwynnol y canllawiau wedi’u llunio, a bod hyn wedi’i gostio’n barod yn yr Aseiad Effaith Rheoleiddiol hwn o fewn costau adnoddau amser llawn Llywodraeth Cymru o dan yr is-adran ar Baratoi ac Adrodd ar Strategaethau Cenedlaethol (mae Tabl Crynodeb 1 yn dangos y costau blynyddol).
162. Cyflwynir yr hyfforddiant drwy fodel lledaenu rhanbarthol sy’n defnyddio arbenigedd y Gwasanaethau Cyhoeddus ac Arbenigol ar drais ar sail rhywedd, cam-drin domestig a thrais rhywiol, ac ar strwythurau proffesiynau penodol. Bydd pecyn hyfforddi, deunyddiau ategol a chymorth lledaenu yn cael eu caffael: yr amcangyfrif gorau o’r gost hon yw tua £25,000 (i ddarparu cynnwys penodol ar gyfer pob rhan o’r gynulleidfa). Bydd darparwr y pecyn hwn yn hyfforddi cronfa genedlaethol o tua 160 o hyfforddwyr yn 2015/16, ar gost o £71,000 i Lywodraeth Cymru. Bydd yr hyfforddwyr hyn yn cael eu dewis ar sail meini prawf penodol a gallent weithio yn y sector cyhoeddus neu’r trydydd sector. Drwy ddefnyddio Consortia Hyfforddi Rhanbarthol, a gaiff eu cynorthwyo a’u monitro drwy Seilwaith Arweinyddiaeth Ranbarthol a Chenedlaethol, o dan oruchwyliaeth y Cynghorydd Cenedlaethol a swyddogion Llywodraeth Cymru, bydd y proffesiynau perthnasol yn cael eu hyfforddi gan yr “hyfforddwyr hyfforddedig” hyn ar sail ranbarthol, gyda’r nod o hyfforddi pob proffesiwn perthnasol erbyn 2020.
163. Amcangyfrifwyd felly cyfanswm y gost untro gychwynnol am ledaenu hyfforddiant ar sail ranbarthol i Lywodraeth Cymru fydd £116,000. Mae hyn yn adlewyrchu’r costau marchnad cyfredol am raglenni tebyg a bydd yn cynnwys y gost o lunio’r pecyn hyfforddi gan ddarparwr arbenigol, recriwtio, hyfforddi’r garfan gychwynnol o 160 o hyfforddwyr (tua £71,000 fel y nodwyd uchod), gwerthusiad annibynnol ochr yn ochr â chyflwyno (£25,000 y flwyddyn am dair blynedd) a chost cyfle y rheini sy’n cael eu hyfforddi.
164. Yn rhan o gyfanswm y gost untro, mae cost cyfle i sefydliadau yn y sector cyhoeddus a’r trydydd sector sy’n enwebu staff, sy’n gysylltiedig â’r amser mae’r 160 o hyfforddwyr yn ei dreulio i ffwrdd o’u gweithgareddau o ddydd i ddydd. Amcangyfrifir bod y gost untro hwn yn tua £26,000.

165. Ar ôl hyfforddi'r 160 o hyfforddwyr, bydd disgwyl iddynt gyflwyno a lledaenu'r model rhanbarthol. Amcangyfrifir bod cost darparu'r hyfforddiant yn £121,600 y flwyddyn dros y cyfnod 2015-16 i 2017-18. Mae'r gost hon wedi'i chyfrifo ar sail amcangyfrif o'r amser y bydd angen i'r hyfforddwyr hyfforddedig ei dreulio oddi wrth eu swydd arferol. Gan y byddant yn darparu hyfforddiant, mae hyn yn cael ei ystyried yn gost uniongyrchol a'r bwriad felly yw mai Llywodraeth Cymru fydd yn talu'r gost hon. Yn rhan o'r gost, ceir gwerthusiad o'r rhaglen hon, a fydd yn rhedeg am dair blynedd am gost o £25,000 y flwyddyn rhwng 2015-2016 a 2017-2018.
166. Bydd cost cyfle hefyd yn gysylltiedig â'r amser y bydd angen i'r proffesiynau perthnasol²⁹ ei dreulio ar dderbyn hyfforddiant Gofyn a Gweithredu. Amcangyfrifir y bydd hyn yn £923,000 y flwyddyn ac mae'r ffigur hwn wedi'i seilio ar gyfradd gyfartalog o £80 y diwrnod ar gyfer pob gweithiwr Gwasanaeth Cyhoeddus wrth gyflwyno'r hyfforddiant dros 4 blynedd (2015-16 i 2018-19) gan ystyried bod tua 34,600 o weithwyr Gwasanaeth Cyhoeddus mewn proffesiynau perthnasol yng Nghymru. Bydd y gost hon yn disgyn ar y sefydliadau Sector Cyhoeddus perthnasol.
167. Mae manteision mawr i'r Model Lledaenu Rhanbarthol arfaethedig: mae'n gwneud defnydd o'r arbenigedd presennol sydd ar gael yn y rhanbarthau ac, o'i reoli, ei fonitro a'i arwain yn briodol, bydd yn fodel cynaliadwy ar gyfer darparu lefelau'r Fframwaith Hyfforddi Cenedlaethol. Mae safoni'n dod â manteision o ran cost mewn perthynas â modelau gwasanaeth integredig a gwell, a lledaenu gwybodaeth a fydd yn arwain at arbedion costau yn gyffredinol. Er mwyn ei wneud yn gynaliadwy, bydd angen buddsoddi yn y Consortia Rhanbarthol ar ôl y gwariant cychwynnol yn ystod blynyddoedd ariannol 2014-2015 a 2015-2016. Drwy gydol blynyddoedd ariannol 2016-2017, 2017-2018 a 2018-2019, bydd y rhaglen "hyfforddi hyfforddwyr" ganolog yn parhau a bydd 50 o hyfforddwyr newydd yn cael eu hyfforddi bob blwyddyn, gan gynnal y Consortia Rhanbarthol a darparu ar gyfer trosiant staff. Amcangyfrifwyd mai'r gost flynyddol am gyflawni hyn fydd £20,000 ac mae hyn yn cynnwys cost camau cyflawni sydd wedi'u caffael yn ganolog. Cymerir na fydd costau cyflawni gan y bydd y pecyn a oedd wedi'i gaffael ym mlwyddyn 2 yn addas ar gyfer hyn. Yn yr un modd â blwyddyn gyntaf y ddarpariaeth, bydd cost cyfle gysylltiedig i sefydliadau yn y sector cyhoeddus a'r trydydd sector am yr amser sydd ei angen i hyfforddi'r 50 o hyfforddwyr. Amcangyfrifwyd y bydd hyn oddeutu £8,000.
168. Nod Gofyn a Gweithredu yw dynodi mwy o'r rheini sy'n profi trais ar sail rhywedd, cam-drin domestig a thrais rhywiol ac, oherwydd hynny, ystyrir effaith y dynodi cynyddol hwn ar wasanaethau arbenigol a chyhoeddus. Mae'n anodd pennu cost y cynnydd hwn ar hyn o bryd, ond mae ymchwil flaenorol Walby i gostau trais domestig yn awgrymu bod defnydd cynyddol o wasanaethau cyhoeddus i fynd i'r afael â'r materion hyn yn cynyddu cost gwasanaethau. Er hynny, mae hefyd yn cysylltu datblygiad Gwasanaethau Cyhoeddus a defnydd

²⁹ Gweler Atodiad 3 – *Crynodeb o'r 'Gweithwyr Proffesiynol Perthnasol' fel y'u Hamlygir yng Nghostau'r Asesiad Effaith Rheoleiddiol ar gyfer Canllawiau Gofyn a Gweithredu*. Nid yw hon yn rhestr gyflawn ac efallai bydd swyddogaethau eraill y bydd angen hyfforddiant arnynt, yn seiliedig ar angen lleol.

cynyddol ohonynt â gostyngiad mewn trais domestig, ac o ganlyniad i hynny, mae'r costau i fusnes a chymdeithas ehangach trais domestig wedi gostwng.

169. Mae Llywodraeth Cymru wedi comisiynu nifer o ddarnau o waith ymchwil ar y gwariant lleol manwl presennol ar wasanaethau arbenigol, ac ar gyrhaeddiad a phwrpas y cyllid hwnnw. Bydd y data hyn yn cael eu hystyried wrth bennu Strategaeth Ariannu Genedlaethol Llywodraeth Cymru a hefyd wrth lunio'r Aseiad Effaith Rheoleiddiol a gwblheir cyn cyhoeddi unrhyw ganllawiau statudol neu anstatudol ar Gofyn a Gweithredu ar gyfer ymgynghori. Rhagwelir y bydd cynnydd hefyd yn nifer y cleientiaid sy'n defnyddio gwasanaethau arbenigol a chyhoeddus, gan gynnwys y System Cyfiawnder Troseddol (er y bydd nifer mawr o gleientiaid na fyddant yn dewis datgelu drwy'r System Cyfiawnder Troseddol).

170. Mae'r tabl isod yn dangos crynodeb o'r gost am "Gofyn a Gweithredu".³⁰

Tabl 6. Crynodeb o Gostau Gofyn a Gweithredu

	2014-15	2015-16	2016-17	2017-18	Cyfanswm
Llywodraeth Cymru (£)					
Canllawiau ¹	0	0	0	0	0
Hyfforddiant Cychwynnol		116,000			116,000
Model Rhanbarthol			102,000	102,000	204,000
Hyfforddi'r Hyfforddwyr Ychwanegol			20,000	20,000	40,000
Cyfanswm	0	116,000	122,000	122,000	346,000
Gwasanaethau Cyhoeddus² (£)					
Hyfforddeion			923,000	923,000	2,769,000
Cyfanswm	0	0	923,000	923,000	2,769,000

¹Cynhwysir costau blynyddol parhaus ar gyfer cymorth Llywodraeth Cymru yn yr amser i adrodd ar y strategaeth genedlaethol (gweler Tabl 1)

²Mae'r costau hyn yn cynrychioli'r costau sy'n gysylltiedig â staff yn derbyn hyfforddiant felly nid ydynt yn wariant uniongyrchol i Wasanaethau Cyhoeddus.

Fforymau Amlasiantaeth

171. Bydd canllawiau'r Fforymau Amlasiantaeth yn ffurfioli ac yn safoni'r arferion da a geir ar hyn o bryd ac yn gosod sylfaen ar gyfer datblygu fforymau ychwanegol i asesu risgiau isel a chanolig er mwyn cwrdd ag anghenion lleol.

³⁰Sylwer mai'r costau hyn yw'r costau hefyd ar gyfer darparu lefel 2 o'r Fframwaith Hyfforddi Cenedlaethol (fel y nodir yn yr adran sy'n dilyn). Nid yw'r costau hyn wedi'u dyblygu ac maent wedi'u gwahanu yma er mwyn dangos y gost am bob eitem o gyfarwyddyd. Mae cyfanswm y costau o gynhyrchu'r canllawiau wedi'i gynnwys yn y costau am greu canllawiau'r Fforymau Amlasiantaethol, ac am eu monitro ar ôl hynny a chostau'r Fframwaith Hyfforddi Cenedlaethol.

172. Ni fydd y canllawiau'n argymhell un model ar gyfer gwaith Amlasiantaeth. Fel y nodwyd uchod, fe'u defnyddir i geisio ffurfioli a safoni'r arferion da presennol er mwyn sicrhau ansawdd gwasanaeth cyson ledled Cymru. Mae gwaith amlasiantaeth yn digwydd eisoes ym mhob rhan o Gymru (mae model y Gynhadledd Amlasiantaeth Asesu Risg (MARAC) sy'n ymwneud ag unigolion risg uchel ar waith ledled y wlad) ac, oherwydd hyn, rhagwelir na fydd cost ychwanegol i'r Gwasanaeth Cyhoeddus.
173. Mae arbenigwr allanol ar ddatblygu, gweithredu a sicrhau ansawdd fforymau amlasiantaeth ar gyfer pob lefel o risgiau wedi'i contractio i baratoi'r canllawiau hyn. Cost y contract hwn oedd £8,400. Cost untro yw hon.
174. Bydd rheolaeth ar y prosiect ac unrhyw waith atodol sydd ei angen yn cael eu darparu o adnoddau Rhaglenni presennol Llywodraeth Cymru. Mae costau'r rhain wedi'u cyfrifo yn y ddau adnodd rhaglen amser llawn sydd wedi'u nodi yn Nhabl 1 uchod gan ei bod yn anodd eu gwahanu.
175. Bydd y Cynghorydd Cenedlaethol yn monitro canlyniadau'r Fforymau Amlasiantaeth cenedlaethol yn barhaus.
176. Mae crynodeb o'r costau isod:

Tabl 7. Crynodeb o Gostau'r Fforymau Amlasiantaeth

<u>Gweithgaredd</u>	<u>Cost (£)</u>
Datblygu canllawiau gan arbenigwr allanol (untro)	8,400
Cost i Wasanaethau Cyhoeddus	0
Cyfanswm y gost untro (2014-2015)	8,400

Canllawiau comisiynu

177. Bydd y canllawiau comisiynu yn rhoi amlinelliad cynhwysfawr o'r ystyriaethau wrth gaffael darpariaeth arbenigol ar gyfer trais ar sail rhywedd, cam-drin domestig a thrais rhywiol.
178. Bydd y canllawiau'n cael eu datblygu mewn partneriaeth â Grŵp Gorchwyl a Gorffen o randdeiliaid, gan amlinellu gofynion Llywodraeth Cymru am fodel cyson cenedlaethol ar gyfer darparu gwasanaethau i'r rheini sy'n dioddef waethaf yn sgil trais ar sail rhywedd, cam-drin domestig a thrais rhywiol.
179. Amcan cyffredinol y canllawiau yw sicrhau bod anghenion defnyddwyr gwasanaethau o ran atal problemau, diogelu ac adfer yn cael eu hystyried yn gyson o fewn fframwaith sy'n canolbwyntio ar risg ac anghenion. Bydd yn amlinellu pa mor ddefnyddiol yw cyllid ar y cyd sydd wedi'i gydgrynhoi ac egwyddorion darparu ar sail ansawdd, sef strwythur ar gyfer mesur pa ganlyniadau sy'n gweithio i'r rheini sydd wedi dioddef trais ar sail rhywedd, cam-drin domestig a thrais rhywiol, a gofynion capasiti ar gyfer darparu gwasanaethau.

180. Bydd adnoddau cyfredol Rhaglen Llywodraeth Cymru yn datblygu canllawiau o'r fath. Mae'r ddau adnodd rhaglen llawn amser yn Nhabl 1 uchod yn cyfrif am gostau'r rhain.

Canllawiau ar weithio gyda'r cyflawnwyr

181. Caiff y canllawiau ar weithio gyda'r cyflawnwyr mewn achosion o gam-drin domestig eu datblygu mewn partneriaeth gyda Gwasanaeth Prawf Cenedlaethol Cymru, a byddant yn destun craffu ehangach gan randdeiliaid mewn gweithdai datblygu.

182. Bydd y canllawiau'n canolbwyntio ar y gweithwyr proffesiynol yn yr awdurdodau perthnasol sy'n dod i gysylltiad ac yn gweithio gyda chyflawnwyr cam-drin domestig yn eu rolau cyffredinol, ac yn rhoi cyfarwyddyd ar arferion strategol, gweithredol a rheng flaen.

183. Nid y bwriad gyda chanllawiau o'r fath yw gofyn i weithwyr awdurdodau lleol roi cymorth arbenigol neu gynnig ymyrraeth ar gyfer cyflawnwyr cam-drin domestig; y nod yw cefnogi'r gweithwyr hon i ymgorffori arferion syml yn eu gwaith er mwyn ystyried yn well y risgiau gan gyflawnwr i deulu a staff, ymateb yn well i'w hanghenion cymorth, ymgysylltu'n fwy effeithiol ag arferion aml-asiantaeth, ac yn y pen draw dwyn cyflawnwyr i gyfrif am eu cam-drin.

184. Bydd adnoddau cyfredol Rhaglen Llywodraeth Cymru yn datblygu canllawiau o'r fath. Mae'r ddau adnodd rhaglen llawn amser yn Nhabl 1 uchod yn cyfrif am gostau'r rhain.

185. Yn ogystal â'r canllawiau, wrth baratoi'r Strategaeth Genedlaethol, bydd angen ystyried y camau y gallai Gweinidogion Cymru eu cymryd i helpu i ddatblygu rhaglenni cyflawnwyr, gan gynnwys datblygu'r sylfaen dystiolaeth. Bydd rôl allweddol i'r Cynghorydd Cenedlaethol o ran cynnig y cyngor arbenigol ar y ffordd ymlaen. Bydd y Cynghorydd yn gallu ystyried y ffordd ymlaen i'r Strategaeth Genedlaethol yn y maes hwn, a fyddai felly'n helpu i baratoi Strategaethau Lleol.

186. Mae gwaith hefyd yn mynd rhagddo y tu allan i'r Ddeddf i gefnogi canllawiau o'r fath. Mae Llywodraeth Cymru yn ariannu darn mawr o ymchwil ar y cyd â Gwasanaeth Prawf Cenedlaethol Cymru a Heddluoedd Cymru i reoli cyflawnwr risg uchel a rheolaidd o gam-drin domestig a thrais rhywiol. Bydd yr ymchwil yn helpu i lywio ymatebion ar y cyd yn y dyfodol i gyflawnwyr ar draws y sectorau cyfiawnder troseddol a chyfiawnder cymdeithasol, ac felly mae disgwyl mawr amdano. Dylid cwblhau'r gwaith ymchwil erbyn mis Rhagfyr 2015. Mae Llywodraeth Cymru hefyd yn gweithio gyda'r Gwasanaeth Prawf Cenedlaethol i ddatblygu ymgyrch gyhoeddusrwydd yn benodol i dargedu cyflawnwyr, a'r asiantaethau a'r sefydliadau hynny sy'n gweithio gyda nhw.

Opsiwn 3 - Cyflwyno Bil Cynulliad i Ymdrin â'r Amcanion Polisi

187. Yr un yw'r costau sy'n gysylltiedig â'r opsiwn hwn â'r rhai a ddisgrifiwyd yn Opsiwn 2. Yn yr un modd ag Opsiwn 2, mae nifer o agweddau y gallai Llywodraeth Cymru fod am gyhoeddi canllawiau statudol yn eu cylch i helpu awdurdodau i gyflawni'r nodau polisi. Fel y nodwyd hefyd, nid yw'n glir ar hyn o bryd ar ba agweddau yn union y byddai canllawiau'n cael eu cyhoeddi i awdurdodau. Mae nifer o feysydd allweddol wedi'u crybwyll yn yr ymgynghoriad ar y Papur Gwyn ac mae Llywodraeth Cymru wedi paratoi canllawiau drafft enghreifftiol ar y rhain. Felly mae'r costau a ddisgrifiwyd yn opsiwn 2, sydd hefyd yn gymwys i'r opsiwn hwn, wedi'u seilio ar y canllawiau drafft enghreifftiol hynny. Tybir mai'r un yw'r costau sy'n gysylltiedig â chyhoeddi canllawiau statudol â'r rhai ar gyfer canllawiau anstatudol. Byddai Llywodraeth Cymru yn cynnal ymgynghoriad cyhoeddus, gan gynnwys asesiad effaith rheoliadol, cyn cyhoeddi canllawiau anstatudol neu statudol. Mae'r costau gweinyddol i Lywodraeth Cymru, o ran dadansoddi'r ymatebion i'r ymgynghoriad ac sy'n gysylltiedig â monitro ac adrodd ar weithredu'r canllawiau, wedi'u cynnwys yn y ddau adnodd amser llawn Llywodraeth Cymru sydd wedi'u nodi a'u cyfrifo yn Nhabl 1. Hefyd, byddai'r gwaith o fonitro'r defnydd o'r canllawiau gan Awdurdodau Lleol a Byrddau Iechyd Lleol yn rhan o rôl y Cynghorydd Cenedlaethol sydd wedi'i gostio yn yr adran nesaf yn Nhabl 10.

Tabl Crynodeb o Gostau Amcangyfrifedig yr Opsiynau ar gyfer y Pŵer i Gyhoeddi Canllawiau a'r Ddyletswydd i Ddilyn Canllawiau o'r Fath

Tabl 8. Crynodeb o Gostau'r Holl Opsiynau

<u>Y Sefydliad sy'n Ysgwyddo'r Costau</u>	<u>Math o Gast</u>	<u>Maes y Gast</u>	<u>Cost (£)</u>
Opsiwn 1			
Dd/B	Dd/B	Dd/B	0
Opsiynau 2 a 3			
Llywodraeth Cymru	Fframwaith Hyfforddi	Cyfanswm y gwariant dros 4 blynedd	1,100,873
Gwasanaeth Cyhoeddus	Cenedlaethol	<i>Costau cyfle dros 4 blynedd (nid gwariant uniongyrchol)</i>	<i>6,763,422</i>
Llywodraeth Cymru	Canllawiau Gofyn a	Cyfanswm y gwariant dros 4 blynedd	346,000
Gwasanaeth Cyhoeddus	Gweithredu	<i>Costau cyfle dros 4 blynedd (nid gwariant uniongyrchol)</i>	<i>2,769,000</i>
Llywodraeth Cymru	Canllawiau ar gyfer Fforymau	Cyfanswm y Gast Gychwynnol	8,400
Gwasanaeth Cyhoeddus	Amlasiantaeth	Cyfanswm y Gast	0

E. Penodi Cynghorydd Cenedlaethol ar gyfer Trais ar sail Rhywedd, Cam-drin Domestig a Thrais Rhywiol – gan gynnwys y Swyddogaethau, Cynlluniau a Threfniadau Adrodd.

Opsiwn 1 - Gwneud Dim

188. Nid oes costau ychwanegol yn gysylltiedig â'r opsiwn hwn.

Opsiwn 2 - Penodi Comisiynydd

189. Mae'r costau sy'n gysylltiedig â sefydlu Comisiynydd i ystyried materion sy'n ymwneud â thrais ar sail rhywedd, cam-drin domestig a thrais rhywiol yn rhai i Lywodraeth Cymru.

190. Rhagwelir mai tua £11,000 fydd y costau am recriwtio o dan yr opsiwn hwn gan fod y swydd o fewn cylch gwaith y Comisiynydd Penodiadau Cyhoeddus. Mae hyn yn cynnwys y gost o hysbysebu'r swydd yn y wasg leol a chenedlaethol, penodi Asesydd Annibynnol i oruchwylio'r broses, sefydlu panel dewis, darparu cymorth gweinyddol drwy gydol y broses a threuliau ymgeiswyr.

191. Bydd Llywodraeth Cymru hefyd yn wynebu costau parhaus o ran cyflogau'r Comisiynydd a'i staff cymorth, yn ogystal â chostau swyddfa.

192. Mater i'r Comisiynydd fydd penderfynu ar y strwythur priodol ar gyfer ei dîm cymorth. Fodd bynnag, o gofio cwrpas y gwaith, rhagwelir y byddai gofyn i'r Comisiynydd gael tîm o ddim mwy na 10 o bobl. Mae'n debyg y byddai'r Comisiynydd arfaethedig ar Gaethwasiaeth Fodern y DU yn gymhariaeth resymol, ac amcangyfrifir mai cost y swyddogaeth hon a'r staff cymorth fydd rhwng £300,000 a £500,000. Ar y sail hon, tybir felly y byddai costau staff Comisiynydd yn £400,000 y flwyddyn.

193. Byddai costau swyddfa parhaus yr opsiwn Comisiynydd, yn cynnwys eiddo, hyfforddiant, TGCh a chyfathrebu. Ar hyn o bryd, ceir rhywfaint o ansicrwydd am beth allai'r costau hyn fod. Mae Tabl 9 yn rhoi amcangyfrif uchaf ac isaf o'r costau blynyddol posibl wedi'u seilio ar gyfrifon cyhoeddedig Comisiynwyr presennol Llywodraeth Cymru a'r gyfradd pro-rata i adlewyrchu maint disgwylidig y tîm cymorth. Disgwylir y bydd y gost rhwng £585,000 a £630,000 y flwyddyn.

Tabl 9. Amcangyfrif o gostau swyddfa blynyddol

	Isaf (£)	Uchaf (£)
Eiddo	45,000	50,000
Costau swyddfa	40,000	50,000
Hyfforddiant	10,000	10,000
Archwilio	5,000	10,000
Cyfathrebu	20,000	25,000
Costau TGCh	15,000	15,000
Rhaglen waith	35,000	50,000
Wrth gefn	15,000	20,000

Cyfanswm	185,000	230,000
-----------------	----------------	----------------

Tabl 10. Crynodeb o gostau Opsiwn 2

	2014-15	2015-16	2016-17	2017-18	Cyfanswm
Llywodraeth Cymru (£)					
Cymorth a monitro ¹	0	0	0	0	0
Recriwtio Comisiynydd		11,000			11,000
Cyflogau'r Comisiynydd a staff ²		400,000	400,000	400,000	1,200,000
Costau swyddfa		185,000 - 230,000	185,000 - 230,000	185,000 - 230,000	555,000-690,000
Cyfanswm		585,000 - 630,000	585,000 - 630,000	585,000 - 630,000	1,766,000 - 1,901,000

¹Mae costau blynyddol parhaus am gymorth Llywodraeth Cymru wedi'u cynnwys yn yr amser i adrodd ar y strategaeth genedlaethol (gweler hefyd Tabl 1).

² Costau blynyddol parhaus swydd Comisiynydd a staff swyddfa arall.

Opsiwn 3 - Cyflwyno Bil Cynulliad i benodi Cynghorydd Cenedlaethol

194. Bydd y costau sy'n gysylltiedig â phenodi Cynghorydd Cenedlaethol annibynnol yn rhai i Lywodraeth Cymru. Mae'r costau'n gysylltiedig yn bennaf â chyflog y Cynghorydd ond bydd costau trosiannol hefyd yn gysylltiedig â recriwtio yn yr un modd ag Opsiwn 2.

195. Gan seilio'r amcangyfrif ar ymarfer recriwtio tebyg a gynhaliwyd cyn hyn o dan y broses penodiadau cyhoeddus, rhagwelir mai oddeutu £11,000 fydd y costau am recriwtio a phenodi. Mae hyn yn cynnwys y gost o hysbysebu'r swydd yn y wasg leol a chenedlaethol, penodi Cadeirydd Annibynnol i oruchwylio'r broses, sefydlu panel dewis, darparu cymorth gweinyddol drwy gydol y broses a threuliau ymgeiswyr.

196. Bydd Llywodraeth Cymru am ddenu ymgeiswyr sydd â phrofiad ac arbenigedd addas i roi cyngor ar sail gwybodaeth i Weinidogion Cymru fel y byddant yn gallu gosod yr agenda a datblygu polisi yn y sectorau hyn. Bydd angen i'r Cynghorydd Cenedlaethol gydweithio'n hyderus â Gweinidogion ac uwch-swyddogion yn holl adrannau Llywodraeth Cymru. Felly, er nad yw'n swydd yn y gwasanaeth sifil, fe aseswyd y rôl i bennu lefel cyflog, gan ystyried gofynion y rôl. Bydd costau cyflog blynyddol y Cynghorydd Cenedlaethol yn cael eu cynnwys yng nghyllideb rhaglen adrannol Llywodraeth Cymru, a bydd y cyflog o fewn Band Gweithredol 1 (Gradd 6) ar raddfa gyflog Llywodraeth Cymru, a'r cyflog cyfartalog blynyddol yn £58,000. Ar ôl cynnwys argostau (gan gynnwys cyfraniadau Yswiriant Gwladol a chostau pensiwn a TG), mae'r gost yn dod i tua £75,000 y flwyddyn. Fodd bynnag, byddai'r rôl yn cael ei chyflawni yn un o swyddfeydd Llywodraeth Cymru, felly ni fydd angen cyfleusterau

swyddfa ychwanegol, a bydd staff Llywodraeth Cymru yn rhoi cymorth gweinyddol fel na fydd angen adnoddau ychwanegol (y rhain yw'r ddau adnodd rhaglen amser llawn sydd wedi'u nodi yn Nhabl 1).

197. Rhagwelir y bydd gweddill y gost yn cynnwys costau teithio a chynhaliaeth sy'n gysylltiedig â swyddogaethau a dyletswyddau'r Cynghorydd Cenedlaethol.

198. Mae'r tabl yn dangos crynodeb o'r costau amcangyfrifedig ar gyfer penodi Cynghorydd Cenedlaethol.

Tabl 11. Crynodeb o gostau Opsiwn 3

	2014-15	2015-16	2016-17	2017-18	Cyfanswm
Llywodraeth Cymru (£)					
Cymorth a monitro ¹	0	0	0	0	0
Recriwtio Cynghorydd Cenedlaethol		11,000	0	0	11,000
Cynghorydd Cenedlaethol ²		54,000*	81,500	81,500	217,000
Cyfanswm		65,000	81,500	81,500	228,000

¹ Mae costau blynyddol parhaus am gymorth Llywodraeth Cymru wedi'u cynnwys yn yr amser i adrodd ar y strategaeth genedlaethol (gweler hefyd Tabl 1).

² Costau blynyddol parhaus swydd Cynghorydd Cenedlaethol.

199. Unwaith eto, mae'r amcangyfrif hwn o'r costau wedi'i seilio ar waith amser llawn gan y Cynghorydd Cenedlaethol ar faterion sy'n ymwneud â thrais ar sail rhywedd, cam-drin domestig a thrais rhywiol, felly y rhain yw'r costau uchaf posibl. Ni phenderfynwyd eto a oes angen rôl ran-amser ac, os oes, pa mor aml y byddai'n cael ei chyflawni.

Crynodeb o Gostau ar gyfer Deddfwriaeth

200. Mae'r tabl isod yn dangos crynodeb o'r costau ychwanegol o ddeddfu i gyflawni'r nodau polisi ar gyfer rhoi terfyn ar drais ar sail rhywedd, cam-drin domestig a thrais rhywiol. Mae'r tabl yn rhoi sylw i'r costau dros y pedair blynedd nesaf oherwydd dyma'r cyfnod amser a bennwyd yn y Fframwaith Hyfforddi Cenedlaethol, ond bydd rhai o'r costau hyn yn gostau blynyddol parhaus (fel y nodir yn y tabl). Cymerwyd y costau o rannau eraill o'r Asesiad Effaith Rheoleiddiol.

Tabl 12. Crynodeb o gostau ychwanegol y ddeddfwriaeth

	2014-15	2015-16	2016-17	2017-18	Cyfanswm
Llywodraeth Cymru (£)					
Paratoi Strategaeth Genedlaethol		11,950			11,950
Cefnogi gweithredu ¹		168,211	156,261	156,261	480,733
Fframwaith Hyfforddi Cenedlaethol	262,520	155,229	153,229	170,229	741,207
Gofyn a Gweithredu		116,490	122,000	122,000	360,490
Canllawiau i'r Fforymau Amlasiantaeth	8,400				8,400
Recriwtio Cynghorydd Cenedlaethol		11,000			11,000
Cynghorydd Cenedlaethol ²		54,000	81,500	81,500	217,000
Cyfanswm (£)	270,924	516,880	512,990	529,990	1,830,780
Awdurdodau Lleol a Byrddau Iechyd Lleol (£)					
Paratoi Strategaeth Leol			182,600		182,600
Adrodd ar y Strategaeth Leol ³				36,300	36,300
Cyfanswm (£)	0	0	182,600	36,300	218,900
Y Sector Cyhoeddus a'r Trydydd Sector (costau cyfle)⁴ (£)					
Fframwaith Hyfforddi Cenedlaethol	61,304	1,077,288	1,482,956	1,462,856	4,084,404
Gofyn a Gweithredu			923,000	923,000	1,846,000
Cyfanswm (£)	61,304	1,077,288	2,405,956	2,385,856	5,930,404

¹ Mae costau blynyddol parhaus am gymorth Llywodraeth Cymru wedi'u cynnwys yn yr amser i adrodd ar y strategaeth genedlaethol (gweler hefyd Tabl 1).

² Costau blynyddol parhaus swydd y Cynghorydd Cenedlaethol.

³ Costau blynyddol parhaus am adrodd ar y strategaethau lleol.

⁴ Mae'r costau hyn yn cynrychioli'r costau cyfle sy'n gysylltiedig â staff yn derbyn hyfforddiant a gallant gynnwys Llywodraeth Cymru, awdurdodau lleol a byrddau iechyd lleol

Manteision

201. Mae'r polisiau a ystyrir yn yr RIA hwn yn ymwneud â darparu gwybodaeth a sicrhau bod arweinyddiaeth a strategaethau priodol yn eu lle i geisio rhoi terfyn ar drais ar sail rhywedd, cam-drin domestig a thrais rhywiol. Ni fu modd darganfod effaith bosibl y cynigion ar nifer y digwyddiadau o drais ar sail rhywedd, cam-drin domestig neu drais rhywiol yng Nghymru ac o ganlyniad, ni fu modd gosod gwerth ar y manteision a gysylltir â'r cynigion. Am y rheswm hwn, rhaid i unrhyw benderfyniad fod yn seiliedig ar ystyriaethau mwy cyffredinol.
202. Mae ystyriaethau o'r fath yn cynnwys y posibilrwydd y byddai diffyg sail statudol yn ei gwneud yn fwy tebygol y byddai rhai cyrff yn methu â mabwysiadu strategaethau arferion gorau yn y maes hwn. Gallai fod canlyniadau andwyol i hyn, ond mae natur y posibilrwydd hwn yn golygu nad yw'n ymarferol rhoi tebygolrwydd meintiol iddo ar sail tystiolaeth wrthrychol. Mae profiad ehangach, er hynny, yn awgrymu ar draws meysydd polisi bod y siawns y bydd cyrff cyhoeddus yn methu â mabwysiadu arferion gorau ymhell o fod yn ddibwys. O gofio costau gweddol isel a difrifoldeb bosibl y canlyniadau andwyol yn yr achos presennol, gellir amddiffyn penderfyniad i fynd ati ar sail statudol yn y cyd-destun hwn.

A. Y Ddyletswydd i Baratoi ac Adrodd ar Strategaethau Cenedlaethol

Opsiwn 1 - Gwneud Dim / Parhau i Ddefnyddio Strategaethau Presennol

203. Fel y nodwyd yn yr adran ar gostau uchod, ni fyddai'r opsiwn hwn yn galw am ddefnyddio mwy o adnoddau o ran amser a chostau gan Lywodraeth Cymru, Awdurdodau Lleol na Byrddau Iechyd Lleol. Fodd bynnag, ni fyddai'n cyflawni'r nod polisi o hyrwyddo arweinyddiaeth genedlaethol, atebolrwydd a chydlyniaeth ar y lefel genedlaethol i ymdrin â materion sy'n ymwneud â thrais ar sail rhywedd, cam-drin domestig a thrais rhywiol.
204. Mae Llywodraeth Cymru wedi llunio strategaethau ynghylch trais yn erbyn menywod (sef y math mwyaf cyffredin o drais ar sail rhywedd) a cham-drin domestig er 2005. Y diweddaraf yw 'Strategaeth yr Hawl i fod yn Ddiogel' a gyhoeddwyd yn 2010 yr adroddir arni'n flynyddol³¹. Mae 'Strategaeth yr Hawl i fod yn Ddiogel' i'w chwblhau yn 2014 ac felly ni fyddai Strategaeth Genedlaethol gyffredinol ar waith wrth ddilyn yr opsiwn hwn. Fodd bynnag, mae angen o hyd am ddarparu arweinyddiaeth genedlaethol gryf a chyfeiriad strategol clir, yn ogystal â gweithredu ar sail polisi a thystiolaeth newydd yn y meysydd hyn.

³¹ <http://wales.gov.uk/topics/people-and-communities/safety/domestic-abuse/publications/besafe/?skip=1&lang=cy>

Opsiwn 2 - Cyhoeddi strategaeth nad yw'n ddeddfwriaethol

205. Fel y nodwyd yn opsiwn 1, mae Llywodraeth Cymru ar hyn o bryd yn cyflawni strategaethau sydd heb fod yn ddeddfwriaethol sy'n ymdrin â thrais yn erbyn menywod a cham-drin domestig, gan gynnwys 'Strategaeth yr Hawl i fod yn Ddiogel' a gyhoeddwyd yn 2010, felly nid oes manteision newydd yn yr opsiwn hwn heblaw dileu'r angen a'r gost am lunio deddfwriaeth newydd.
206. Byddai Strategaeth Genedlaethol newydd, wedi'i diweddarau, o'r math hwn yn gallu cwmpasu agweddau ychwanegol sydd heb eu cynnwys mewn strategaethau presennol, fel anffurfio organau cenhedlu benywod a phriodas dan orfod, a gallai gynnwys camau i gyflawni'r nodau polisi, a darparu cymorth i ddatblygu a gweithredu Strategaethau Lleol yn llwyddiannus. Fodd bynnag, ni fyddai'r opsiwn hwn yn brawf mor gryf o ymrwymiad ac arweiniad parhaus Llywodraeth Cymru wrth ymdrin â'r materion hyn. Ni fyddai dull o weithredu heb ddeddfu yn ymgorffori'r ymrwymiad i fabwysiadu Strategaeth Genedlaethol mewn statud. Hefyd, gellid ystyried bod camau i fabwysiadu Strategaeth Genedlaethol heb ddeddfu yn anghyson â dull deddfwriaethol ar lefel leol. Gallai hyn arwain yn ei dro at beidio ag ystyried bod y Strategaeth Genedlaethol yn un sy'n pennu'r cyfeiriad ar gyfer Strategaethau Lleol.

Opsiwn 3 - Cyflwyno Bil Cynulliad i Ymdrin â'r Amcanion Polisi

207. Bydd gofyniad mewn deddfwriaeth i fabwysiadu Strategaeth Genedlaethol yn brawf clir o arweinyddiaeth Llywodraeth Cymru a'i hymrwymiad i fynd i'r afael â thrais ar sail rhywedd, cam-drin domestig a thrais rhywiol ar gyfer y Llywodraeth hon a Llywodraethau'r dyfodol. Byddai Strategaeth Genedlaethol o'r fath yn gosod cyfeiriad strategol clir ar y lefel uchaf a byddai o gymorth i ddatblygu a gweithredu Strategaethau Lleol yn llwyddiannus.
208. Yn yr un modd ag opsiwn 2, gellid defnyddio Strategaeth Genedlaethol hefyd i geisio sicrhau bod Strategaethau Lleol yn cael eu harwain a'u hategu gan y dull cenedlaethol o ymdrin â thrais ar sail rhywedd, cam-drin domestig a thrais rhywiol. Mantais yr opsiwn hwn yw, os bydd y ddwy strategaeth yn ofyniad statudol, y bydd y ddwy'n dilyn diben cyffredin sydd wedi'i bennu yn y ddeddfwriaeth, a byddai hyn yn creu dull mwy cydlynol o weithredu. Byddai hyn yn helpu i gyflawni'r nod polisi o sicrhau ystyriaeth gyson i fecanweithiau ataliol, amddiffynnol a chefnogol wrth gyflenwi gwasanaethau.
209. Dangoswyd y budd o gael arweinyddiaeth gref yn yr Adroddiad ar 10,000 o Fywydau Mwy Diogel³². Nodwyd yn yr Adroddiad fod y prosiect wedi arwain at newidiadau effeithiol ar draws gwasanaethau'r sector cyhoeddus lle'r oedd cam-drin domestig yn fater strategol i'r Bwrdd Gwasanaethau Lleol.

³² Prosiect 10,000 o Fywydau Mwy Diogel – Gwella'r ffordd y mae gwasanaethau cyhoeddus yn atal cam-drin domestig, Llywodraeth Cymru, Ebrill 2012.

Yr opsiwn a ffefrir

210. Yr opsiwn a ffefrir yw opsiwn 3 - Cyflwyno Bil Cynulliad i Ymdrin â'r Amcanion Polisi.
211. Bydd yr opsiwn hwn yn helpu i gyflawni'r amcanion polisi yn ogystal â chodi proffil trais ar sail rhywedd, cam-drin domestig a thrais rhywiol yng Nghymru. Ar lefel strategol, bydd yn gosod cyfeiriad strategol clir, gan hyrwyddo cysondeb a'r arferion gorau wrth ymdrin â'r materion hyn ledled Cymru.

B. Y Ddyletswydd i Baratoi, Cyhoeddi ac Adrodd ar Strategaethau Lleol

Opsiwn 1 – Gwneud Dim

212. Nid oes manteision newydd yn yr opsiwn hwn gan na fydd yn newid y ffordd y mae Awdurdodau Lleol a Byrddau Iechyd Lleol yn ystyried ac yn ymdrin â materion sy'n ymwneud â thrais ar sail rhywedd, cam-drin domestig a thrais rhywiol ar hyn o bryd.
213. Cryfder y dull presennol o weithredu yw bod amrywiaeth eang o wasanaethau a chymorth arloesol sy'n adlewyrchu blaenoriaethau lleol. Fodd bynnag, heb drosolwg strategol clir, gall hyn arwain at beidio â rhannu'r arferion gorau ac at ddiffyg cysondeb a safonau amrywiol wrth ddarparu gwasanaethau. Fel y nodwyd ym Mhennod 7, y CIS yw'r brif ddogfen gynllunio strategol sydd gan yr Awdurdod Lleol ar hyn o bryd ac felly, o dan y ddeddfwriaeth bresennol, yn y ddogfen hon y byddai'n cynnwys unrhyw strategaethau sydd ganddo ar y pryd ynghylch trais ar sail rhywedd, cam-drin domestig a thrais rhywiol. Gan nad oes gofyniad statudol ar hyn o bryd i fabwysiadu strategaeth o'r fath, gall hyn arwain at ystyriaeth annigonol i'r materion hyn ar y cam cynllunio strategol.
214. Ni fyddai'r opsiwn hwn yn canolbwyntio'n glir ar drais ar sail rhywedd, cam-drin domestig a thrais rhywiol ar y lefel strategol, er mwyn sicrhau bod y materion hyn yn cael eu hystyried wrth gyflenwi gwasanaethau. Felly ni fyddai'n cyflawni'r nod polisi cyffredinol o wella ymateb y sector cyhoeddus datganoledig yng Nghymru i drais ar sail rhywedd, cam-drin domestig a thrais rhywiol.

Opsiwn 2 - Defnyddio Deddfwriaeth Bresennol i Gyflwyno Newid

215. Mae Awdurdodau Lleol o dan nifer o ddyletswyddau statudol ar hyn o bryd mewn cysylltiad â datblygu cynlluniau a strategaethau. Mae Gweinidogion Cymru wedi cyhoeddi canllawiau (Cydamcanu – Cydymdrechu (Penodau 2, 3, 5 ac Atodiad A)) ar lunio cynlluniau a threfniadau, monitro ac adolygu camau cyflawni, a gofynion deddfwriaethol y dyletswyddau statudol presennol ar gyfer cynllunio³³. Mantais yr opsiwn hwn yw, drwy wneud rheoliadau o dan ddeddfwriaeth bresennol i bennu bod ystyriaeth i'w rhoi i drais ar sail rhywedd, cam-drin domestig a thrais rhywiol, y byddai'n hawdd ei chynnwys yn y dull presennol o baratoi'r strategaethau hynny.
216. Er hynny, mae'r opsiwn hwn yn golygu defnyddio rheoliadau o dan nifer o Ddeddfau presennol, gan nad oes unrhyw Ddeddf benodol a fyddai'n darparu'n llawn ar ei phen ei hun ar gyfer cyflawni'r nodau polisi. Nid yw gweithredu fesul tipyn fel hyn yn debygol o gyflawni'r amcan polisi o ganolbwyntio'n strategol ar y materion hyn, oherwydd gallai'r amcan fynd ar goll yng nghyd-destun y gofynion deddfwriaethol ehangach yn y Ddeddfau presennol hyn.
217. Nid yw'r opsiwn hwn yn dangos ychwaith y pwys y mae Llywodraeth Cymru yn ei roi ar fynd i'r afael â thrais ar sail rhywedd, cam-drin domestig a thrais rhywiol ar lefel Genedlaethol a lefel Leol.

Opsiwn 3 - Cyflwyno Bil Cynulliad i Ymdrin â'r Amcanion Polisi

218. Y fantais o osod dyletswydd benodol ar Awdurdodau Lleol a Byrddau Iechyd Lleol i fabwysiadu Strategaeth Leol i fynd i'r afael â thrais ar sail rhywedd, cam-drin domestig a thrais rhywiol yw ei bod yn sicrhau bod y materion hyn yn cael eu hystyried drwy'r broses cynllunio strategol. Bydd hyn yn sicrhau arweinyddiaeth ac atebolrwydd ar gyfer ymdrin â'r materion hyn ar lefel leol. Bydd hyn wedyn yn codi proffil y materion hyn ar draws y sector cyhoeddus drwy sicrhau bod mecanweithiau ar gael i hyrwyddo ystyriaeth i'r materion hyn wrth gyflenwi gwasanaethau gan arwain, yn ei dro, at ymyriadau cynharach. Un fantais ychwanegol o gael gofyniad statudol yw y bydd yn gosod diben cyson i'w ddilyn mewn strategaethau mewn cysylltiad ag atal, amddiffyn a chefnogi.
219. Fel y nodwyd o'r blaen, y sefyllfa bresennol o ran Strategaethau Awdurdodau Lleol yw eu bod yn cael eu cyhoeddi'n rhan o'u CISau a'r dadansoddiadau o anghenion sy'n eu hategu (gweler Pennod 7). Fodd bynnag, nid yw pob un ohonynt yn ymdrin â materion sy'n ymwneud â thrais ar sail rhywedd, cam-drin domestig a thrais rhywiol gan nad oes gofyniad statudol penodol i wneud hynny. Gall hyn arwain at ystyriaeth anfoddfaol i'r materion hyn ar y cam cynllunio strategol ac at dargedu gwasanaethau mewn ffordd annigonol.

³³ Mae'r canllawiau wedi'u cyhoeddi o dan a45 o Fesur Llywodraeth Leol (Cymru) 2009, a40(7)(b) o Ddeddf y Gwasanaeth Iechyd Gwladol (Cymru) 2006, a25(8) o Ddeddf Plant 2004 ac a12 o Fesur Plant a Theuluoedd (Cymru) 2010.

220. Mae'r rhan fwyaf o'r dadansoddiadau o anghenion a gyhoeddwyd yn cynnwys rhywfaint o ystyriaeth i achosion a gofnodwyd o drais ar sail rhywedd, cam-drin domestig a thrais rhywiol (ac, yn y cyd-destun hwn, cam-drin domestig yw'r mater a ystyrir gan amlaf). Fodd bynnag, nid yw hyn yn cael ei wneud mewn ffordd gyson gan fod gwahanol awdurdodau'n defnyddio gwahanol setiau data (mae rhai'n defnyddio data'r heddlu, rhai'n defnyddio atgyfeiriadau at ddarparwyr gwasanaethau ayb.). Mae'r materion hyn wedi'u hystyried yn y dadansoddiadau o anghenion ar gyfer cynlluniau diweddar ond nid yw hyn yn arwain bob tro at eu cynnwys yn y cynllun ei hun, hyd yn oed os nodwyd bod nifer yr achosion wedi cynyddu.
221. Mantais yr opsiwn hwn a'r nod o osod dyletswydd statudol ar Awdurdodau Lleol a Byrddau Iechyd Lleol (ar y cyd) yw y bydd yn ymdrin yn benodol â'r diffyg hwn drwy sicrhau eu bod yn rhoi ystyriaeth ar y cyd i drais ar sail rhywedd, cam-drin domestig a thrais rhywiol drwy'r broses cynllunio strategol.
222. Mae tystiolaeth a gyflwynwyd yn Adroddiad Llywodraeth Cymru ar y prosiect 10,000 o Fywydau Mwy Diogel³⁴ yn dangos pa mor bwysig yw cyfeiriad strategol ac arweinyddiaeth wrth ymdrin â'r materion hyn. Nodwyd yn yr Adroddiad fod y prosiect wedi arwain at newidiadau effeithiol ar draws gwasanaethau'r sector cyhoeddus lle'r oedd cam-drin domestig yn fater strategol i'r Bwrdd Gwasanaethau Lleol. Mae dulliau llwyddiannus o fynd i'r afael â thrais ar sail rhywedd, cam-drin domestig a thrais rhywiol yn cael eu cysylltu ag ymatebion amlasiantaeth sy'n sicrhau bod gwasanaethau ac arbenigedd yr asiantaethau sy'n bartneriaid yn cael eu cynnwys wrth ddatblygu Strategaethau Lleol effeithiol.

Yr opsiwn a ffefrir

223. Yr opsiwn a ffefrir yw opsiwn 3 - Cyflwyno Bil Cynulliad i Ymdrin â'r Amcanion Polisi.
224. Byddai'r opsiwn hwn yn cyflawni'r nodau polisi drwy sicrhau bod Awdurdodau Lleol a Byrddau Iechyd Lleol yn canolbwyntio'n strategol ar drais ar sail rhywedd, cam-drin domestig a thrais rhywiol yn eu hardal leol, ac yn codi proffil y materion hyn ledled Cymru.

C. Pŵer i wneud Rheoliadau o dan Ddeddf Addysg 1996

Opsiwn 1 – Gwneud Dim

225. Ni fydd yr opsiwn hwn yn cyflawni'r nod polisi o wella'r trefniadau ar gyfer atal trais ar sail rhywedd, cam-drin domestig a thrais rhywiol yng Nghymru.

³⁴ Prosiect 10,000 o Fywydau Mwy Diogel – Gwella'r ffordd y mae gwasanaethau cyhoeddus yn atal cam-drin domestig, Llywodraeth Cymru, Ebrill 2012.

Opsiwn 2 – Rhoi'r pŵer i Weinidogion Cymru wneud Rheoliadau i'w gwneud yn ofynnol i Awdurdodau Lleol gyhoeddi gwybodaeth am weithgarwch addysgol yn eu hardaloedd

226. Mae'r opsiwn hwn yn cynnwys diwygio Deddf Addysg 1996 i ganiatáu i Weinidogion Cymru wneud rheoliadau i'w gwneud yn ofynnol i Awdurdodau Lleol gyhoeddi gwybodaeth am y ffordd y maent yn mynd i'r afael â'r materion hyn yn eu swyddogaethau addysg, gan gynnwys ysgolion. Bydd yr opsiwn hwn felly'n rhoi darlun cynhwysfawr i Weinidogion Cymru a'r Cynghorydd Cenedlaethol o'r ymyriadau sydd ar waith ledled Cymru a'r dystiolaeth a fydd yn sail i ofynion pellach yn y dyfodol.

227. Mantais yr opsiwn hwn yw y bydd yn cynnig sylfaen gadarn o dystiolaeth i sicrhau y caiff Awdurdodau Lleol eu dwyn i gyfrif am y camau sy'n cael eu cymryd yn eu hardaloedd, a fydd yn helpu i ddatblygu a gwella arferion a Strategaethau Lleol.

D. Pŵer i Gyhoeddi Canllawiau Statudol a'r Ddyletswydd i Ddilyn Canllawiau o'r fath

228. Ni fydd yr opsiwn hwn yn cyflawni'r nod polisi o wella cysondeb, ansawdd a chydgyssylltu wrth ddarparu gwasanaethau yng Nghymru.

Opsiwn 2 - Defnyddio Canllawiau Anstatudol i Gyflwyno Newid

229. O dan yr opsiwn hwn, cyhoeddir canllawiau anstatudol ar gyfer Awdurdodau Lleol, Byrddau Iechyd Lleol, Awdurdodau Tân ac Achub ac Ymddiriedolaethau GIG ar drais ar sail rhywedd, cam-drin domestig a thrais rhywiol.

230. Wrth ddefnyddio canllawiau anstatudol, ni fyddai'n ofynnol bod yr awdurdodau perthnasol yn dilyn y canllawiau ac, felly, gallent ddewis peidio â'u dilyn. Oherwydd hyn, mae'n bosibl na sicrhau'r manteision penodol o gael canllawiau cyson ar yr agweddau penodol sydd wedi'u disgrifio isod.

231. Fel y nodwyd yn yr adran ar gostau, nid yw'n glir ar hyn o bryd ar ba agweddau yn union y byddai canllawiau'n cael eu cyhoeddi i awdurdodau. Mae nifer o feysydd allweddol wedi'u crybwyll yn yr ymgynghoriad ar y Papur Gwyn ac mae Llywodraeth Cymru wedi paratoi canllawiau drafft enghreifftiol ar y rhain. Felly mae'r manteision isod wedi'u seilio ar y canllawiau drafft enghreifftiol hynny. Bydd yn ofynnol bod Llywodraeth Cymru yn ymgynghori â pha bersonau bynnag sy'n briodol yn ei barn hi cyn cyhoeddi canllawiau o dan y Ddeddf.

232. Y manteision o gyflwyno'r canllawiau yn unol â'r adran ar gostau yw:

Canllawiau ar y Fframwaith Hyfforddi Cenedlaethol

233. Mae'r Fframwaith Hyfforddi Cenedlaethol yn cael ei ddatblygu er mwyn hybu dull cyson o hyfforddi ledled Cymru i ymdrin â thrais ar sail rhywedd, cam-drin

domestig a thrais rhywiol. Mae manteision mawr i'r model lleadaenu rhanbarthol arfaethedig. Mae'n gwneud defnydd o'r arbenigedd presennol sydd ar gael yn y rhanbarthau ac, o'i reoli, ei fonitro a'i arwain yn briodol, bydd yn fodel cynaliadwy ar gyfer darparu lefelau'r Fframwaith Hyfforddi Cenedlaethol.

234. Y manteision o gyflwyno'r Fframwaith Hyfforddi Cenedlaethol yw:

- creu safon gofal sy'n gyson a dibynadwy ym mhob rhan o Wasanaeth Cyhoeddus Cymru ar gyfer y rheini sy'n profi effeithiau trais ar sail rhywedd, cam-drin domestig a thrais rhywiol drwy fframwaith hyfforddiant a chymhwysedd sydd wedi'i safoni'n genedlaethol ac wrth wneud hynny;
- cyfuno amrywiaeth o raglenni hyfforddi (sy'n amrywio o hyfforddiant sylfaenol i hybu ymwybyddiaeth ymhlith gweithlu'r Gwasanaeth Cyhoeddus cyfan i hyfforddiant sy'n ymwneud â rolau penodol ac ymgysylltu strategol ag arweinwyr) yn un adnodd sy'n cael ei ariannu a'i reoli'n ganolog.

Gofyn a Gweithredu

235. Prif amcan Gofyn a Gweithredu yw ei gwneud yn ofynnol bod gweithwyr proffesiynol perthnasol yn holi dioddefwyr posibl am y posibilrwydd o drais ar sail rhywedd, cam-drin domestig a thrais rhywiol mewn amgylchiadau penodol, a gweithredu ar sail hynny er mwyn lleihau dioddefaint a niwed sy'n digwydd o ganlyniad i drais a cham-drin.

236. Mae Gwasanaeth Cyhoeddus Cymru yn chwarae rhan hanfodol drwy gynorthwyo cleientiaid i ddatgelu achosion o gam-drin a chryfhau'r gwasanaethau ar eu cyfer. Mae angen dull mwy cyson o adnabod dioddefwyr, asesu risg ac atgyfeirio at wasanaethau priodol ledled Cymru.

237. Ar hyn o bryd, nid yw Gwasanaethau Cyhoeddus yng Nghymru yn dilyn protocolau rheolaidd neu gyson i adnabod achosion o drais ar sail rhywedd, cam-drin domestig a thrais rhywiol, i ymateb yn briodol i'r risgiau y mae pobl yn eu hwynebu, i'r effaith ar iechyd, i brofiad eu plant neu i atgyfeirio dioddefwyr at wasanaethau cymorth arbenigol. Oherwydd hyn, nid yw pobl sy'n dioddef yng nghyswllt y materion hyn yn cael eu hadnabod mewn llawer o achosion a byddant yn methu â derbyn gwasanaethau hanfodol sydd ar gael iddynt drwy Wasanaeth Cyhoeddus Cymru a'r sector arbenigol.

238. Mae holi cleifion am gam-drin mewn rhai lleoliadau gofal iechyd arbenigol yn cael ei ystyried yn arfer da gan weithwyr proffesiynol yn y meysydd hynny³⁵. Mae'r Sefydliad Cenedlaethol dros Ragoriaeth mewn Iechyd a Gofal (NICE) a Sefydliad Iechyd y Byd³⁶ yn argymhell defnyddio system o holi wedi'i dargedu (neu holi clinigol) ar draws gwasanaethau Iechyd a Gofal Cymdeithasol er mwyn adnabod achosion o gam-drin a thrais domestig, ac ymateb iddynt.

³⁵ NICE (2014)

³⁶ Canllawiau Sefydliad Iechyd y Byd ar ymateb i drais personol gan bartneriaid a thrais rhywiol yn erbyn menywod

239. Felly byddai darparu canllawiau i hybu dull gweithredu o'r fath yn arwain at y canlynol:

- mwy o hyder ar ran gweithwyr proffesiynol wrth adnabod a delio'n briodol ag achosion o drais ar sail rhywedd, cam-drin domestig a thrais rhywiol, a hefyd wrth adnabod anghenion cymhleth eraill sy'n ymwneud â materion fel iechyd meddwl a chamddefnyddio sylweddau;
- mwy o atgyfeiriadau ac ymyriadau ar gyfer y rheini sydd wedi'u hadnabod a fydd yn darparu cymorth arbenigol wedi'i seilio ar risg ac anghenion y cleient;
- ymgysylltu rhagweithiol, yn y pen draw, ar draws Gwasanaeth Cyhoeddus Cymru â'r rheini sy'n agored i niwed a heb eu hadnabod, ar y cyfle cyntaf, yn hytrach nag ymgysylltu adweithiol yn unig pan fo argyfwng;
- creu diwylliant ar draws Gwasanaeth Cyhoeddus Cymru lle y mae'r profiad o drais ar sail rhywedd, cam-drin domestig a thrais rhywiol yn faes busnes cydnabyddedig a lle y mae datgelu'n cael ei hybu, ei dderbyn a'i hwyluso.

240. Fel y nodwyd yn yr adran ar gostau, mae'n bosibl y bydd cynnydd yn nifer yr atgyfeiriadau ac ymyriadau yn arwain at fwy o alw ac felly at fwy o gost i Wasanaethau Cyhoeddus. Fodd bynnag, mae'r gost gynyddol hon yn cael ei gwrthbwysu gan y gostyngiad yng nghost y cynnyrch economaidd a gollir a'r gostyngiad yn y costau dynol ac emosiynol sy'n deillio o'r materion hyn.³⁷ Hefyd mae'r gostyngiad yn nifer yr achosion o drais domestig wedi'i briodoli'n rhannol i ddatblygiad Gwasanaethau Cyhoeddus a'r defnydd cynyddol ohonynt.

241. Mae gwaith ymchwil blaenorol yn awgrymu y bydd gwaith gwell o fewn y Gwasanaeth Cyhoeddus yn creu gostyngiad yng nghyfanswm y gost o drais domestig dros gyfnod cymharol fyr a fydd yn fwy na'r costau o gael nifer mwy o ddatgeliadau. Roedd adroddiad diweddar *Walby*³⁸ yn 2009 (ar ei hymchwil yn 2004) yn dangos bod cyfanswm y gost o drais domestig wedi gostwng £23 biliwn i tua £16 biliwn y flwyddyn a bod y gostyngiad hwn wedi digwydd yn rhannol o ganlyniad i ddatblygu Gwasanaethau Cyhoeddus a'r defnydd cynyddol ohonynt. Daeth i'r casgliad bod buddsoddi mewn Gwasanaethau Cyhoeddus i leihau trais domestig yn gost-effeithiol.

³⁷ Mae hefyd yn debygol bod yr amcangyfrif hwn o'r gostyngiad yn rhy fach gan ei fod yn ymwneud â thrais domestig yn unig ac nid mathau eraill o drais ar sail rhywedd fel trais rhywiol, Priodas dan Orfod neu Anffurfio Organau Cenhedlu Benywod.

³⁸ *Walby, S., The Cost of Domestic Violence: Up-date 2009.*

Canllawiau Fforymau Amlasiantaeth

242. Yn aml bydd nifer o anghenion gwahanol gan y rheini sy'n profi trais ar sail rhywedd, cam-drin domestig a thrais rhywiol sy'n galw am gyfres o ymyriadau gan wasanaethau amrywiol.

243. Mae nifer o enghreifftiau eisoes o Fforymau Amlasiantaeth sy'n gweithredu'n effeithiol ar sylfaen dystiolaeth gadarn. Fodd bynnag, ni fydd holl aelodau perthnasol y Gwasanaeth Cyhoeddus yn cymryd rhan yn gyson ym mhob un o'r Fforymau, ac nid ydynt bob amser yn cael atgyfeiriadau oddi wrth y gwasanaethau hynny. Bydd y canllawiau'n disgrifio sut y bydd Gwasanaethau Cyhoeddus yn cydweithio â Fforymau Amlasiantaeth er mwyn:

- cynyddu diogelwch y rheini sy'n profi effeithiau trais ar sail rhywedd, cam-drin domestig a thrais rhywiol;
- cynyddu diogelwch plant sy'n byw lle y mae trais ar sail rhywedd, cam-drin domestig a thrais rhywiol;
- dal y cyflawnwyr yn atebol am eu gweithredoedd;
- creu strategaethau atal effeithiol.

244. Dangoswyd bod ymateb amlasiantaeth cryf i'r rheini sy'n profi trais ar sail rhywedd, cam-drin domestig a thrais rhywiol yn gwella diogelwch y dioddefwyr, bod angen cynnwys nifer o asiantaethau a bod cysylltiad uniongyrchol rhwng nifer yr ymyriadau a gynigir i bob cleient a'i ddiogelwch ar ôl ymyriadau³⁹.

245. Yn syml, mae'r dystiolaeth yn dangos mai po fwyaf o wasanaethau ac ymyriadau a gyd-drefnir ar ran y dioddefwr, mwyaf tebygol yw hi y bydd y cam-drin y mae'n ei brofi'n dod i ben⁴⁰. Dangoswyd hefyd nad gwasanaethau arbenigol yn unig y mae ar ddiodesfwr eu hangen, ond 'model diogelwch parhaus' i ddiwallu'r nifer mawr o anghenion sy'n datblygu yn ystod y cyfnod o gam-drin.⁴¹ Nifer bach iawn o ddiodesfwr sy'n hysbysu'r heddlu a nifer llai byth sy'n cymryd camau drwy'r System Cyfiawnder Troseddol. Er bod ymateb cymunedol cydgysylltiedig yn sicrhau bod y System Cyfiawnder Troseddol yn diwallu anghenion yr holl ddiodesfwr sy'n ei defnyddio, mae'n cydnabod hefyd nad yw ond yn un agwedd ar ddull cydgysylltiedig ac effeithiol o weithredu. Mae gwasanaethau lechyd, Gwasanaethau Plant, Gwasanaethau Diogelu Oedolion Agored i Niwed, Addysg a Thai, yn ogystal â'r nifer mawr o asiantaethau gwirfoddol sy'n aml yn darparu cymorth arbenigol yn y maes hwn, yn hollbwysig er mwyn sicrhau ymateb effeithiol i drais ar sail rhywedd, cam-drin domestig a thrais rhywiol.

246. Y manteision o gyflwyno canllawiau ar Fforymau Amlasiantaeth yw:

³⁹ Howarth, E, et al., A, *Safety in Numbers: A Multi-Site Evaluation of Independent Domestic Violence Advisor Services*, Tachwedd 2009. <http://www.caada.org.uk/policy/research-and-evaluation.html> Cafwyd gwybodaeth gan Gynghorwyr Trais Domestig Annibynnol mewn 7 gwasanaeth mewn lleoliadau trefol, maestrefol a gwledig. Casglwyd gwybodaeth oddi wrth 2567 o ddiodesfwr yn y pwynt atgyfeirio ac oddi wrth 1247 ar derfyn y gwaith achos neu ar ôl 4 mis, pa un bynnag oedd gyntaf.

⁴⁰ *Ibid*

⁴¹ *Ibid*

- ffurfioli'r gyd-ddealltwriaeth sefydledig mai ymateb amlasiantaeth cydgysylltiedig yw'r unig ffordd effeithiol o ymateb i risgiau ac anghenion y rheini sy'n profi effeithiau trais ar sail rhywedd, cam-drin domestig a thrais rhywiol⁴²;
- cynnal proses y profwyd ei bod yn effeithiol o ran delio â thrais ar sail rhywedd, cam-drin domestig a thrais rhywiol, gwella canlyniadau i ddioddefwyr o ran diogelwch a lles, a chyfrannu at atal cam-drin, a'i bod yn cynnig manteision o ran cost.⁴³

Opsiwn 3 - Cyflwyno Bil Cynulliad i Ymdrin â'r Amcanion Polisi

247. O dan yr opsiwn hwn, bydd y Ddeddf yn darparu ar gyfer cyhoeddi canllawiau statudol i Awdurdodau Lleol, Byrddau Iechyd Lleol, Awdurdodau Tân ac Achub ac Ymddiriedolaethau GIG ar drais ar sail rhywedd, cam-drin domestig a thrais rhywiol.
248. Credir mai hwn yw'r mecanwaith mwyaf priodol a nodwyd ar gyfer darparu canllawiau ar agweddau fel hybu ymwybyddiaeth drwy addysg gyhoeddus, Gofyn a Gweithredu, hyfforddi staff, cydweithio amlasiantaeth a rhannu gwybodaeth.
249. Fel y nodwyd o'r blaen, nid yw'n glir ar hyn o bryd ar ba agweddau yn union y byddai canllawiau'n cael eu cyhoeddi i awdurdodau. Mae nifer o feysydd allweddol wedi'u crybwyll yn y Papur Gwyn ac mae Llywodraeth Cymru wedi paratoi canllawiau drafft enghreifftiol ar y rhain. Bydd y manteision penodol sy'n ymwneud â'r canllawiau drafft enghreifftiol a nodwyd o dan opsiwn 2 uchod yn gymwys hefyd i'r opsiwn hwn. Byddai Llywodraeth Cymru yn cynnal ymgynghoriad cyhoeddus cyn cyhoeddi canllawiau anstatudol neu statudol.
250. Yn ogystal â'r manteision a ddisgrifiwyd yn opsiwn 2, mantais ychwanegol yr opsiwn hwn yw y bydd dyletswydd ar yr awdurdodau perthnasol i ddilyn y canllawiau. Yr unig ffordd i awdurdod wyro oddi wrth y canllawiau fyddai drwy iddo bennu ffordd arall o gyflawni'r amcanion. Mewn amgylchiadau o'r fath, byddai'n rhaid i'r awdurdod gyhoeddi manylion y dull amgen o weithredu. Pe na byddai Gweinidogion Cymru yn cael eu hargyhoeddi bod y dull hwn o weithredu'n briodol, mae pŵer cyfarwyddo wrth gefn ar gael i Weinidogion Cymru o dan yr opsiwn hwn i fynnu bod awdurdodau'n dilyn y canllawiau. Felly mae hyn yn rhoi pwysigrwydd sylweddol i unrhyw ganllawiau a gyhoeddir o dan yr opsiwn hwn.
251. Bydd canllawiau o'r fath yn ei gwneud yn ofynnol rhoi arferion gorau ar waith ac yn helpu i hyrwyddo cysondeb a safonau ansawdd uchel ledled Cymru.

⁴² *Coordinated Community Response Model Online Toolkit*: <http://www.ccrm.org.uk/>

⁴³ *A Place of Greater Safety* – CAADA (2012). Mae'r gwasanaethau risg uchel ar draws y DU yn costio £70m i'w rhedeg ar hyn o bryd, ac am bob £1 a werir, caiff £2.90 ei arbed.

Yr Opsiwn a Ffefrir

252. Yr opsiwn a ffefrir yw opsiwn 3 - Cyflwyno Bil Cynulliad i Ymdrin â'r Amcanion Polisi
253. Byddai'r opsiwn hwn yn cyfrannu at gyflawni'r amcanion polisi drwy ddarparu cysondeb a sicrhau bod yr arferion gorau ar gyfer delio â'r materion hyn yn cael eu hyrwyddo ledled Cymru.

E. Penodi Cynghorydd Cenedlaethol – gan gynnwys y Swyddogaethau, Cynlluniau a Threfniadau Adrodd.

Opsiwn 1 – Gwneud Dim

254. Nid oes manteision ychwanegol yn gysylltiedig â'r opsiwn hwn.

Opsiwn 2 - Penodi Comisiynydd

255. Cafwyd cefnogaeth gyffredinol gan randdeiliaid mewn ymateb i'r Papur Gwyn drwy ymatebion ysgrifenedig ac yn y digwyddiadau ymgynghori o blaid cymryd camau gan Lywodraeth Cymru i ddelio â bylchau mewn arweinyddiaeth ar y lefel genedlaethol a'r lefel leol. Roedd nifer bach o randdeiliaid wedi dadlau o blaid sefydlu 'Hyrwyddwr' neu 'Gomisiynydd' i sicrhau bod yr holl wasanaethau ac asiantaethau'n cyrraedd safon ansawdd. Roedd dau ddeg pump o'r 124 a atebodd y cwestiwn yn uniongyrchol wedi galw am greu Comisiynydd.
256. Un o'r manteision mewn rôl o'r fath, a awgrymwyd gan randdeiliaid, yw y gallai helpu i sicrhau bod trais ar sail rhywedd, cam-drin domestig a thrais rhywiol yn dod yn flaenoriaeth ar draws y sector cyhoeddus. Gallai'r rôl fod yn allweddol hefyd drwy gynnig barn arbenigol er mwyn helpu i ddatblygu a gweithredu Strategaeth Genedlaethol gan Lywodraeth Cymru. Fodd bynnag, gellir cynnwys yr elfennau hyn yn rôl arfaethedig y Cynghorydd Cenedlaethol.
257. Fodd bynnag, byddai sefydlu Comisiynydd a chanddo bwerau trosolwg, fel yr oedd rhai ymatebwyr i'r ymgynghoriad am weld, yn galw am sefydlu Swyddfa Comisiynydd annibynnol. Gan nad oes strwythurau ar gael ar hyn o bryd i gynnal Swyddfa o'r fath, byddai hyn yn galw am sefydlu endid hollol newydd ynghyd â'r staff cymorth angenrheidiol. Mae'r gost am sefydlu endid o'r fath yn ormodol ac yn anghymesur â'r nodau polisi. Gan ystyried cylch gwaith penodol y swydd, mae modelau tebyg, fel un y Comisiynydd Plant yn Lloegr, yn costio mwy nag £1.4 miliwn y flwyddyn. Amcangyfrifir y bydd costau blynyddol y Comisiynydd arfaethedig ar gyfer Caethwasiaeth Fodern, ei staff cymorth a'r gweithgareddau rhwng £300,000 a £500,000.
258. Ar ôl ystyried y costau gormodol, y sail resymegol mewn polisi i rôl o'r fath yw y bydd yn cryfhau arweinyddiaeth ac atebolrwydd strategol. Er mwyn hybu'r Strategaethau Cenedlaethol a lleol, bydd angen cydweithio'n agos â Llywodraeth Cymru. Felly nid oes angen rôl gwbl annibynnol i gyflawni'r

amcanion polisi. Nid oes angen cyflawni swyddogaethau eraill sydd wedi'u cynnig gan ymatebwyr i'r ymgynghoriad drwy'r rôl hon, er enghraifft ystyried a chynrychioli achosion penodol, gan nad yw hyn yn rhoi'r trosolwg strategol sydd ei angen. Mae hefyd yn tresmasu ar rolau presennol eraill, fel un Ombwdsmon Gwasanaethau Cyhoeddus Cymru.

Opsiwn 3 - Cyflwyno Bil Cynulliad i Benodi Cynghorydd Cenedlaethol

259. Roedd yr ymgynghoriad ar y Papur Gwyn yn cynnig creu 'Cynghorydd Gweinidogol Annibynnol'. Roedd y swydd hon wedi'i chynnig fel un annibynnol, heb staff na swyddfeydd, a fyddai'n cydweithio'n uniongyrchol â Gweinidogion Cymru.

260. Roedd ymatebwyr wedi croesawu'r cynnig i greu swydd Cynghorydd Cenedlaethol, ac roedd 95 (o'r 124 a atebodd y cwestiwn yn uniongyrchol) yn cytuno â'r bwriad i greu'r rôl a'i swyddogaethau arfaethedig.

261. Yn yr un modd ag opsiwn 2, y prif fanteision o benodi i rôl arwain fel un y Cynghorydd Cenedlaethol yw:

- annog yr holl wasanaethau ac asiantaethau i gyrraedd safon ansawdd, hybu cydgysylltu gwasanaethau, monitro perfformiad, rhannu gwybodaeth a chasglu data;
- cynnig barn arbenigol i helpu i ddatblygu a gweithredu'r Strategaeth Genedlaethol. Byddai arbenigedd y Cynghorydd Cenedlaethol yn hanfodol i hyrwyddo'r amcanion a nodir yn y Strategaeth Genedlaethol ar draws Llywodraeth Cymru. Y bwriad yw sicrhau bod y profiad ac arbenigedd yn dylanwadu ar bob rhan o Lywodraeth Cymru gan helpu i ddatblygu polisïau a phenderfyniadau mwy cyson a chydlynol.
- darparu canolbwynt i sicrhau bod camau i ddelio â thrais ar sail rhywedd, cam-drin domestig a thrais rhywiol yn flaenoriaeth ar draws y sector cyhoeddus.
- ymdrin â materion sy'n ymwneud â diffyg cydlyniant strategol, diffyg cysondeb wrth weithredu a diffyg arweinyddiaeth ar y lefel Leol a'r lefel Genedlaethol yng Nghymru (a oedd wedi'u nodi yn Adroddiad y Grŵp Gorchwyl a Gorffen ac wedi'u cydnabod yn y Papur Gwyn);
- hybu a rhannu arferion da yn y dulliau o ddelio â thrais ar sail rhywedd, cam-drin domestig a thrais rhywiol.

262. Yn ogystal â hyn, mae penodi'r Cynghorydd drwy gyfrwng Deddf Cynulliad yn golygu y gellir ychwanegu swyddogaethau statudol mwy penodol at y rôl i sicrhau eu bod yn cyflawni nodau'r polisi. Er enghraifft, byddai'r rôl yn helpu Gweinidogion Cymru i hybu ymwybyddiaeth o'r materion sy'n gysylltiedig â delio â thrais ar sail rhywedd, cam-drin domestig a thrais rhywiol.

263. Byddai dyletswydd ar y Cynghorydd i adrodd i Weinidogion Cymru ar amllder penodedig i roi'r wybodaeth ddiweddaraf i Weinidogion Cymru am faterion yn y maes hwn. Byddai deiliad y swydd yn adrodd yn uniongyrchol i Weinidogion ar gynnydd ar gyflawni diben y Ddeddf i wella trefniadau ar gyfer atal trais ar sail rhywedd, cam-drin domestig a thrais rhywiol ac amddiffyn dioddefwyr pawb y mae cam-drin a thrais o'r fath yn effeithio arnynt.
264. Yn olaf, mae angen creu rôl cynghori statudol, a benodir gan Weinidogion Cymru, i sicrhau perchenogaeth ar y mater hwn ar lefel strategol. Mae ymdrin â materion sy'n ymwneud â thrais ar sail rhywedd, cam-drin domestig a thrais rhywiol yn fater cymhleth ac mae gwahanol asiantaethau'n gysylltiedig ag ef. Er hynny, nid oes asiantaeth sydd â chyfrifoldeb arweiniol am y mater hwn yng Nghymru ar hyn o bryd.
265. Disgrifiwyd y manteision o gael rôl arwain o'r fath yn yr Adroddiad ar 10,000 o Fywydau Mwy Diogel⁴⁴ ac roedd adroddiad Robinson⁴⁵, a gydnabu fod bwch arweinyddiaeth mewn perthynas â cham-drin domestig a materion mwy cyffredinol sy'n ymwneud â thrais yn erbyn menywod (y math mwyaf cyffredin o drais ar sail rhywedd) a thrais rhywiol. Fel y nododd Robinson et al. yn eu casgliad:

“Mae dirfawr angen arweinyddiaeth oherwydd mae tystiolaeth o arfer da ond nid oes unrhyw un ar lefel uwch i gymryd cyfrifoldeb am sefydlu hyn ledled Cymru. Mae angen arweinyddiaeth oherwydd mae llawer o'r materion yn rhai sensitif, annymunol na chânt eu dwyn i sylw gweithwyr proffesiynol rheng flaen na'r rhan fwyaf o ddinasyddion. Mae arweinyddiaeth yn hanfodol i drosi polisiau a strategaethau yn fathau o wasanaethau a fydd yn gwneud gwahaniaeth ar lawr gwlad, drwy gynllunio effeithiol, cefnogi gweithwyr proffesiynol rheng flaen a sicrhau bod digon o adnoddau ganddynt. I gloi, mae angen arweinyddiaeth oherwydd rhaid i ymrwymiad Llywodraeth Cymru yn y maes hwn, fel y nododd y fenter ddeddfwriaethol hon, arwain at raglen newid effeithiol a chynaliadwy.”

Yr Opsiwn a Ffefrir

266. Yr opsiwn a ffefrir yw opsiwn 3 - Cyflwyno Bil Cynulliad i Benodi Cynghorydd Cenedlaethol.
267. Mae angen creu rôl cynghori statudol, a benodir gan Weinidogion Cymru, i sicrhau perchenogaeth ar y mater hwn ar lefel strategol. Byddai'r rôl hefyd yn ceisio gwella'r cydweithio ar lefel weithredol, o fewn ac ar draws adrannau llywodraeth ac yn y strwythurau rhanbarthol sydd wedi'u nodi.
268. Oherwydd natur drawsbynciol y maes polisi hwn, barnwyd mai ymgorffori'r rôl mewn statud oedd y ffordd orau o gyflawni'r amcan polisi allweddol o

⁴⁴ Llywodraeth Cymru, *Prosiect 10,000 o Fywydau Mwy Diogel: Adroddiad Terfynol* (Ebrill, 2012)

⁴⁵ Robinson, A., Brisbane, J., Farrar, J., Hardy, P., Jones, B., Pickles, J., a Shepherd, J., 'Bil Rhoi Terfyn ar Drais yn Erbyn Menywod a Cham-drin Domestig (Cymru)' arfaethedig Llywodraeth Cymru: *Argymhellion o'r Grŵp Gorchwyl a Gorffen* (24 Awst, 2012)

sicrhau bod y materion hyn yn rhan o fusnes craidd y Sector Cyhoeddus cyfan. Cyflawnir hyn drwy ddeddfwriaeth a fydd yn gosod dyletswydd ar Weinidogion Cymru i benodi Cynghorydd o'r fath. Byddai'r Cynghorydd yn helpu Gweinidogion Cymru i ddatblygu unrhyw bolisi sy'n effeithio ar y materion hyn.

269. Hefyd, drwy ymgorffori'r rôl mewn statud, bydd gan y Cynghorydd yr awdurdod a'r hygredd sydd eu hangen i gydweithio ag Awdurdodau Lleol, Byrddau Iechyd Lleol a rhanddeiliaid allweddol eraill i sicrhau bod y dyletswyddau eraill yn y Ddeddf yn cael eu cyflawni'n effeithiol. Drwy greu swydd o'r fath mewn deddfwriaeth, bydd modd addasu'r rôl ar gyfer y dyfodol gan gydnabod yr angen am ymrwymiad polisi a chynllunio hirdymor i ddelio â'r materion hyn.

Crynodeb

Yr Opsiwn Cyffredinol a Ffeirir

270. Cyflwyno Bil Cynulliad i Ddarparu ar gyfer y Nodau Polisi uchod.

271. Amcan cyffredinol y Ddeddf yw gwella ymateb y Sector Cyhoeddus yng Nghymru i drais ar sail rhywedd, cam-drin domestig a thrais rhywiol. Y bwriad yw y bydd yn canolbwyntio'n strategol ar y materion hyn ac yn sicrhau ystyriaeth gyson i fecanweithiau ataliol, amddiffynnol a chefnogol wrth gyflenwi gwasanaethau.

272. Mae trais ar sail rhywedd, cam-drin domestig a thrais rhywiol yn faterion sy'n guddiedig o hyd, a'r graddau y maent yn digwydd heb gael ei ddwyn i sylw'r cyhoedd am gyfnod rhy hir. Yn ogystal â'r manteision sydd wedi'u nodi ar gyfer opsiwn 3 o dan bob un o'r prif nodau polisi, y fantais gyffredinol yw y bydd y Ddeddf yn cynnwys, am y tro cyntaf mewn un lle, fframwaith deddfwriaethol Llywodraeth Cymru ar gyfer ymdrin â materion sy'n ymwneud â thrais ar sail rhywedd, cam-drin domestig a thrais rhywiol yng Nghymru drwy eu hatal ac amddiffyn a chefnogi dioddefwyr. Mae hefyd yn rhoi'r grym deddfwriaethol i sicrhau na fydd y meysydd hyn yn mynd yn ddisylw yn y dyfodol.

273. Yn olaf, o ran manteision a chostau, fel y dangoswyd yn Rhan 1 o'r Memorandwm Esboniadol hwn, mae'r canlyniadau dinistriol i'r unigolyn a'r teulu o drais domestig wedi'u mesur gan Sylvia Walby⁴⁶. Mae amcangyfrifon a seilir ar boblogaeth sy'n cael eu cymhwyso i adroddiad Walby yn awgrymu mai £303.5m yw cost trais domestig i Gymru bob blwyddyn - £202.6m mewn costau gwasanaethau a £100.9m i allbwn economaidd sy'n cael ei golli. Nid yw'r ffigurau hyn yn cynnwys unrhyw elfen o gostau dynol ac emosiynol, sydd yn ôl yr ymchwil yn costio £522.9m⁴⁷ ychwanegol i Gymru. Mae hyn yn rhoi cyfanswm ffigur o £826.4m. Nid yw'r ffigurau hyn yn cynnwys mathau eraill o drais ar sail rhywedd neu drais rhywiol - sydd hefyd yn arwain at gostau sylweddol, dynol, emosiynol ac ariannol i gymdeithas. Mae Walby yn dadlau, yn

⁴⁶ Walby, S., *The Cost of Domestic Violence: Up-date 2009*.

⁴⁷ Gweler paragraff 11

seiliedig ar gostau ariannol sylweddol cam-drin domestig i'r economi, bod y buddsoddiad ychwanegol mewn gwasanaethau cyhoeddus i leihau trais domestig yn gost-effeithiol.

274. Yn ôl yr amcangyfrif, costau ychwanegol y Ddeddf hon yw rhwng £1.1 miliwn a £2.2 miliwn y flwyddyn yn ystod y pedair blynedd ariannol nesaf (2015-16 i 2018-19). Mae angen gosod y costau hyn yng nghyd-destun yr amcangyfrif o gost flynyddol cam-drin domestig yng Nghymru (a nodir uchod). Er na fu modd meintoli'r manteision a gysylltir â'r cynigion hyn, mae'n dilyn mai dim ond effaith weddol fach y byddai angen ei gweld yn nifer a/neu ddifrifoldeb achosion o drais ar sail rhywedd, cam-drin domestig neu drais rhywiol i fanteision y cynigion fod yn drech na'r costau ychwanegol.

9. Adolygu ar ôl gweithredu

275. Prif nod polisi Llywodraeth Cymru yn y maes hwn yw lleihau trais ar sail rhywedd, cam-drin domestig a thrais rhywiol. Mae'r Ddeddf yn cefnogi'r nod hwn drwy geisio cael gwell ymateb gan y Sector Cyhoeddus i drais ar sail rhywedd, cam-drin domestig a thrais rhywiol. Prif nodau'r Ddeddf yw gwella'r trefniadau i :

- i) hyrwyddo ymwybyddiaeth o drais ar sail rhywedd, cam-drin domestig a thrais rhywiol, ac atal, amddiffyn a chefnogi'r dioddefwyr;
- ii) cryfhau'r arweinyddiaeth strategol a'r atebolrwydd am drais ar sail rhywedd, cam-drin domestig a thrais rhywiol; a
- iii) gwella cysondeb, ansawdd a chydgyssylltedd darparu gwasanaethau yng Nghymru.

276. Yn ein strategaeth genedlaethol byddwn yn monitro cynnydd trwy gyfrwng cyfres o Ddangosyddion Cenedlaethol:

277. Yn unol â'r trefniadau ar gyfer monitro'r prosiect 10,000 o Fywydau Diogelach, dynodir amrediad o fesurau i fonitro cynnydd yn erbyn y polisi hwn. Gellir rhannu'r rhain yn ddwy brif gyfres:

- **Dangosyddion poblogaeth** sy'n helpu i fesur i ba raddau y sicheir canlyniad ac i roi cyd-destun. Nodweddir y gyfres hon gan gytundeb a pherchenogaeth. Cydnabyddir na ellir galw'r un sefydliad unigol i gyfrif am sicrhau canlyniadau fel "mae pobl yn ddiogel ac yn teimlo'n ddiogel". Mae'n annhebygol felly y gallwn ddisgwyl newid amlwg mewn dangosyddion poblogaeth y gellir ei briodoli'n uniongyrchol i gynlluniau dan arweiniad Llywodraeth Cymru neu a noddir ganddi, yn enwedig yn y tymor byr. Er hynny, mae gan Lywodraeth Cymru a'r partneriaid y mae'n eu noddi i gyd ran i'w chwarae a gall y gweithgaredd hwn gael effaith ar duedd dangosydd poblogaeth, ynghyd â llawer o sefydliadau a ffactorau eraill.
- **Mesurau perfformiad** fel mesur o faint a wneir, pa mor dda y mae rhaglen, asiantaeth neu system wasanaethau'n gweithio ac, yn allweddol, a oes unrhyw un yn elwa o ganlyniad. Mae'r dull hwn yn ein galluogi i alw partneriaid i gyfrif am beth y maent wedi cytuno i'w ddarparu o ran polisiâu, gwasanaethau a rhaglenni unigol a fydd yn gwneud gwahaniaeth i'w poblogaeth o gleientiaid.

278. Sylweddolir bod asesu'r polisi'n heriol. At ei gilydd mae'n debygol y bydd yn anodd dirnad canlyniadau mesuredig yn niffyg sefyllfa wrthffeithiol (sef amcangyfrif o beth fyddai wedi digwydd oni bai am wahanol ymyriadau). Er hynny, gellir gwerthuso gweithredu drwy werthusiadau proses. Mae'r math hwn o werthusiad yn ceisio deall y broses o weithredu a gwireddu'r polisi, a bydd yn cynnwys asesiadau o'i effeithiolrwydd. Mae cynigion ar gyfer fframwaith gwerthuso'n cael eu datblygu.

RHAN 3 – DOLENNI AT ASESIADAU EFFAITH

279. Isod darperir y dolenni at yr asesiadau effaith canlynol sydd wedi cael eu cwblhau mewn perthynas â'r Ddeddf ac sydd ar gael ar wefan Llywodraeth Cymru os oes angen gwybodaeth bellach am y meysydd hyn:

Asesiad o'r Effaith ar Gydraddoldeb

Asesiad o'r Effaith ar Hawliau Plant

Asesiad o'r Effaith ar Breifatrwydd

Asesiad o'r Effaith ar y Gymraeg

Asesiad o'r Effaith ar Ddatblygu Cynaliadwy

Asesiad o'r Effaith ar yr Hidlydd Asesu Cystadleuaeth

Asesiad o'r Effaith ar Brawfesur Polisiâu Gwledig

<http://wales.gov.uk/legislation/programme/assemblybills/domestic-abuse/?lang=cy>

ATODIAD 1 – Crynodeb o gostau'r Fframwaith Hyfforddi Cenedlaethol

Crynodeb o gostau'r Fframwaith Hyfforddi Cenedlaethol

<u>Blwydd-yn</u>	<u>Lefel hyfforddiant</u>	<u>Gweithgaredd</u>	<u>Costau untro (£)</u>	<u>Costau rhaglenni Llyw. Cymru (£)</u>	<u>Costau cyfle i'r Gwasanaeth Cyhoeddus (£)</u>	<u>Costau ariannu rhaglenni hyfforddi rhanbarthol 1.2 a 3 (£)</u>	<u>Cyfanswm costau (heb gynnwys costau cyfle) (£)</u>	<u>Cyfanswm costau gan gynnwys costau cyfle (£)</u>	<u>Cyfanswm gwariant Llywodraeth Cymru (heb gynnwys costau rhaglenni) (£)</u>
Blwydd-yn 1 (2014-2015)	Pawb	Llunio canllawiau	0	14,052	0	0	£14,052	£14,052	0
	1	Llunio a datblygu rhaglen e-ddysgu ac ymgyrch hybu ymwybyddiaeth. Rhoi'r rhaglen ar waith yn ddwys ac annog uwch arweinwyr y	40,560	7,026	0	0	£47,586	£47,586	40,560

<u>Blwydd- yn</u>	<u>Lefel hyffordd iant</u>	<u>Gweithgaredd</u>	<u>Costau untro (£)</u>	<u>Costau rhaglenni Llyw. Cymru (£)</u>	<u>Costau cyfle i'r Gwasanaeth Cyhoeddus (£)</u>	<u>Costau ariannu rhaglenni hyfforddi rhanbarthol 1.2 a 3 (£)</u>	<u>Cyfanswm costau (heb gynnwys costau cyfle) (£)</u>	<u>Cyfanswm costau gan gynnwys costau cyfle (£)</u>	<u>Cyfanswm gwariant Llywodraeth Cymru (heb gynnwys costau rhaglenni) (£)</u>
		Gwasanaeth Cyhoeddus i gynnwys yr amcan o gwblhau'r rhaglen yn yr ymrwymiadau amser ar gyfer dysgu a datblygu sefydliadol ac, yn y tymor hwy, mewn hyfforddiant cynefino.							
	2	Llunio a datblygu cynnyrch hyfforddi a chynllun cyflawni, gan integreiddio	0	11,710	0	0	£11,710	£11,710	0

<u>Blwydd- yn</u>	<u>Lefel hyffordd iant</u>	<u>Gweithgaredd</u>	<u>Costau untro (£)</u>	<u>Costau rhaglenni Llyw. Cymru (£)</u>	<u>Costau cyfle i'r Gwasanaeth Cyhoeddus (£)</u>	<u>Costau ariannu rhaglenni hyfforddi rhanbarthol 1.2 a 3 (£)</u>	<u>Cyfanswm costau (heb gynnwys costau cyfle) (£)</u>	<u>Cyfanswm costau gan gynnwys costau cyfle (£)</u>	<u>Cyfanswm gwariant Llywodraeth Cymru (heb gynnwys costau rhaglenni) (£)</u>
		hyfforddiant yn y pecynnau hyfforddi presennol							
	3	Dim gweithgarwch	0	0	0	0	£0	£0	0
		Hyfforddiant i 48 o Gynghorwyr Trais Domestig Annibynnol ledled Cymru.	104,000	0	45,024	0	£104,000	£149,024	104,000
		Hyfforddiant Cynghorwyr Trais Rhywiol Annibynnol?	0	0	0	0	£0	£0	0
	4	Mapio a chynllun cyflawni ar gyfer hyfforddiant mewn pynciau	14,875	0	0		£14,875	£14,875	14,875

<u>Blwydd- yn</u>	<u>Lefel hyffordd iant</u>	<u>Gweithgaredd</u>	<u>Costau untro (£)</u>	<u>Costau rhaglenni Llyw. Cymru (£)</u>	<u>Costau cyfle i'r Gwasanaeth Cyhoeddus (£)</u>	<u>Costau ariannu rhaglenni hyfforddi rhanbarthol 1.2 a 3 (£)</u>	<u>Cyfanswm costau (heb gynnwys costau cyfle) (£)</u>	<u>Cyfanswm costau gan gynnwys costau cyfle (£)</u>	<u>Cyfanswm gwariant Llywodraeth Cymru (heb gynnwys costau rhaglenni) (£)</u>
		arbenigol ledled Cymru a chreu cysondeb							
		Hyfforddiant Cynadleddau Amlasiantaeth Asesu Risg ar gyfer BILI	17,640				-	-	17,640
		Hyfforddiant trais er anrhydedd ar gyfer heddluoedd Cymru	40,000				-	-	40,000
	5	Lansio gweithgarwch hyfforddi	39,445	1,171	16,820	0	£40,616	£56,896	39,445

<u>Blwydd- yn</u>	<u>Lefel hyffordd iant</u>	<u>Gweithgaredd</u>	<u>Costau untro (£)</u>	<u>Costau rhaglenni Llyw. Cymru (£)</u>	<u>Costau cyfle i'r Gwasanaeth Cyhoeddus (£)</u>	<u>Costau ariannu rhaglenni hyfforddi rhanbarthol 1.2 a 3 (£)</u>	<u>Cyfanswm costau (heb gynnwys costau cyfle) (£)</u>	<u>Cyfanswm costau gan gynnwys costau cyfle (£)</u>	<u>Cyfanswm gwariant Llywodraeth Cymru (heb gynnwys costau rhaglenni) (£)</u>
	6	Datblygu a gweithredu Cyfres Cryfhau Arweinyddiaeth	6,000	2,891			£8,891	£8,891	6,000
Cyfanswm Blwyddyn 1			262,520	36,850	61,304	0	241,730	303,034	262,520
Blwydd- yn 2 (2015- 2016)	1	Cynnig y rhaglen e-ddysgu i bob cyflogai newydd yn hyfforddiant cynefino'r Gwasanaeth Cyhoeddus.		2,342	994,000		£2,342	£996,342	0
	2	Datblygu hyfforddiant, lansio'r model hyfforddi rhanbarthol a dechrau	£116,490.00	11,710		-	£128,200	£128,200	116,490

<u>Blwydd- yn</u>	<u>Lefel hyffordd iant</u>	<u>Gweithgaredd</u>	<u>Costau untro (£)</u>	<u>Costau rhaglenni Llyw. Cymru (£)</u>	<u>Costau cyfle i'r Gwasanaeth Cyhoeddus (£)</u>	<u>Costau ariannu rhaglenni hyfforddi rhanbarthol 1.2 a 3 (£)</u>	<u>Cyfanswm costau (heb gynnwys costau cyfle) (£)</u>	<u>Cyfanswm costau gan gynnwys costau cyfle (£)</u>	<u>Cyfanswm gwariant Llywodraeth Cymru (heb gynnwys costau rhaglenni) (£)</u>
		gwerthuso							
		Gweithgarwch gyda Chyngor Gofal Cymru ar gyfer integreiddio â'r rhaglen CPEL.		2,342			£2,342	£2,342	0
	3	Datblygu hyfforddiant, lansio'r model hyfforddi rhanbarthol a dechrau gwerthuso	40,000		44,496	12229	£40,000	£84,496	52,229
	4	Cynllun cyflawni ar gyfer hyfforddiant mewn pynciau arbenigol ledled Cymru		2,342			£2,342	£2,342	0

<u>Blwydd- yn</u>	<u>Lefel hyffordd iant</u>	<u>Gweithgaredd</u>	<u>Costau untro (£)</u>	<u>Costau rhaglenni Llyw. Cymru (£)</u>	<u>Costau cyfle i'r Gwasanaeth Cyhoeddus (£)</u>	<u>Costau ariannu rhaglenni hyfforddi rhanbarthol 1.2 a 3 (£)</u>	<u>Cyfanswm costau (heb gynnwys costau cyfle) (£)</u>	<u>Cyfanswm costau gan gynnwys costau cyfle (£)</u>	<u>Cyfanswm gwariant Llywodraeth Cymru (heb gynnwys costau rhaglenni) (£)</u>
			67,000	0	22,512	0	£67,000	£89,512	67,000
		Hyfforddiant DPP arbenigol		0	0	0	£0	£0	0
	5	Darpariaeth barhaus	30,000	0	16,280	0	£30,000	£46,280	30,000
	6	Datblygu a gweithredu cynllun ymgysylltu strategol ar gyfer arweinwyr y Gwasanaeth Cyhoeddus o dan arweiniad y Cynghorydd Cenedlaethol	6,000	1,652			£7,652	£7,652	6,000
Cyfanswm Blwyddyn 2			259,490	20,388	1,077,288	12,229	279,878	1,357,166	271,719

<u>Blwydd- yn</u>	<u>Lefel hyffordd iant</u>	<u>Gweithgaredd</u>	<u>Costau untro (£)</u>	<u>Costau rhaglenni Llyw. Cymru (£)</u>	<u>Costau cyfle i'r Gwasanaeth Cyhoeddus (£)</u>	<u>Costau ariannu rhaglenni hyfforddi rhanbarthol 1.2 a 3 (£)</u>	<u>Cyfanswm costau (heb gynnwys costau cyfle) (£)</u>	<u>Cyfanswm costau gan gynnwys costau cyfle (£)</u>	<u>Cyfanswm gwariant Llywodraeth Cymru (heb gynnwys costau rhaglenni) (£)</u>
Blwydd- yn 3 (2016- 2017)	1	Cynnig y rhaglen e-ddysgu i bob cyflogai newydd yn hyfforddiant cynefino'r Gwasanaeth Cyhoeddus.		2,342	1,292,200		£2,342	£1,294,542	0
	2	Parhau â'r model hyfforddi rhanbarthol (a gwerthuso)	19,672	11,710	922,987	101,916	£31,382	£954,369	121,588
	3	Parhau â'r model hyfforddi rhanbarthol	40,000		44,496	12,229	£40,000	£84,496	52,229
	4	Cynllun cyflawni ar gyfer hyfforddiant	0	2,342	0	0	£2,342	£2,342	0

<u>Blwydd- yn</u>	<u>Lefel hyffordd iant</u>	<u>Gweithgaredd</u>	<u>Costau untro (£)</u>	<u>Costau rhaglenni Llyw. Cymru (£)</u>	<u>Costau cyfle i'r Gwasanaeth Cyhoeddus (£)</u>	<u>Costau ariannu rhaglenni hyfforddi rhanbarthol 1.2 a 3 (£)</u>	<u>Cyfanswm costau (heb gynnwys costau cyfle) (£)</u>	<u>Cyfanswm costau gan gynnwys costau cyfle (£)</u>	<u>Cyfanswm gwariant Llywodraeth Cymru (heb gynnwys costau rhaglenni) (£)</u>
		mewn pynciau arbenigol ledled Cymru							
				0		0	£0	£0	0
	Hyfforddiant DPP arbenigol			0		0	£0	£0	0
			65,500		87,100		£65,000	£152,100	65,000
	5	Parhau i ddarparu?	30,000	0	16,280	0	£30,000	£46,280	30,000
	6	Datblygu a gweithredu cynllun ymgysylltu strategol ar gyfer arweinwyr y Gwasanaeth Cyhoeddus o dan arweiniad	6,000	1,652		0	£7,652	£7,652	6,000

<u>Blwydd- yn</u>	<u>Lefel hyffordd iant</u>	<u>Gweithgaredd</u>	<u>Costau untro (£)</u>	<u>Costau rhaglenni Llyw. Cymru (£)</u>	<u>Costau cyfle i'r Gwasanaeth Cyhoeddus (£)</u>	<u>Costau ariannu rhaglenni hyfforddi rhanbarthol 1.2 a 3 (£)</u>	<u>Cyfanswm costau (heb gynnwys costau cyfle) (£)</u>	<u>Cyfanswm costau gan gynnwys costau cyfle (£)</u>	<u>Cyfanswm gwariant Llywodraeth Cymru (heb gynnwys costau rhaglenni) (£)</u>
		y Cynghorydd Cenedlaethol							
Cyfanswm Blwyddyn 3			160,672	18,046	2,363,063	114,145	178,718	2,541,781	274,817
Blwydd- yn 4 (2017- 2018) CYLLID DANG- OSOL	1	Cynnig y rhaglen e- ddysgu i bob cyflogai newydd yn hyfforddiant cynefino'r Gwasanaeth Cyhoeddus ynghyd ag adolygu'r rhaglen	15,000	2,342	1,292,200		£17,342	£1,309,542	15,000
	2	Parhau â'r model hyfforddi rhanbarthol (a gwerthuso)	19,672	11,710	922,987	101,916	£31,382	£954,369	121,588

<u>Blwydd- yn</u>	<u>Lefel hyffordd iant</u>	<u>Gweithgaredd</u>	<u>Costau untro (£)</u>	<u>Costau rhaglenni Llyw. Cymru (£)</u>	<u>Costau cyfle i'r Gwasanaeth Cyhoeddus (£)</u>	<u>Costau ariannu rhaglenni hyfforddi rhanbarthol 1.2 a 3 (£)</u>	<u>Cyfanswm costau (heb gynnwys costau cyfle) (£)</u>	<u>Cyfanswm costau gan gynnwys costau cyfle (£)</u>	<u>Cyfanswm gwariant Llywodraeth Cymru (heb gynnwys costau rhaglenni) (£)</u>
	3	Parhau â'r model hyfforddi	40,000		44,496	12,229	£40,000	£84,496	52,229
	4	Cynllun cyflawni ar gyfer hyfforddiant mewn pynciau arbenigol ledled Cymru	0	2,342	0	0	£2,342	£2,342	0
				67,000		89,780		£67,000	£156,780
	5	Parhau â'r gweithgarwch	30,000	0	16,280	0	£30,000	£46,280	30,000
	6	Datblygu a gweithredu cynllun ymgysylltu strategol ar gyfer arweinwyr y Gwasanaeth	6,000	1,652		0	£7,652	£7,652	6,000

<u>Blwydd- yn</u>	<u>Lefel hyffordd iant</u>	<u>Gweithgaredd</u>	<u>Costau untro (£)</u>	<u>Costau rhaglenni Llyw. Cymru (£)</u>	<u>Costau cyfle i'r Gwasanaeth Cyhoeddus (£)</u>	<u>Costau ariannu rhaglenni hyfforddi rhanbarthol 1.2 a 3 (£)</u>	<u>Cyfanswm costau (heb gynnwys costau cyfle) (£)</u>	<u>Cyfanswm costau gan gynnwys costau cyfle (£)</u>	<u>Cyfanswm gwariant Llywodraeth Cymru (heb gynnwys costau rhaglenni) (£)</u>
		Cyhoeddus o dan arweiniad y Cyngorydd Cenedlaethol							
Cyfanswm Blwyddyn 4			177,672	18,046	2,365,743	114,145	195,718	2,561,461	291,817
Cyfanswm dros 4 blynedd			860,354	93,330	5,867,398	240,519	896,044	6,763,442	1,100,873

ATODIAD 2 - Crynodeb o'r 'Gweithwyr Proffesiynol Perthnasol' fel y'u Hamlygir yng Nghostau'r Aseiad Effaith Rheoleiddiol ar gyfer Canllawiau Gofyn a Gweithredu

Dylai sefydliadau Gwasanaethau Cyhoeddus ystyried bod y swyddogaethau proffesiynol canlynol yn "berthnasol" o safbwynt Gofyn a Gweithredu. Fel cyflogwyr y gweithwyr proffesiynol hyn, dylai Awdurdodau Lleol a Byrddau Iechyd Lleol sicrhau eu bod wedi'u hyfforddi'n ddigonol (drwy gyrsiau hyfforddi a gynigir gan y Fframwaith Hyfforddi Cenedlaethol) a'u cefnogi'n ddigonol i roi Gofyn a Gweithredu ar waith mewn ffordd empathig a diogel, yn ogystal â monitro'r arfer i sicrhau bod diogelwch a lles y cleientiaid yn ganolog i'r holl waith.

<i>Bwrdd Iechyd Lleol</i>
<i>Bydwagedd Ymwelwyr Iechyd Meddygon Teulu Staff Damweiniau ac Achosion Brys Camddefnyddio sylweddau Nyrsys Seiciatrïg Cymunedol Tîm Argyfwng Iechyd Meddwl Nyrsys ardal Parafeddygon</i>
<i>Awdurdod Lleol</i>
<i>Gweithwyr Cymdeithasol Amddiffyn Plant Gweithwyr Cymdeithasol Diogelu Oedolion Agored i Niwed Arweinwyr Diogelu mewn Addysg Nyrsys ysgol Swyddogion Dewisiadau Tai a Digartrefedd Cynrychiolwyr Tîm Troseddwyr Ifanc</i>
<i>Awdurdod Tân ac Achub</i>
<i>Pob ymladdwr tân gyda chyfrifoldebau yn y gymuned</i>

Nodyn – Nid yw hon yn rhestr gyflawn ac efallai bydd swyddogaethau eraill y bydd angen hyfforddiant arnynt, yn seiliedig ar angen lleol. Er mwyn pennu a ddylid nod proffesiwn fel un "perthnasol", dylid defnyddio'r meini prawf canlynol:

Meini prawf "Perthnasol"

Mae gweithiwr proffesiynol perthnasol:

mewn swyddogaeth sy'n wynebu'r cyhoedd ac yn dod i gysylltiad yn rheolaidd â'r cyhoedd

ac;

mewn swyddogaeth lle mae profiad ei grŵp cleient o drais ar sail rhywedd, cam-drin domestig a thrais rhywiol yn cymhlethu ac yn effeithio ar natur ymgysylltiad y cleient â'r gwasanaeth a gynigir yn rhinwedd y swyddogaeth honno.